

劉賓客文集目錄

卷第一

賦

問大鈞賦

楚望賦

何卜賦

望賦

秋聲賦

卷第二

碑上

代郡開國公王氏先廟碑

高陵縣令劉君遺愛碑

砥石賦

傷往賦

謫九年賦

山陽城賦

彭陽侯令狐氏先廟碑

故吏部侍郎吳公神道碑

卷第三

碑中

唐故福建都團練觀察使薛公神道碑

許州文宣王新廟碑

唐故兼御史中丞贈太師崔公神道碑

唐故宣歙地都團練觀察使王公神道碑

唐故邠寧節度使史公神道碑

卷第四

碑下

曹溪第六祖大鑒禪師第二碑

佛衣銘并引

唐故衡嶽律大師湘潭唐興寺儼公碑

牛頭山第一祖融大師新搆記

袁州萍鄉縣楊岐山故廣禪師碑

夔州始興寺移鐵像記

毗盧遮那佛華嚴世界圖贊

成都府新修福成寺記

卷第五

論上

辨跡論

明贊論

華佗論

天論上

天論中

天論下

卷第六

論中

因論七篇

卷第七

論下

辨易九六論

與董生論易

卷第八

記上

天平軍節度使廳壁記

國學新修五經壁記

鄭州刺史東廳壁記

和州刺史廳壁記

山南西道新修驛路記

汴州刺史廳壁記

汴州鄭門新亭記

管城新驛記

山南西道節度使廳壁記

卷第九

記下

夔州刺史廳壁記

機汲記

復荆門縣記

連州刺史廳壁記

洗心亭記

武陵北亭記

卷第十

書

上杜司徒書

為京兆李尹答于襄州第一書

會于襄州第二書

答容州竇中丞書

与柳子厚書

与刑部韓侍郎書

獻權舍人書

答饒州元使君書

答柳子厚書

答道州薛郎中論方書書

与道州薛郎中論書儀書

卷第十一

表章一

讓同平章事表

謝手詔表

請赴行營表

賀復吳少誠官爵表

謝平章事表

謝貸錢物表

謝兵馬使朱鄭等官表

賀除虔王表

慰義陽公主薨表

慰王太尉薨表

卷第十二

表章二

謝冬衣表

謝濠泗兩州割屬淮南表

謝曆日面脂表

謝墨詔表

論廢楚州營田表

請朝覲表

謝春衣表

謝賜門戟表

謝男師損寺官表

謝端午日賜物表

謝墨詔表

卷第十三

表章三

為杜司徒讓度支等使表

為杜司徒謝追贈表

為杜司徒讓立太思碑表

為李戶賀獻懿二祖表

為京兆韋尹賀雨止表

為韋尹賀祈晴復應表

為韋尹謝許祈糴表

為韋尹賀元日祥雪表

為韋尹賀春雪表

為京兆李尹賀雨表

為李中丞謝紫雪等表

為李中丞謝鍾馗等表

為杜相公謝鍾馗等表

為武中丞謝新茶表

為武中丞謝春衣表

為武中丞再謝新茶表

為武中丞謝新橘表

為武中丞謝柑子表

為武中丞謝冬衣表

卷第十四

表章四 賡附

為竇中丞謝上表

謝中使送上表

賀收蔡州表

賀赦表

賀赦賡

賀雪鎮州表

賀平淄青表

夔州謝上表

賀冊皇太子表

慰國哀表

賀龍飛表

賀皇太子牋

賀赦表

賀冊太皇太后表

賀冊皇太后表

和州謝上表

賀改元赦表

夔州論利害表二首

卷第十五

表章五 牋附

為裴相公賀冊魯王表

為裴相公讓官第一表

第二表

第三表

蘇州謝表

又謝賑貸表

又賀冊皇太子表

賀冊皇太子牋

卷第十六

表章六

蘇州謝恩賜加章服表

賀皇帝疾愈表

汝州謝上表

同州謝上表

賀臬斬鄭注表

賀德音表

賀赦表

謝恩賜粟麥表

慰淄王薨表

謝恩放先貸斛斗表

謝分司東都表

卷第十七

狀

為淮南杜相公論新羅請廣利方狀

為京兆韋尹降誕日進衣狀

為京兆李尹降誕日進衣狀

為京兆韋尹進野豬狀

為杜相公自淮南遣入長

安至長樂驛謝賜酒食狀

為杜相公謝就宅賜食狀

為東都韋宙守謝賜食狀

為裴相公進東封圖狀

舉崔監察群自代狀

舉開州柳使君公綽自代狀

舉姜補闕倫自代狀

蘇州舉楊子韋中丞自代

狀

蘇州上後謝宰相狀

蘇州加章服謝宰相公狀

汝州上後謝宰相狀

汝州舉杭州裴大夫自代狀

汝州進鷹狀

同州舉蕭諫議自代狀

上宰相賀德音狀

上宰相賀改元赦書狀

薦處士嚴瓘狀

薦處士王龜狀

卷第十七

啓

上杜司徒啓

上淮南李相公啓

上門下武相公啓

上中書李相公啓

謝門下武相公啓

謝中書張相公啓

賀門下裴相公啓

上門下裴相公啓

賀門下李相公啓

上僕射李相公啓

謝裴相公啓

謝竇相公啓

卷第十九

集紀

唐故國李公集紀 相

唐故中書侍郎平章事韋

公集紀

唐故相國贈司空令狐公

集紀

唐故尚書主客員外郎盧

公集紀

唐故衡州刺史呂君集紀

唐故尚書禮部員外郎柳君集紀

董氏武陵集紀

激上人文集紀

卷第二十

雜著

傷我馬辭

口兵戒

猶子蔚遠越戒

又鏡博

觀市

論書

劉氏集畧說

名子說

奏記丞相府論字事

澤宮詩

魏生兵要述

救沈志

卷第二十一

雜興詩三十一首

學院公體三首

偶作二首

古詞二首

寓興二首

昏鏡詞

養鸞詞

武夫詞

賈客詞

調瑟詞

讀張曲江集作

遠梅諫寄人

訛史二首

苦雨行

萋兮吟

徑檀道濟故壘

頽歌器圖

聚蚊謠

百古吟

飛鸞操

秋螢引

華山歌

磨鏡篇

有懶吟

卷第二十二

五言今體三十首

春日退朝

徑東都安國觀九仙公主

舊院作

蜀先主廟

觀八陣圖

八月十五夜玩月

許洽事見示哭工部劉尚書詩因命同作

奉和中書崔舍人八月十五夜玩月二十韻

奉和淮南李相公莫秋即事寄成都武相公

元和癸巳歲仲秋詔發江陵偏師問罪蠻徵後命宣慰

釋兵歸降凱旋之辰卒不成詠寄荆南嚴司空

武陵書懷五十韻

經伏波祠

聞董評事疾因以書贈

宿誠禪師山房題贈二首

晚泊牛渚

罷郡歸洛陽閑居

城中閑遊

罷郡歸洛陽寄友人

陝州河亭陪韋伍大夫雪後眺望因以苗別與韋有布

衣之舊一別二紀經遷貶而歸

途中早發

初至長安

大和戊申歲詔賜觀稼謹書盛事

早秋集賢院即事

金陵懷古

畫居池上亭

分司東都蒙襄陽李司徒

相公書問因以奉寄

奉和楊李二相公策免後即事述懷贈荅十韻

門下相公榮加兼命輒敢申賀

病中禪客見問因以謝之

卷第二十三

古調十六首

登司馬錯故城

卧病聞常山拉師因寄李

六侍御

謁住山會禪師

善卷壇下作

武陵觀火詩

崔少府自貶所還遺山薑花以詩荅之

途中早發

和董庶中古調贈尹果毅

望衡山

遊桃源百韻

客有為余話登天壇過雨之狀因以賦之

有僧言羅浮事因為詩以寫之

秋江早發

裴尚書見示春歸城南別

聖寄王左丞高侍郎之什命同作

冬夜宴河中李相公中堂命筆歌送酒

卷第二十四

七言五十六首

西塞山懷古

陽山廟觀賽神

漢壽城春望

後梁宣明二帝碑堂下作

荊州道懷古

朗州賓員外見示元郎中

郡庭長句因而繼和

早春對雪奉寄元郎中

竇朗州見示元郎中早秋贈荅命同作

徐員外遺編貯書箱用荅佳貺

唐秀才贈端州紫石硯以詩荅之

覽董評事思歸之什因以詩贈

松滋渡望峽中

揚州春夜李張諸公對酒

聯句追刻燭擊鉢故事連夜艾群公沾醉矜狀就

枕余偶獨醒因題詩段君枕上以志其事

贈王十二學士

閩下口號呈柳儀曹

監祠夕月壇書事

戲贈崔千牛

元和甲午歲詔徵江湖遊客余自武陵赴京宿于都

亭有懷續來諸君子 嚴司空見示武相公唱和

因命同作

見舊番官馮拜達

洛城古塙

京戲贈看花諸君子

望夫石

石頭城

基城

江令宅

謝寺雙檜

秋夜安國硯閣坐

閔稔賓推第歸艷以詩美之兼賀韓十五曹長

寄楊八壽州

楊八壽州

榜後詩因而繼和

崔少監見示墜馬長句因而和之

元和十一年自朗州承召至

再遊立都觀絕句

金陵五題

烏衣巷

生公講堂

韓信廟

洛中寺見賀監州書題詩

李賈二大諫拜命後寄

宣上人寄賀王侍郎放

贈東岳張鍊師

寄楊虢州

秋日題竇員外新居

蒙恩轉儀曹郎依前充入賢字士奉韓湖州自代因寄

途次華州陪錢大夫登樓春望因覩李崔令狐三相公

唱和之什遂題是詩

三鄉驛樓伏覩立宗望女

几山詩小臣斐然有感

洛下初冬拜表有懷上京

故人

和尉遲郎見示南遷復至

城東舊居之作

洛城酬福建陳判官見贈

始聞秋風

和蘇十郎中謝病閑居

酬廖泰謀秋夕見過之作

題王郎中新居

酬崔員外任侍御同過鄙人旧居見懷之什時守吳郡

寄賀温尚書

劉駙馬水亭避暑

寄孫常侍

酬吳端州見寄

雜體三十九首

翠微寺有感

觀舞柘枝二首

秋江晚泊

秋日送客

崔湖^州寄三癖詩因以酬之

登陝州城樓寄京都親友

秋晚題湖城驛上池亭

平齋行二首

武昌老人說笛歌

廟庭偃松詩

贈致仕滕庶子先輩

送竹

臘日覘獵西山

君山懷古

臨江寓望

登武陵城悵狀有作

為郎分司寄上都同舍

請告東歸寄諸僚友

平蔡州三首

城西行

西山蘭若試茶歌

答東陽涵碧園詩

咏红柿

葦城懷古

題甘棠館二首

聽旧宮人穆氏歌

唐郎中宅与諸公同飲賞花

与歌童

賞牡丹

奉訓崔湖州見寄

与歌者

渾侍中宅牡丹

与歌者

題燕余館屏風

寄陝州姚中丞

卷第二十六

樂府

團扇歌

紀南歌

順陽歌

視刀環歌

更衣曲

荊州歌二首

宜城歌

馬嵬行

三閭詞四首

淮陰行五首

競渡曲

采菱行

莫佻歌

洞庭秋月

華清詞

桃源行

阿嬌怨

送春曲三首

柳花詞三首

秋詞二首

卷第二十七

樂府

秦娘歌

陵上行三首

秋風引

蠻子歌

踏歌詞四首

步虛詞二首

魏宮詞二首

九華山

初夏曲三首

送春詞

秋府詞

搗衣曲

度桂嶺歌

畬田作

鷓鴣吟

觀雲篇

百花行

路旁曲

壯士行

竹枝詞九首

浪淘沙詞九首

拋球樂詞二首

竹枝詞二首

七夕二首

棹田歌

葡萄歌

墻陰歌

踏潮歌

春有情篇

白鷺兒

遠風行

楊柳枝詞九首

瀟湘神二首

楊柳枝詞二首

絃那曲二首

卷第二十八

送別四十六首

送張侍郎入蕃弔祭

送楊侍御歸朝

送蕭李二郎中並以本官兼中丞各充京西京北覆糧使

送李尚書鎮滑州

送渾大夫赴豐州

送源中丞充新羅冊立使

送陸侍御歸淮南使府

送蕭太常并官歸養

送王司馬之陝州

送楊處厚入閩

送韓中丞之吳興五首

送周渝州歸郢州別墅

發華州留別張侍御

奉送家兄歸王屋山隱居

送王協律赴湖南使幕

別友人後得書因以詩贈

奉送李僕射赴鎮

重送李相公頃廉問江南已經七載後歷滑甚劔南兩

鎮遂入相今復領旧地新加旌旄

送熊判官歸江陵因寄呈

送華陰尉張若

送熊判官歸江陵因寄呈

江西裴中丞二十三兄

送韋秀才赴制舉

送李秀才還湖南

送張鹽赴舉

送裴處士應制舉

送錢侍御

將赴汝州留辭李相公

送令狐相公

送趙中丞

送李侍郎歸朝

送裴司徒

送李蘄州赴任

洛中春末送杜錄事

宴盧侍御宅因送之鎮

送崔司業

送皇甫少尹

送前進士蔡京

送唐舍人

送盧處士歸嵩山

送李秀才赴舉

送令狐博士

送李員外

送陳郎中

送李中丞之楚州

送李康先輩赴選

送廖謀東遊

送從弟郎中赴浙西

卷第二十九

送贈二十四首

贈別君素上人

送深法師

廣宣上人寧在蜀與韋令公唱和詩卷因答詩示之

送僧仲剛東遊

送僧元嵩南遊

送如智法師

贈長沙黃頭陀

送惠則法師

秋日過逢峯法師寺院使

送歸江陵

重送鴻舉赴江陵

送僧及南

贈日本僧智藏

贈眼醫婆羅門僧

海陽別浩初師

觀棋歌送儂師西遊

贈別約師

送鴻舉師

送霄韻上人遊天台

送義舟師卻還黔南

送景玄師東歸

送元曉上人歸稽亭

送惟良上人

送元簡上人遠遊

送宗密上人歸南山

卷第三十

哀悼悲傷三十八首

德宗神武孝文皇帝挽歌二首

敬宗睿武昭愍孝皇帝挽歌三首

文宗元聖昭獻孝皇帝挽歌三首

故相國燕國公子司空挽歌二首

重至衡陽傷柳儀曹

謫居悼往二首

哭呂衡州

送傷段右丞

傷桃源薛道士

王思道碑 下作

送傷丘中丞

傷獨孤舍人

敷水驛觀舅氏題詩處

故相國袁公挽歌三首

代靖安佳人怨二首

傷愚溪三首

見元侍御和展上人詩

傷秦姝行

實員外見示悼妓詩顧余嘗識之因命同作

和實夔州寒食憶故姬

傷循州渾尚書

哭龐京兆

再傷龐尹

哭王僕射相公

傷韋客鎮賓

再往故相元九宅

劉賓客文集目錄

劉賓客文集卷第一



正議大夫檢校禮部尚書兼太子賓客贈兵部尚書劉禹錫

問大鈞賦

砥石賦

楚望賦

傷往賦

何卜賦

謫九年賦

望賦

山陽城賦

秋聲賦

問大鈞賦

始余失臺郎為刺史又貶州司馬俟罪朗州三見閏月人咸曰
數之極理當遷焉因作謫九年賦以自廣是歲臘月詔追明年
自闕下重領連山郡印綬人咸曰美惡周必復第行無恤歲杪
其復乎居五年不得調歲二月有事于社前一日致齋孤居慮
靜滯念欲起伊人理之不可以曉也將質諸神乎謹貢誠馳精
敢問大鈞其夕有遇寤而次第其詞以為賦
圓方相函兮浩其無垠宵冥翕闕兮走三辰以騰振孰主張是

分有工其神。迎隨不見兮。強名之曰大鈞。歎以臨下兮。巍兮推
尊。天爲獨陽。高不可問。工居其中。與人差近。身執其權。心平其
運。循名想象。斯可以訊。曰嘻。蒙之未生。其猶泥爾。落乎埏埴。唯
鈞所指。忽然爲人。爲幸大矣。工賦其形。七情與俱。嗇智不授。界
之以愚。坦坦之衢。萬人所趨。蒙一布武。化爲畏途。人或譽平之。
百說徒虛。人或排之。半言有餘。物壯則老。乃唯其常。否終則傾。
亦不可長。老先期而驟。至今否踰數。而巨量。雖一夫不獲兮。亦
大化之攸病。謹薦誠上。問兮。悅伏以聽。是夕寢熟。夢遊乎無何
有之鄉。抗陛級乎重霄兮。異人間之景光。中有威神。巾金甲而
燁煌。命之使前兮。其音琅琅。曰。吾大化之一工也。居上臨下。廉
其不平。汝今有辭。吾一以聽。播形肖貌。生類積億。橐籥圈匡。鎔
鍊消息。我之司智。初不爾嗇。不守以愚。覆爲汝賊。既賦汝形。輔
之聰明。盡求世師。資適攸宜。胡然抗志。遐想前烈。倚梯青冥。舉

足斯跌。韜爾智斧。無爲自伐。鑿竅太繁。天和乃洩。利逞前誘。多
逢覆轍。名賜內煎。外火非熟。今哀汝窮。將享汝愚。剔去剛健。納
之柔濡。塞前竅之傷痕兮。招太和而與居。貫以待人兮。急以自
拘。道存壺奧。無示四隅。執物之勢。不作兮。見傷之機。自無。汝不
善用。吾焉嗇乎。且夫貞而騰氣者。聯聯健而垂精者。昊昊我居。
其中。猶輪是陷。以不息爲體。以日新爲道。保鱗蜚走。灌莽苞阜。
乃牙乃甲。乃殛乃剖。陽榮陰悴。生濡死蕘。各乘氣化。不以意造。
賦大運兮。無有淑慝。彼多方兮。自生醜好。爾奚不德。余以驟壯。
姑尤我以速老。邪觀汝百爲。又或不然。赤子哇哇。急其能言。亦
既名物。幾時踰躓。春耕其立。投種之日。釋耒而嘆。何時實粟。望
所未至。謂余舒舒。欲其久留。謂我瞥如。我一子二。誰之曲歟。彼
蒹葭之蒼蒼兮。霜霰苦而中堅。松竹之駸駸。索籜兮。不若楮筍
之可憐。納材葦而構明堂兮。固容消而力完。揚且之哲兮。不可

以常然當錫爾以老成蒼蒼皓顛山立時行去敵氣與矜色兮
噤危言以端誠俾人望之悔黷不生爾之所得孰與壯多不善
處老問余而何受教而回遽遽形開嚮之威神孰為未哉乃遽
衣促盥端慮滌想委佩低簪持簿叩顛而言曰楚臣天問不訓
今臣過幸一獻三售始厚以愚終期以壽忘上問之罪濯已然
之咎心憎故術腹飽新授馳神清玄拜手稽首

砥石賦 時在朗州

南方氣泄而雨淫地慝而傷物媪神噫濕淪色壞味維金之堅
亦失恆性始余有佩刀甚良至是澀不可拔剖其室乃出邈陽
眇眩傅刃蒙脊鱗然如痂如黑子如青蠅之惡銳氣中錮猶
入被病然客有聞焉褒密石以遺余沃之草腴雜以烏膏切劇
下上真質倬見躊躇四顧道余周爾謝客微子之貽幾喪吾寶
客曰吾聞諸梅福曰爵祿者天下之砥石也高皇帝所以礪世

摩鈍有是邪余退感其言作砥石賦

我有利金兮以利為佩遭土卑而慝作兮雄銑為之潛晦如景
昏而蝕既兮與飢漆而為癘顧秋蓬之不可刺兮尚可遊乎醜
僻之外利物蒙蔽材人惆悵俾百汰之至精蟠一檢而多恙豈
害氣之獨然兮將久不試而然彼屠者之刃兮獵者之鋌不灌
不淬兮糝錯銜銚日鼓月揮兮剗腴擊鮮睨燿燿以耀芒蒼滯
夷而騰羶豈不涉暑而蒙沴兮昂用之而成妍有客自東遺余
越砥圭形石質蒼色膩理剗其鱗斂滑以滌瀝如衣澣垢如昂
出否霧盡披天洋開見水拭寒熵以破昏擊清音而振耳故態
復還寶心再起既賦形而終用一蒙垢焉何耻感利鈍之有時
兮寄雄心于瞪視嗟乎石以砥焉化鈍為利法以砥焉化愚為
智武王得之商俗以厚高帝得之傑材以奏得既有自夫豈無
因漢氏以還三光景分隨道澗狹用之得人五百餘年唐風始

振懸此大砥以襄兆民播生在天成器在君天爲物天君爲人
天安有執礪世之具而患乎無賢歟

楚望賦

予既謫于武陵其地故郢之裔邑與夜郎諸夷錯雜繫乎天者
陰伏陽驕是已繫乎人者風巫氣竄是已囂零浮浮利于樓居
城之麗譙實鄰所舍四垂無蔽萬景空入因道其遠邇所得爲
楚望賦云

翼軫之野祝融司方陰迫而專專實生沱天濡而零土洩而泥
氣罕泚清兮滌氛曠曠中人支體兮爲瘡爲瘵以曠滌頌兮利
居高于物外我卜我居于城之隅宛在藩落麗譙渠渠四阿垂
空洞戶發樞眸子不運坐陵虛無歲更周流時極慘舒萬象起
滅森來貺予櫺軒之外羣山巖從崗陵靡施勢若相拱出雲見
怪窈蔚森聳露夕霞朝望如飛動簷廡之下大江頽洞支流合

輸泄入雲夢羲和望舒出沒兩涯涵泳之族聲取噉呀秋水灌
盈漩石飄沙流枿軒昂舞于盤渦逮及收潦澹如綠醞白石磷
磷倒影羅生蘋末風起有文無聲悠遠烟緜與空蒼然湘沅之
春先令而行臘月寒盡溫風發榮土膏如濡言鳥嚶嚶三星嗟
其曉中植物颯以飄英雲歸高唐草蔽洞庭日與天盡神將化
并圓方相涵遊氣杳冥熙熙藹藹藻飾羣形枿樹童立積空凝
青環洲曲塘含景曜明恢台之氣發于春季涉夏如鑠逮秋愈
熾土山焦熬止水漢沸翔禽跼墮啞味垂翅曦赫歊蒸陽極反
陰二儀交精上下相歆雲興天際欵若車蓋凝臚未瞬彌漫霍
霽驚雷出火喬木糜碎殷地蕪空萬夫皆廢懸雷綆綻日中見
昧移晷而收野無完塊少陰之中景物澄鮮丹葉星房燭耀川
原夕月既望曜于丹泉上鏡下冰湔塵濯煙宿麗潛芒獨行高
躔皓一氣之悠悠潔有形而溢清色杳微明而斐疊想遊目于

化先夜無朕以徂征金霞暈乎海壖明星方揚斜漢西懸璿柄
如墮半沈層瀾雞啁晰而晨鳴兮日荏苒以騰晶動植瞭兮已
分山川鬱乎不平復入寰之譴卑洵浩浩以營營追向時之景
光不可驟得以再更意華胥之夢還猶彷彿而馳精日次于房
天未降霜百卉猶澤水泉收脉故道脍音削衍為廣斥水禽嬉
戲引吭伸翮紛驚鳴而決起捨綵翠于沙礫時時北風振搗揚
埃蕭條邊聲與雁俱來寒氛委積萬竅交激楚雲改容飛雨凝
滴灑林逋响浙瀝梢撼飛電照雪以騰光柔蔬傲霜而秀坼疆
次殊氣川谷異宜民生其間俗鬼言夷招三閭以成謠德伏波
而構祠投拒救反片呂以鼓撒泰鱸魴而如犧堵木靚深孽祇憑
之祈年去癘蠲敬祇威擊鼓肆筵河旁水湄荐誠致祝卻略躩
踞躩踞見聖光賦動渚居蠱食大掩水物罟張餌啗不可遁伏顛舉
潛緹晝撞夜觸設機沉深如拾于陸彼遊儵之瑣類咸跳脫控

窘束雖三趾與六眸時或加乎一目亦有輕舟軒輕泛浮拖綸
往復馴鷗相逐莫夜澄寂嘯歌羣族儉音俚態幽怨委曲逗疎
析于江城引哀援于山木巢山之徒枰木開田灼龜伺澤兆食
而蟠鬱攸起于巖阿騰絳氣而蔽天熏歇雨濡穎垂林巔盜天
和而藉地勢諒無勞而有年罷士閑人逸為末作求全渚浹洵
汰淺瀆流注瀦沱繁光熠燿貪賈未貿發于懷握無翼而飛濶
于豐屋晒耕耘之悒悒徒胼胝以自鞠我處層軒日星回還閱
天數而視民風百變態見乎其間非耳剽以臆說兮固幽求而
縱觀觀物之餘遂觀我生何廣覆與厚載豈有形而無情高莫
高兮九閭遠莫遠兮故園每有撒兮車有轄江山坐兮不可越
吾又安知其所如况臨高以觀物

傷往賦

人之所以取貴于蜚走者情也而誕者以違情為智豈至言邪

予授室九年而鰥。痛若人之天闕弗遂也。作賦以傷之。冀夫覽者有以增伉儷之重云。

歎獨處之邑邑兮。憤伊人之我遺。情可殺而猶毒。境當歡而復悲。人或朝歎而莫息。夫何越月而踰時。太極運乎三辰。轉寒暑而下馳。有歸於無兮。盛復于衰。猶昧爽之必莫。又安得而怨咨。我今怨夫若人兮。曾旭旦而潛暉。飄零日及之萼。

日及槿也。朝生暮落一名

玉蒸。倏忽蜉蝣之衣。川走下而不還。露迎暘而易晞。思已甚兮。難絕。見無期兮。永思。我行其野。農民桑者。舉案來饁。亦在林下。我觀于途。禪取之夫。同荷均挈。荆釵布襦。羽毛之蕃。鱗介之微。和鳴灌叢。雙詠漣漪。薨薨伊虫。蠢蠢伊豸。遊空穴深。兩兩相比。何動類之萬殊。必雄雌而與俱。物莫失儷。以孤處。我方踽踽而馬如。我復虛室目。悽涼兮。心伊鬱兮。將語誰坐。匡牀兮。撫嬰兒何所。丐沐兮。何從仰。飴襦袴在身兮。昔圍差跌。鞶囊附

臂兮。餘馥歲蕤。誠天性之潛感。顧童心兮。如疑。曉然有難繼之慕。漠然減好弄之姿。指遺桂兮。能認。想空帷兮。欲歸。我入寢宮。痛人亡兮。物改其容。寶瑟偃兮。絃在絕。瑤臺傾兮。鏡奩空。寒鑪委灰。虛幌多風。隙駒晨轉。窓蟾夜通。步搖昏兮。網黏翡翠。芳褥掩兮。塵化蛩蛩。閱刀尺之餘澤。見巾箱之故封。玩服儼兮。猶具繁華。謝兮。焉從想。翩躚於是非。求僖宰與冥蒙。信奇術之可致。嗟此生兮。不逢。徒注視以竚聽。悅神疲而目窮。還抱影以獨出。紛百哀而攻中。系曰。龍門風霜苦。別鶴哀鳴夜。樹羽吳江波浪深。雌劍一去無遺音。悲之來兮。憤予心。洵如行波游浸。滯悵緣情而莫極。思執禮以自箴。已焉哉。苒苒生死悠悠。古今乘彼一氣兮。聚散相尋。或鼓而興。或罷而沈。以無涯之情愛。悼不駐之光陰。諒自迷其有分。徒終怨于匪忱。彼蒙莊兮。何人。予獨累歎而長吟。

何卜賦

余既幼惑立命之說。今身久放。以愈疑。心回率其莫曉。今將取質夫筮龜。楚人俗巫而好術。今叟有鬻卜而來。思乃招而祝之。曰。嘻。人莫不塞。有時而通。伊我今久而愈窮。人莫不病。有時而間。伊我今久而滋蔓。吾聞人宵五行。動止有則。四時轉續。變于所極。一歲之旱。人斯具舟。三月之熱。人斯具裘。極必反焉。其猶合符。予首圓而足方。予腹陰而背陽。胡形象之有肖。而變化之殊常。經曰。剝極則賁。居賁而未嘗剝者。其誰否。極受泰。居否而未嘗泰者。又其誰鶴。胡不截。鳧胡不禪。夔何罰。而蹇蹕。絃何功。而扶持。紛紜恣睢。交作舛馳。似與似奪。似信似欺。孰主張之。問于子龜。卜者曰。招我以粗。問我以微。有天下之是非。有一人之是非。在此為笑。兮在彼為嗤。或昔而成。或今而虧。君問曷由。主張其時。時乎時乎。去不可邀。來不可逃。淹淹兮孰捨孰操。董喙

之毒苓。雞首之賤毛。各于其時。而伯音霸其曹。屠龍之伎。非曰不偉。時無所用。莫若履齠。作俑之工。非曰可珍。時有所用。貴于斷輪。絡首縻足兮。驥不能踰。跬前無所阻兮。跛豎千里。同涉于川。其時在風。沿者之吉。泝者之凶。同執于野。其時在澤。伊種之利。乃糝之厄。故曰。是邪非邪。主者時邪。諒淋惡之。同出兮。顧所丁之若何。夫如是。得非我美。失非我耻。其去曷思。其來曷期。姑蹈常而俟之。夫何卜為。言訖執龜而起。予退而作何卜賦。于是蹈道之心一。而俟時之志堅。內視羣疑。猶冰釋然。

謫九年賦

古稱思婦。已歷九秋。未必有是。舉為深愁。莫高者天。莫濬者泉。推以極數。無踰九焉。伊我之謫。至于數極。長沙之悲。三倍其時。廷尉不調。行當致而天有寒暑。閏餘三變。朝有考績。明幽三見。顧堯之民。今亦昏墊。而有歎歎。息兮。倘佯登高。高兮。望蒼蒼。突

弁之夫。我來始黃。合抱之木。我來猶芒。山增昔容。水改故防。童
者鬱鬱兮。涸者洋洋。天覆地生。蕃兮無傷。彼族而居。鄙之投荒。
彼軒而遊。昨日旃揚。信及澤濡。俄然復常。稽天道與人紀。咸一
債而一起。去無久而不還。禁無久而不理。何吾道之一窮兮。貫
九年而猶爾。噫不可得而知。庸距得而悲。苟變化之莫反兮。又
安用夫宵天地之形焉。

望賦

邈不語兮。臨風境自外兮。感從中。晦明轉續兮。八極鴻蒙。上下
交氣兮。羣生異容。發孤照於寸眸。驚遐情乎大空。物變化兮。多
象。入過時兮。不同。嗟乎。有目者必騁望。以盡意。當望者必緣情。
而感時。有待者瞿瞿。忘懷者熙熙。慮深者瞠然若喪。樂極者冲
然無違。外徒倚其如一。中糾紛兮。若斯。望如何其望。最樂。晞慶
霄兮。邈阿閣如雲兮。天顏咫尺。如草兮。臣心踊躍。肩交翟兮。歲

蕤。旗升龍兮。躡略日轉黃道。天開碧落。凝瑞景於庭樹。掬非烟
於殿幕。望如何其望。且催登灞岸兮。見長安。紛擾擾兮。紅塵合。
鬱葱葱兮。佳氣盤池象漢兮。昭回城依斗兮。闌干。避御史之馳
馬。逐倖臣之金丸。望如何其望。攸好宗萬靈兮。越四隩。漢帝仙
臺兮。秦皇海嶠。霓衣踴于河上。馬跡窮乎越徼。紫氣度關而斐
疊。神光屬天而照耀。睨眷眷以馳精。聳專專而觀妙。望如何其
望。有形。視蠢蠢兮。窮冥冥。楚塞氛惡兮。蕭關燧明。暈籠孤月。角
奮長庚。沙多似雪。磧有疑城。烟雲非女子之氣。草木盡王者之
兵。審曳柴之虛警。破來騎之先聲。信有得于風鳥。示無言于旆
旌。望如何其望。且慕恩意。隔今年光度。雕輦已辭兮。金屋何處。
長信草生兮。長門日暮。猥翠華之儻來。仰玄天以自訴。况復湘
水無還。漳河空注。淚染枝葉。香餘紉素。風蕭蕭兮。北渚波烟。漠
漠兮。西陵樹。夫不歸兮。江上石子不見兮。秦原墓。拍琴翻。朔塞

之音。挾瑟指邯鄲之路。望如何。其望最傷。佩環玦兮。思帝鄉。龍門不見兮。雲霧蒼蒼。喬木何許兮。山高水長。春之氣兮。悅萬族。獨含嘖兮。千里目。秋之景兮。懸清光。偏結憤兮。九迴腸。羨環拱于白榆。惜馳暉于落棠。諒衝斗兮。誰見伊戴盆兮。何望平聲。豈止蘇武在胡。管寧浮海。送飛鴻之滅沒。附陰火之光彩。鶴頸長引。烏頭未改。恨已極兮。平原空。返何時兮。燕山在。永望如何。傷懷孔多。降將有依風之感。宮人成憶月之歌。歌曰。張衡側身愁思久。王粲登樓日回首。不作渭濱垂釣臣。羞爲洛陽洋塵友。

山陽城賦

山陽故城遺址數雉。四百之運。終于此墟。裔孫作賦。蓋閔漢也。

詞曰

我止行車。實涕于山陽之墟。是何蒼莽與慘悴。春陵之氣兮。焉如終昌。運于四百。辭至尊而伍匹夫。有利器而倒持兮。魯何芒

刃之足舒。懿王迹之肇基。暨坤維之再敷。邈汜陽與鄗上。况蛇變而龍攄。痛人亡而事替。終此地焉。忽諸嗟乎。積是爲治。積非成虐。文景之欲。處身以約。播其德芽。迄武乃獲。柏靈之欲。縱心于昏。然其妖焰。逮獻而焚。彼伊周不世兮。奸雄乘釁而騰。振物象。摧以易位。被虛號而陽尊。終世殫而事去。胡竊揖讓以爲文。嗚呼。維神器之至重兮。蓋如山之不騫。使人傳譬乎。逐鹿固健。步者所先。諫人事之云爾。孰云當塗之兆也。自天亂曰。久矣莫可追。升彼墟兮。噫嘻。獨遺武兮。貽後王之元龜。

秋聲賦

相國中山公賦。秋聲以屬天官。太常伯唱和俱絕。然皆得時道。行之餘興。猶有光陰之歎。况伊鬱老病者乎。吟之斐然。以寄孤憤。

碧天如水兮。宵宵悠悠。百虫迎莫兮。萬葉吟秋。欲辭林而蕭颯。

潛命侶以啁啾送將歸兮臨水非吾土兮登樓晚秋多露蟬之
思夕蔓趣寒蛩之愁至若松竹含韻梧楸蚤脫驚綺疏之曉吹
墮碧砌之涼月念塞外之征行顧閨中之騷屑夜蛩鳴兮機杼
促朔雁叫兮音書絕遠杵續兮何泠泠虛窻靜兮空切切如吟
如嘯非竹非絲當自然之宮徵動終歲之別離廢井苔合荒園
露滋草蒼蒼兮人寂寂樹槭槭兮虫唧唧則有安石風流巨源
多可平六符而佐主施九流而自我猶復感陰虫之鳴軒歎涼
葉之初墮異宋玉之悲傷覺潘郎之么麼嗟乎驥伏櫪而已老
鷹在韝而有情聆朔風而心動盼天籟而神驚力將瘵兮足受
紕猶奮迅于秋聲

劉賓客文集卷第一

劉賓客文集卷第二碑上

代郡開國公王氏先廟碑

彭陽侯令狐氏先廟碑

高陵縣令劉君遺愛碑

故吏部侍郎奚公神道碑

代郡開國公王氏先廟碑

唐制五等有爵服而無山川登于三事得立四廟備物崇祀以
交神明敬先報本以輔孝治有國之令典也維長慶三年前相
國王公始卜廟于西原崇業里公時鎮劔南東川上章曰臣涯
官秩印綬品俱第三請如式以奉宗廟制曰可是歲仲冬申命
長男孟堅祔其主于三室明年公入為御史大夫復以十二月
躬行烝祭間歲公出梁州就拜司空禮崇異數廟加祀室大和
二年增新室既成祔顯考于尊位告饗由禮觀之者以為世程
第一室曰上儀同幽州別駕府君諱元政以妣博陵崔氏配第
二室曰湖州安吉縣令贈尚書刑部員外郎府君諱實以妣贈

扶風縣太君馬氏配第三室曰朝散大夫青州司馬贈戶部侍郎府君諱祚以妣贈武威郡太夫人賈氏配第四室曰溫州刺史贈太尉府君諱冕以妣贈魯國太夫人博陵崔氏配初周靈王太子晉遇浮丘公化爲神僊時人號曰王家其後遂以命氏顯於秦者曰翦三世將秦師子孫分居晉代間東漢有徵君霸霸孫甲亦號徵君徙居祁縣爲著姓故至于今爲太原人自漢涉魏益以熾昌凡十葉至後魏度支尚書廣陽侯問廣陽有二子神念神感神念南奔梁神感北仕齊惟儀同府君廣陽侯五代孫也唐興于太原實從義旗佐成王業故有開府儀同之寵惟刑部府君以功臣子理二邑不躋貴仕故有錫羨後大之祥惟戶部府君幼孤以孝聞於鄉曲未冠以文售于有司由前進士補延州臨安縣主簿會詔徵賢良策在甲科授瀛州饒陽尉歲滿遷渭南天后在神都而東畿差重遂由渭南轉河陽適逢

建萬象神宮旬內吏分董其役因上書切諫繇是名益聞開元初以大理司直馳軺車聯讞大獄閩禺朔漠所至決平蚤以藥棘傷生晚成劇恙樂就夷曠故不至大官惟太尉府君生于治平時以文學自奮年十有五貢然從秋試明年春升名于司徒又一年玄宗御層樓發德音懸文詞政術科以置髦士府君策最高授太常寺太祝未幾復以能通道德南華冲虛三真經進蓋屋尉天寶中歷左拾遺左補闕禮部司駕負外郎屬幽陵亂華遣兵南服因佐閩粵改檢校比部郎中行軍司馬時中原甫寧江南爲吉地二千石多用名德乃以府君牧溫州朝廷虛公鄉以俟高第及開永嘉人輟春罷社播紳間不以誦相弔焉雖位卑于道而邁德垂矩後之人得以續承丕揚之其儲休啓祐有自去爾生三子皆聰明絕人長曰沼以神童仕至檢校禮部郎中次曰潔以奇文仕至國子司業今代郡公實孝子也蚤在

文士籍射策連中咸世其家貞元中德宗聞其名自藍田尉召入禁中視草厥後三典書命再參內廷憲宗器之付以國柄翊贊有道雖冊免常居大僚今年自梁州請覲上思用舊臣爲羽儀遂領太常其公府如故以一心事六君顯官重務靡不揚歷且夫起諸生至三公而心愈卑道益廣出授黃鉞以伯諸侯入服華章以謁家廟追崇極大位血食備多室享全榮而奉昭薦嗚呼公侯之孝歟宜書廟器以視橋公之三思其詞曰闕宇神庭邃清而嚴上公之儀四室耽耽犧以潔牲粢以大藉交神尚敬合醜尚氣子姪宗工駿奔奉事副筭侈袂儼恪居次孝孫兢兢執爵而弁以裸以擗以伏以興水陸具表殮葬畢登列于園方其氣增增乃禴乃嘗敬而追遠二昭二穆孝以尊本瞻瞻几幄縮縮堂柶禮成起慕涕落玄袞濡露踐霜誰無永懷不如達者哀與榮偕逢時奮庸誰不得位不如仁人以道爲貴

惟公之達兮名以顯親惟公之仁兮德以深身六朝之清臣一代之全人宜其世家翼翼振振罔不肅祇于廟之門

彭陽侯令狐氏先廟碑

今上元年七月十三日汴州刺史宣武軍節度副大使知節度事汴宋亳等州觀察處置使銀青光祿大夫檢校禮部尚書兼御史大夫上柱國彭陽縣開國伯令狐公西鸞拜章上言守臣楚蒙被恩澤列爲元侯得立家廟以奉宗祀制書下其奏于有司於是善相考祥得地于京師通濟里居無何新廟成公以守藩故申命季弟監察御史定卜牲練日越八月丁亥祔饗三室瑄墉以尚幽設幄以迎精禮無尤違神用寧謚第一室曰秦州上邽縣尉諱濬以妣太原王氏配第二室曰綿州昌明縣令贈吏部尚書諱宗亮以妣贈太原郡夫人河東柳氏配第三室曰太原府功曹參軍贈太子太保諱承簡以妣贈魏國大夫人富

春孫氏配。明年十月，公由浚郊以介圭入覲，真拜戶部尚書。進爵為魯侯。既辭戎旃，得以列侯謁三廟。是歲南至，上不視朝，又得以時展祭。先期致齋，栗然以敬。既齊，盡志歌，然永思奉其百順。陳以具物，始躋而虔恭，終獻而汎瀾。既卒事，顧麗牲之石，宜有刊紀。乃俾家老授其謀于所知，云：今狐，晉邑也。晉大夫魏顆以輔氏之功始封焉。其易名曰文，國語所謂令狐文子是已。其先，周文王之昭畢，公高之裔。畢萬為晉卿，始封于魏。自萬至顛，蓋四世。其後三十七世，蓋田侯蚪仕，**祐**跋魏為燉煌郡太守。子孫因家，遂占數為郡人。蓋田之孫熙在隋為納言，惟上邽府君納言之玄孫道克肖而位不至，惟尚書府君西州之右族。光未耀而德已基，惟太保府君志為君子儒，以經明居上第，調補陽安縣主簿。歷正平尉、汾州司法、參軍、陝州大都督府兵曹，終于太原府首掾。始以顛經進，既仕，旁通百家，愛穀梁子清而婉左。

立明國語辨而工，司馬遷史記文而不華。咸手筆朱墨，究其微旨。愷悌以肥家，信誼以急人。德究齒耄，獨享天爵。故休**祐**集于身後，徽章流乎佳城。凡以子貴承澤，降命書告弟者，始贈尚書祠部郎中，再贈禮部尚書。三加右僕射，四為今稱。一作四進太保，五為上公。先夫人亦四徙封，密印纍纍，邦族聳慕。生三子，皆才。彭陽公為嗣。次子從端，實肅給，今為檢校膳部郎中。參河東軍事。季子前所謂監察御史，今主柱下方書。溫敏而有文，綽綽然直令兄弟唯彭陽以詞筆取科名。累參侍從，由博士主尚書牋奏，典內外書命。遂登樞衡，言文章者以為冠。擁節總戎，率身和衆，留惠于盟津。變風于浚都，言方略者以為能。夫浚師嘆喑難治，乘釁竊發，寢成習俗。蒞止五載，飲和革心。東馬來朝，熊羆隕涕。聞公還期，觴必祝之，留為常伯。旋命居守汴人，聞公之東，近而愈懷，翹翹瞿瞿。盡西其首，言遺愛者可紀焉。貴而率禮，老而能慕。怵惕。

乎霜露齊莊乎廟祧睦其仲季施及鄉黨言孝悌者歸厚焉勒名于碑以代彝鼎文曰

公孤之孝莫如脩物顯顯新廟四阿三室時維仲月卜用柔日醴醎苾芬牲牲博膾遵鯤在堂簫管在庭孝孫烝烝躬若奉盃低簪委紳薦俎登鉶於饗交感涕流緣纓禮以備儀誠以致美祖考耒格錫之丕祉工祝告訖退循軒所乃授風人作詩以紀猗歟彭陽之寵光佐憲皇穆皇西省東臺迭為侍郎國之大政咨爾平章敬宗疑旒俾鎮雖立入為地官令守東周彭陽之忠厚宜介福以壽東郊既釐可復朝右縣縣其胄系于周舊由我顯起必昌其後大和紀元作廟之首刻碑廟門龍集己酉

高陵令劉君遺愛碑

縣內之大夫鮮有遺愛在其土者蓋邑居多豪政出權近非有卓然異績結于人心決于骨髓安能久而愈思大和四年高陵

人李士清等六十三人思前令劉君之德詣縣請金石刻縣令以狀申府府以狀考于明法吏吏上言謹按寶應詔書凡以政績將立碑者其具所紀之文上尚書考功有司考其詞宜有記者乃奏明年八月庚午詔曰可今書其章明有以結人心者揭于道周云涇水東行注白渠驪而為三以沃關中故秦人常得善歲按水部式決洩有時畎澮有度居上游者不得壅泉而顯其腴每歲少尹一人行視之以誅不式兵興已還寢失根本涇陽人果壅而顯之占取全流浸原為畦私開四竇澤不及下涇田獨肥它邑為枯地力既移地征如初人或赴訴泣迎尹馬而上涇之腴皆權倖家榮勢足以破理訴者覆得罪縣是咋舌不敢言吞冤銜忍家視孫子長慶三年高陵令劉君勵精吏治視人之癘如燥疽在身不思決去乃循故事考式文暨前後詔條又以新意請更水道入于我里請杜私竇使無棄流請遵田令

使無越制別白纖悉列上便宜榷吏依違不決居二歲距寶曆元年端士鄭覃爲京兆秋九月始具以聞事下丞相御史御史屬元谷實司察視持詔書詣渠上盡得利病還奏青規中上以谷奉使有狀乃俾太常撰日京兆下其符司錄姚康士曹棧李紹實成之縣主簿談孺直實董之冬十月百衆雲奔憤與喜并口謠手運不屑鼙鼓揆切什七八而涇陽人以奇計賂術士上言曰白渠下高祖故壘在焉子孫當恭敬不宜以畚鍤近陌阡上聞命京兆立止絕君馳詣府控告具發其以賂致前事又謁丞相請以穎血汚車茵丞相彭原公歛容謝曰明府真愛人陛下視元元無所恠第未周知情僞耳即入言上前翌日果有詔許訖後仲冬新渠成涉季冬二日新堰成馭流渾渾如脉宣氣蒿荒漚胃迎報澤澤音釋開塞分寸皆如詔條有秋之期投鍤前定孺直告已事君率其寮躬勞俸之丞徒謹呼奮襜襖而舞咸

曰吞恨六十年明府雪之摘姦犯豪卒就施爲嗚呼成功之難也如是請名渠曰劉公而名堰曰彭城按服引而東千七百步其廣四尋而深中之兩涯夾植杞柳萬本下垂根以作固上生材以備用仍歲旱沴而渠下田獨有秋渠成之明年涇陽三原二邑中又攤其衝爲七堰以折水勢使下流不厚君詣京兆索言之府命從事蘇持至水濱畫撤不當攤者繇是邑人享其長利生子以劉名之君諱仁節字行輿彭城人武德名臣刑部尚書德威之五代孫大曆中詩人商之猶子少時好文學亦以籌畫干東諸侯遂參幕府歷尹劇縣皆以能事見陟率不時而遷既有績于高陵轉昭應令俄兼檢校水曹外郎充渠堰副使且錫朱衣銀章計相愛其能表爲檢校屯田郎中兼侍御史幹池監于蒲錫紫衣金章歲餘以課就如司勳正郎中執法理人爲循吏理財爲能臣一出於清白故也先是高陵人蒙彼惠風而

惜於捨去發于胃懷播爲聲詩今采其旨而變其詞志于石文
曰
噫涇水之逶迤溉我公兮及我私水無心兮人多僻銅上游兮
乾我澤時逢理兮官得財墨綬紫兮劉君來能愛人兮恤其隱
心既公兮言既盡縣申府兮府聞天積憤刷兮沈疴痊劃新渠
兮百畝流行龍蛇兮止膏油遵水式兮復田制無荒區兮有良
歲嗟劉君兮去翱翔遺我福兮牽我腸紀成功兮鑄美石永信
詞兮昭懿績

唐故朝議郎守尚書吏部侍郎上柱國賜紫金魚袋贈
司空奚公神道碑

嗚呼有唐清臣尚書吏部侍郎奚公貞元十五年十月甲子薨
于位詔贈禮部尚書太常考行謚曰某是歲臘月丁酉葬于萬
年縣之某原後三十有四年子爲諸侯爲大夫門戶有輝于是

門下生琢石紀德揭于我阡云公諱陟字殷衡其先在夏爲車
正以功封于薛下古以降爲譙郡人或因仕適楚復之秦今爲
京兆人隋唐之際再世以明經爲博士家有賜書曾祖簡亦以
文學爲太子司議郎大父乾繹仕至光州刺史烈考諱某有道
而尚晦終徐州司功參軍贈和州刺史由子貴也天以大運生
萬物而以正氣鍾賢人至和來宅其德乃具公實有焉幼而擢
陵茗之秀長而成清廟之器羣倫月旦咸以第一流處之及從
鄉賦暨升名太常果居上第明年詔郡國徵賢良設四科以盡
材公居文詞清麗之日授弘文館校書郎時德宗新即位聲懼
虜庭西戎畏威宸貢內附詔諫議大夫崔河圖持節即虜帳以
報之使臣欲盛其賓寮以自大遂嘿表公爲介換大理評事除
書到門公方爲人子不敢許緜遠稱病弗果行歸寧壽春養志
盡敬丞相揚炎勇于用才擢公爲左拾遺奉安輿而西未幾再

集荼蓼居後喪將闋是歲建中四年京師急變黃屋順動狩于巴梁公徒行間道以歸王所既中月而詔授起居郎充翰林學士創鉅愈遲病不拜職改太子司議郎從大駕回入尚書爲司金元士且叅推筦之務有頃特愍冊宣恩于薊門將行錫銀朱于青蒲上復命稱旨轉吏部外郎是曹在南宮爲着目在選士爲司命公執直筆閱簿書紛拏盤錯一瞬而剖時文昌缺左右丞都曹差重遂轉左司郎中尋遷中書舍人執事者繫公識精以斟酌大政非獨用文飾也會江淮間民被水禍上愍焉特命公宣撫之請以便宜及物赤車所至如東風變枯條其利病復奏咸可轉刑部侍郎時主計臣延齡以險刻貴倖而與京兆尹相惡以危事中之尹坐譴已又逮繫其吏峻絕之事下司寇主奏議者欲文致而甘心焉公侃然持平挫彼嶽嶽君子聞之善其知道不私刑曹既清以餘刃兼領選事居一年授權知吏部

侍郎又一年即真是秩言能審官者本朝有裴馬盧李四君子物論以公媿焉時得疾發癰有國醫方直禁中上促遣如策且教之曰某賢臣也悉術以治之及有司以不起聞上震悼加策公娶琅邪王氏石泉公之曾孫友婿皆一時考士長子某蚤不祿第二子敬則歷太僕少卿今爲濮州刺史兼御史中丞錫金紫以課最就如貴秩俾視九卿第三子敬玄以詞苑似續登文科歷左補闕今爲尚書刑部郎中第四子昊舉進士最小子某咸砥礪纂脩宜爲名公家子其邁德垂裕之光也乎公少以名器自任及顯達急于推賢視其所舉則在西省荐權丞相由左史掌訓詞在中銓表揚僕射由地曹郎綜吏部二公後爲天下偉人凡執文章權衡以揣量多士一入中禁考策詞三在天官第章句披沙剖璞由我而顯者落落然居多推是風鑿移于大台則鎔範之內無非祥金嗟乎天不遐其福而孤民望使由庚

之什不作于貞元中惜也初公既考終詔贈大宗伯後以第三子在即位被霑澤再追褒至司空故昔之葬儀用常伯而今之碑制用三公云銘曰
仁麟智龍為瑞一辰未若君子瑞于人倫惟唐德宗道類漢宣責實繩下風稜言言公丁斯時籍在雋賢從難表節執羈而還帝曰汝器黃流瑟然可為大僚左右化源乃飾王度乃馳輜軒既執刑柄亦操利權陽和煦煦貯在顏間守法持正嶷如秋山火不侵玉倖臣畏伏鳳鳴祥烟裊噪低跼帝方倚用天不假年公寤無寤其名愈遠門人達者赤舄玄袞公居甚卑其德愈尊兩子朝服駢驅朱輪佳城何在曹貴之里螭首龜趺德輝是紀嗚呼後人下拜于此

劉賓客文集卷第二

劉賓客文集卷第三 碑中

唐故福建都團練觀察使薛公神道碑

許州文宣王新廟碑

唐故兼御史中丞贈太師崔公神道碑

唐故宣歙池都團練觀察使王公神道碑

唐故邠寧節度使史公神道碑

唐故福建等州都團練觀察處置使福州刺史兼侍御史中丞贈左散騎常侍薛公神道碑

薛在三代為侯國介于鄒魯間傳世三十有一為齊所并其公子奔楚錫土田于沛漢末避仇之成都曹魏平蜀徙家汾陰遂為河東臨晉人自奚仲為夏車服大夫距今數千年乘軒服冕舄奕冠世言氏族者署為關內甲姓天意若曰始有功于車服錫爾子孫世世有之公諱審字某曾祖寶胤以名家子且有學

行歷尚書郎雍州司馬邠州刺史王父繪有雋材刺三郡金帛
繇皆以治聞累贈至銀青光祿大夫封龍門侯烈考承矩以文
亡害仕至大理丞公幼承前人之覆露補崇文生歲滿得調主
簿書于毫之譙苦二邑又尉于東畿之河清貞元中上方與丞
相調兵食思得通吏治而習邊事者計相以公爲對乃授監察
御史裏行充京兆水運使局居雁門主穀糴具舟楫募勇壯且
便弓矢者爲榜夫千有餘人隸尺籍伍符制如舟師語以中貴
入護之聲震塞上每發粟泝河北行涉戎落以饋緣邊諸軍及
乘障者雖河塞回遠必克期如合符一歲中省費萬計累加侍
御史內供奉賜緋魚袋有司條白其勞入拜殿中內史未幾淮
海節將以戎倖缺聞事下丞相御史擇可者僉曰公政事已試
遂授檢校戶部外郎兼御史淮南軍司馬尋轉駕部郎中錫以
金紫遇府遷申命真相趙國公帶中書侍郎代之公主行臺留

務趙公文茵及境視置郵供帳及郊視將迎部伍下車視簾幃
器條乃曰信奇才也此不足以展驥朝廷知之擢爲泗濱守既
報政就如御史中丞俄遷福建都團練觀察使閩有負海之饒
其民悍而俗鬼居洞砦音寨家桴筏者與華言不通公兼戎索以
治之五州民咸說元和十年某月某日薨于位年六十七贈左
散騎常侍夫人趙郡李氏無兒蚤世繼夫人隴西李氏檢校禮
部尚書河東節度使說之女生子凝爲嗣季子茂弘以諸侯禮
儀返葬故里蛾眉原從周也後二十有三年元曰開成凝爲平
盧從事謹按甲令壻碑石來乞詞以垂于悠久初公治粟于朔
陲愚方冠惠文冠察行馬外事聆風相厚謂可妻也以元女歸
之明年愚入尚書爲郎職隸計司因白計相召公來會府行有
日矣遇內禪惟新愚以緣坐左貶間關外役竟不克面然而公
之德善灌汪心耳孝悌爲根抵誠明技業之直方爲天質禮讓

緣飾之所至藹然繇此道也公初下世故人丞相李太師誌其墓其略曰弘深莊重翰敏絕人此與遊者傳信之詞也豈誣也哉故作銘曰

河汾滄淪昂氣歎雲散爲昌光凝爲賢人常侍之生其宗孔碩從祖昆弟詵詵三百文館入仕幽龍未光尺木爲階欬然歛翮司會知材績宣朔方邊師萬喉俟我羸糧泝于黃河路出戎疆募乃勇士早衣挽航膺索臂孤穹廬在旁虜聞公名憚不敢攘安北以南列城相望率有儲峙皆成金湯入居殿中分巡輦下淮海軍大往爲司馬軍中之治可移諸民乃牧于泗乃廉于閩閩悍而翼夷風詭急思信綏之安然如蟄閩方不泚天奪其福公薨于寢玄頽以復天王廢朝贈之金貂莓莓晉原鬱矣中條大墓舊阡松楸蕭蕭笳鼓以歸德音孔昭

許州文宣王新廟碑

歲在丙辰元日開成許州牧尚書杜公作文宣王廟暨學舍于允隅革故而鼎新也前年公受社與鉞且董淮陽汝南之師八月上下釋菜于宣父之室陋宇荒階不足回旋已事而歎乃詢黃髮有鄉先生前致辭曰自盜起幽陵許爲兵衝連戰交猝卒無寧歲耳說鉦鼓不聞弦歌目不知書不害爲智尔來生聚教養起居祖習壹出於軍容今幸天子憐許民爲擇賢侯此人人思治之時也公曰諾吾當先後之于是元年修戎津以通衆志次年成郡政以蠲民瘼季年崇教本以厚民風我言既從乃卜新宮漢水之瀕城池在東登登其梓坎坎其斧繩之墨之鑿枘枝格載暨載塗黜焉陵虛寢廟弘敞齋宮嚴闕軒墀廡儼推清潔門庭墻仞望之生敬外飾觚稜中設黼曜向明當宇用王禮也堯頭禹身華冠象佩之容取之自鄒魯及門觀真偶形畫像之儀取之自太學尊彝蓬豆青黃規矩之器秉周禮也犧牲

制幣薦獻陞降之節遵國章也藏經于重檐歛器于度檣講筵有位鼓篋有室授經有博士督課有助教指蹤有役夫灑掃有廟幹公又割隙地爲廣圃蔣其柔蔬而常菹昔蓄之禦備捨已俸爲子錢推其孳贏而鹽酪缸膏之用給濟濟莘莘化行風驅家慕恭儉戶知敬讓父誨其子兄規其弟不遊學堂與捷市同由是縻勇鬻戴鷄冠者往往拜雄姿而觀習禮矜甲冑者知根于忠信服縵胡者不敢侮逢掖教化之移人也如置郵焉冬十一月許人以新儒宮成來告且乞詞欲行乎遠也公名懷字永裕故丞相岐國公之孫岐公弼諧二帝碩學冠天下嘗著書二百餘篇言禮樂刑政古今損益統名曰通典藏在石室副行人間今孝孫聿脩之形乎事業播于聲詩懿哉能世其家也禹錫昔年忝岐公門下生四叅公府近年收汝州道許昌躬閱其政故不得讓遂銘于麗牲之碑銘曰

許介韓魏四征之地兵興已還其闕頽頽亦有儒宮軋于兵間賢侯戾止思樂泮水俾人嚮學王化之始便地爰相新規蔚起廟貌斯嚴堂煌有燁秩秩禮物祁祁胄子入于門墻如造闕里春誦夏絃載颺泝聲風于閭闔決于郊垌途讓班白家尊父兄與化而遷其猶性成昔之委巷相詬交侮今逢親戚不道媒語昔之連營誇力使酒今遇賓客歛容拱手魯有泮林烏莘其音許崇學校民說其教鐫于圭石以志新廟

唐故朝散大夫檢校尚書吏部郎中兼御史中丞賜紫
金魚袋清河縣開國男贈太師崔公神道碑

太師名儒字某清河東武城人太公望既封于營丘子伋嗣侯伋之孫曰穆伯食邑于崔遂以爲氏後十四世至秦末東萊侯意如東萊之子伯基始居清河又十五葉生琰爲魏名臣又九葉生休仕後魏爲七兵尚書七兵之弟曰寅爲梁安太宗公即

樂安八代孫始以門子補鄭州參軍力行好學于子道以孝聞
處伯仲間以友聞讀易至編絕以精義聞至德中戎羯滑夏王
師出征公有少奇志思因時以自奮乃作伐鯨鯢賦上獻既聞
尔矣果器之會第五丞相以善言利得幸盡付利權始有鹽鐵
使之目慎選寮屬表公爲介轉臨晉縣丞處繁庶卒銳刃不頓
府罷再遷至太子司議郎韓晉公時爲戶部侍郎掌邦賦急於
用材薦公爲監察御史主河東租庸之務尋轉侍御史充京東
平糴使建中初德宗始親萬機儲精治本有漢宣與我共理之
歎謂大臣求可當良二千石者遂以公帶本官權知袁州刺史
期月有成詔書顯揚就加真秩益以金紫居無何韓晉公爲丞
相制國用思公前績乃傳召之抵京師授檢校戶部郎中兼侍
御史幹池監于蒲脩牢盆謹衡石煎和既精飴散乃盈商通而
薦至吏懼而循法民不絀網而國用益饒歲杪會其所入羸羨

什百詔下褒其能轉吏部正郎兼御史中丞且加五等之爵方
倚以重任天富其材而不返其福享齡六十有五貞元七年某
月某日遘疾終于治所上聞悼之因降愍冊贈鄭州刺史賚錢
三百萬以備飾終之禮明年某月某日返葬于成周之偃師從
世墓也累贈至太師夫人隴西李氏汾州司倉參軍咸一之女
生才子六人長曰郊及公卒時已爲左拾遺後至太常次曰鄭
至太府鄉次曰鄆至外臺尚書次曰郇今爲廷尉次曰鄆至執
金吾季曰鄆今爲太常卿同中書門下平章事惟夫人姑臧冠
族以蘋蘩組紉輔佐君子爲令妻積三十餘年以慈儉忠厚訓
誡諸子爲賢母二十有三年當永貞初順宗踐祚澤流自葉長
子郊時爲詞臣草冊書以文當進階遂上疏乞移榮於親優詔
允之特封清河郡太君士林聳慕皆自痛其不及郊爲太常鄆
爲大農咸白髮貴綬以奉膳脩諸季各以簪裾給事左右愉愉

然先意無違言世榮者舉無與比以子貴累封贈至涼國太夫人元和八年三月十六日捐館舍壽七十有九是歲十月某日合祔惟太常及尚書暨今相國皆自中書舍人爲禮部侍郎凡五貢賢能書得士百四十有八人言兄弟者許爲人瑞崔氏之門六人皆入文昌宮其間三人歷八侍郎統而論之三大卿兩連率二翰林學士一執金吾言冠冕者許爲世雄與姑臧李訔陽廬世爲婚媾入于姻黨無第二流言門閥者許爲時表太常二子亦以才能同入尚書璜爲吏部郎璿爲司勳郎其它支孫未登金閨籍者詵詵然魚貫而進文業甚似而孝謹不衰猗歟君子之澤其所從來遠而有光乎開成己未歲七月甲辰相君受詔于明庭始操國柄仲月奉嘗事于家禮成起慕悄然永懷曰古者卿大夫廟有鬯墓有碑皆銘之以紀先德也今脩位宰相敢不敬前人之耿光乃俾家老條白事功咨于學士者徵其

詞尚信也又命宗祝卜柔日告于廟盡誠也儀其脩而敬有餘斯所謂達禮之君子遂刊勒如式揭于道周銘曰

奕奕四姓崔爲之冠瞻其門牆倬若雲漢善積家肥子孫多材如彼榱棟必生徂徠太公之後彌二千祀炯如貫珠焯見圖史顯允太師丕承惠基構于其堂亦既墜茨生逢艱虞戎夏交師獻賦伐叛忠存乎詞兵與事叢飛輓四馳歷踐劇職視屯如夷乃至平糴乃分竹使治粟爲邦其道一致蒲實近地鹽爲利泓使車來思刻弊立程吏廉商通歲倍其贏奏課連最惠音褒明就如執法好爵兼縻天賦之才不與壽并生樹德本沒揚淑聲上聞軫懷俯樂爲停贈祿之禮俾于公卿萬石貽訓根于孝友太立種德乃稔身後家有令子妻爲壽母三十餘年人倫之首六子來侍如龍如虎衆婦來饋維筐及筥佩玉鳴環交響庭戶申申秩秩歡不踰矩昔爲甲族今爲興門天爵人爵蔚然兩尊

先德陰之黷如重雲厚和合粹濯潤本根景毫之原圖書之川
陽陵帝壇旁磚回環世安其神世嗣其賢聆德風者拜于碑前
唐故宣歙池等州都團練觀察處置使宣州刺史兼御
史中丞贈左散騎常侍王公神道碑

常侍諱質字華鄉始得姓自周靈王太子晉賓天而仙時人曰
王子因去姬爲王氏自秦漢以還世多顯名由今而上十有一
代名傑仕元魏爲并州刺史子孫因家遂爲太原祁人并州六
代孫名通字仲淹在隋朝諸儒唯通能明王道隱居白牛谿遊
其門皆天下雋傑著書行於世既沒謚曰文中子文中生福祚
爲蔡州上蔡主簿上蔡生勉舉進士徽賢良皆上第仕至河中
府寶鼎令寶鼎即公之曾祖也祖諱怡渝州司戶叅軍考諱潛
揚州天長縣丞贈尚書吏部郎中公其季子也始文中先生有
重名於隋末其弟績亦以有道顯于國初自號東臯子文章高

逸傳乎人間議者謂况以文中立言弟游方外遂性二百年間
君子稱之雖四夷亦聞其名字公雅有遠志常自竹屐我大名
之後不宜無見焉遂力學厚自淬琢於春秋得其公是於禮得
之約僑居淝水上躬督播事善積於己而淮楚間羣考多與之
游公歎然自少無進取意與游者激之曰卿文儒家子篤志如
是盍求發聞去聲俾家聲不頽今夫以文學芒洋當世者誰如華
卿庸自棄邪入謀于閨門咸以外言爲是因決策而西上在貢
士籍天和內充不以時尚屑意角遂攻取初無此心如鞭抽生
于深林未始自貴而度材者一眄歆然在懷故以不爭而速售
既登第東諸侯交辟之從王者書記于嶺南授正字參謀于淮
右進協律郎其後佐許下暨梓潼南梁率爲上介官至兼察御
史司憲聞其賢徵入南臺轉殿內歷侍御史改尚書戶部員外
郎復爲知己所薦遷檢校司封郎中攝御史中丞紫衣金章充

山南西道節度副使入爲尚書戶部郎中以方雅特立除諫議大夫會宋丞相坐狷直爲飛語所陷抱不測之罪大僚進言無益公率諫官數輩日晏伏閣上爲不時開便殿公于旅進中獨感激雪涕居多由是上怒稍解得從輕比公終以言責爲憂求爲虢州刺史宰相惜去又重違誠請增之以兼御史中丞用示異于人也大凡以智謀而進者有時而衰以朴厚而知者無迹而固公雅爲今揚州牧贊皇公所知入不見其迹方在虢畧贊皇入相擢爲左曹給事中凡有大官缺必寵薦居數月遷河南尹又未幾鎮宛陵是三者中外所注意不旬歲而周歷之時論不以爲黨河南帝之別京其治尚休度風采而別白區處之宣城國之奧壤其治在束吏惠下蘇罷羸譽剽輕而勞徠澄汰之公兩得其道不由一檢率身以檢而素風存任人以誠而羣務舉遇中貴人以禮而故態華內潔其志下盡其忠外無以撓于

理三者具求改之有裨曷由哉在鎮三載開成元年十二月八日薨于位享年六十三監軍使上言有詔軫悼不視朝贈左散騎常侍明年八月十一日葬于河南府永寧縣洛川鄉史原從舊阡也初公娶于滎陽鄭氏生三女而沒今蓋祔焉一子曰慶存方亂矣猶子前太原府參軍扶執宗長書來請曰扶也蚤孤荷世父常侍之覆露今其嗣幼未任克家姑封琴書司管鑰以俟其長竊懼世父之德音不敬思有以垂于後者以誠告于從叔大司農復命曰俞謹礱貞石以乞詞無忽余昔爲郎與常侍同列已熟其行實及讀墓誌即今丞相益州牧趙郡李公之文自稱爲忘形友其在宣州李公再入相議以第一官處之牢讓不取羔雁所禮則河東裴夷直天水趙普隴西李行方吳郡陸紹梁國劉蕢博陵崔珣人咸曰得士夫揚州少與也而見器益州寡合也而見親六從事材不一也而畢樂用是足以觀德庸

可勿紀焉銘曰

隋有文中紹敷微言當時偉人咸出其門粹氣紆餘鍾于後昆
常侍恂恂文中来孫發原高麓中詠後大蘭茅茁然秀出叢蒼
善不近名其聲日彰行勇于退其道愈光哲者知之寘于周行
以正持憲以文爲郎以和佐戎以惠臨邦以直司諫以公駁正
守于三川頑民底定乃鎮于宣先馳淋聲邑中娑娑瞻我旆旌
問誰詢謀濟濟君子問誰出內潔潔廉士道本乎心暢于四支
治本乎正形于百爲黜吏歛手齊民揚暑江淮藪室夜柝弗施
公卧于齋邦民悽悽公衣升屋邦民行哭牙璋斯來柳翼言旋
棠樹未老周人慕焉熊耳之陽泱泱洛川佳城在茲既固且安
松楸聽然石馬矯然過者必敬宛陵之阡

唐故邠寧慶等州節度觀察處置使朝散大夫檢校戶
部尚書兼御史大夫賜紫金魚袋贈右僕射史公神道

碑

僕射名孝章字德仁本地方之強世雄翔野其後因仕中國遂
爲靈武建康人曾祖道德贈右散騎常侍封懷澤郡王祖周洛
銀青光祿大夫檢校太常卿兼御史中丞北海郡王贈太子太
保考憲蚤成以武勇絕人積功至魏博節度使終于河中晉絳
慈隰等州節度觀察使檢校司徒兼侍中河中尹贈太保其薨
也大臣中書令晉國公裴氏爲之碑其名益顯公即侍中之元
子母曰冀國夫人李氏幼而聰寤父母賢而加愛焉及長好學
遷善秀出儕輩鄴下諸兒號爲書生元和中太尉愬爲魏帥下
令掄材於轅門取大將家翹秀者爲子弟軍列于諸校之上公
獨昌言願效文職太尉深奇之遂假魏州大都督府參軍長慶
三年常山衆叛害其帥沂國公田司徒于帳下沂公發迹于魏
人猶懷之詔命其子布以尚書授鉞統魏兵問罪于此疆且報

家禍布既啓行。士氣不振。渙然內潰。獨與冗從之旅。偃旗而歸。百憤攻中。卒自引決。先侍中時爲中軍都知兵馬使。兼御史中丞。全師在野。閔然推戴之。請爲假侯。以鎮定中。貴人飛駟上聞。穆宗夜召翰林學士草詔書。以真侯命之。實有魏土從衆而合。權也。是歲。公自攝官轉本府士曹參軍。兼監察御史。賜朱衣銀印。推恩以及子也。一旦跪于父母前進。苦言曰。臣竊惟大河之北。地雄兵精。而天下賢士心侮之。目曰河朔間。視猶夷狄。何也。蓋有土者多乘兵機際會。非以義取。今臣家父侯母封。化爲貴門。君恩至矣。非痛折節礪行。彰信于朝廷。無以弭讖者之譏。寤明君之意。鄙著于外。福延于家。乘時蹈機。禍不旋踵。言訖泣下。教行。父俞母贊。天性交感。三心既叶。萬衆潛化。天子聞而嘉之。曰。彼真有子。乃授檢校太子左諭德。兼侍御史。充節度副使。累遷至散騎常侍。兼御史大夫。賜金印紫綬。既貳軍政事。如命。鄉

弛張損益。得以參決。潛革故態。人知嚮方。大和二年。滄景節度使李全略卒。其子同揆竊據故地。詔下。以文告弗革。遂用大刑。先侍中表請。率先諸侯。使元子以督戰。制曰。可。公承君父之命。乃捐其軀。一舉而下平原。壓滄壘。由是加工部尚書。及王師凱旋。上表。願一識承明廬。詔允之。遂赴北闕下。得覲於便殿。上曰。嚮吾始討滄州。議者皆曰。彼魏之姻也。慮陰爲寇謀。吾發使數輩以偵之。其還也。僉曰。尔父瀝款於賓筵。尔母抗詞于簾下。願絕姻以立效。其經始啓發。出於尔心。今滄海底平。策勲之日。宜貴尔三族。命尔父爲侍中。遷鎮于近地。加尔禮部尚書。析相衛壇三州爲額。以居之。但尔一門大榮。以誇天下。公拜稽首謝。父遷讓已爵。禮無違者。翌日。詔下于明庭。人咸曰。史氏之寵光世。無有也。牙旗碧幢。方指東道。侍中以帳下生變聞。泰極而否。當歌而哭。迎柩于路。仰天長號。因葬于洛陽之邙山。冀國夫人附。

馬寢苦枕塊以所仇同天爲大酷未幾詔舉金革之義起爲右
金吾將軍累表陳乞有司以違命督之輿疾即路間歲擢授鄜
坊丹延等州節度觀察處置等使居四年遷鎮于滑一歲入爲
左領軍衛大將軍旋改右金吾大將軍又授鉞于邠上孟秋至
治所首冬邁疾拜章入覲不克展和鸞條革之儀薨于靖恭里
之私第享年三十有九當開成三年十月二十日上聞而悼之
不視朝一日贈尚書右僕射明年二月歸葬于洛都夫人琅邪
王氏祔焉繼室深澤縣君博陵崔氏有一子曰煥生七年而孤
僕射之喪自復魄至奠當門戶備祭祀建碑表昏縣君之能且
命其家老其事功表請曰娶不恤家而憂幼嗣不知其先人之
官業乞詞以傳于後也君子以爲知禮謹書之銘曰
斗杓之下崆峒播氣鍾于侍中孔武且貴奉上致命宜昌後嗣
僕射承之良弓不墜耳頰鈺鼓心說文字虎穴之中生此麒麟

大和紀无滄景不處子弄父兵跳踉海孺有鄰陰交蝟起雞連
詔下薄伐良隅駭然時維侍中實統魏師蓄銳未發衆心危疑
僕射爲子陳謀盡詞興言涕零有感尊慈絕姻効勛精貫神祇
滄波底寧王師褒之乃還元侯來鎮近畿乃昨元子別建旌麾
一門四鄰焜耀當時倏忽變生魏郊紛披喬木雖大盲風不知
干雲之臺列缺焚之哀哀孝嗣丁此大酷迎護幃幃葬于東洛
訴天觸地血染練服禮有金革詔書敦促不遂枕戈驟膺推轂
雕陰白馬暨于邠谷雖崇三鎮不荷百祿綺紈之間珪組纍纍
如彼晨葩日中而萎有妻名家有子擇齒行號執禮歸窆蒿里
洛水之陽循印之趾昭尊穆敬幽顯同理舊松新栢亦象橋梓
刻石紀功垂千萬紀

劉賓客文集卷第四 碑下

釋門銘記附

曹溪第六祖大鑿禪師第二碑

佛衣銘 并引

唐故衡嶽律大師湘潭唐興寺儼公碑

牛頭山第一祖融大師新塔記

袁州萍鄉縣楊岐山故廣禪師碑

夔州始興寺移鐵像記

毗盧遮那佛華藏世界圖讚

成都府新修福成寺記

大唐曹溪第六祖大鑿禪師第二碑

元和十一年某月日詔書追褒曹溪第六祖能公謚曰大鑿實廣州牧馬總以疏聞由是可其奏尚道以尊名同歸善善不隔異教一字之褒華夷孔懷得其所故也馬公敬其事且護始以

垂後遂咨于文雄今柳州刺史河東柳君爲前碑後三年有僧道琳率以其徒由曹溪來且曰願立第二碑學者志也維如來滅後中五百歲而摩騰竺法蘭以經來華人始聞其言猶夫重昏之見習爽後五百歲而達摩以法來華人始傳其心猶夫珠且之覩白日自達摩六傳至大鑿如貫意珠有先後而無同異世之言真宗者所謂頓門初達摩與佛衣俱來得道傳付以爲真印至大鑿置而不傳豈以是爲筌蹄邪芻狗邪將人人之莫已若而不若置之邪吾不得而知也按大鑿生新州三十出家四十七年而沒百有六年而謚始自蘄之東山從第五師得授記以歸高宗使中貴人再徵不奉詔第以言爲貢上敬行之銘曰

至人之生無有種類同人者形出入者智蠢蠢南喬降生傑異父乾母坤獨肖元氣一言頓悟不踐初地五師相承授以寶器

宴坐曹溪世號南宗學徒爰來如水之東飲以妙藥差其瘖聾詔不能致許爲法雄去佛日遠羣言積億著空執有各走其域我立真筌揭起南國無脩而脩無得而得能使學者還其天識如黑而迷仰見斗極得之自然竟不可傳口傳手付則礙於有留衣空堂得者天授

佛衣銘并引

吾旣爲僧琳撰曹溪第二碑且思所以辨六祖置衣不傳之旨作佛衣銘曰

佛言不行佛衣乃爭忽近貴遠古今常情尼父之生土無一里夢奠之後獲存予祀惟昔有梁如象之狂達摩勸世來爲醫玉以言不瘞因物乃瘞如執符節行乎復關民不知官望車而畏俗不知佛得衣爲貴壞色之衣道不在茲由之信道所以爲寶六祖未彰其出也微旣還狼荒憬俗啾啾不有信器衆生曷歸

是開便門非止傳衣初必有終傳豈無已物必歸盡衣胡久恃先終知終用乃不窮我道無朽衣于何有其用已陳孰非芻狗

唐故衡嶽大師湘潭唐興寺儼公碑

佛法在九州間隨其方而化中夏之人汨于榮破榮莫若妙覺故言禪寂者宗嵩山北方之人銳以武攝武莫若示現故言神通者宗清涼山南方之人剽而輕制輕莫若威儀故言律藏者宗衡山是三名山為莊嚴國必有達者與山比崇南嶽律門以津公為上首津之後雲峰證公承之証之後湘潭儼公承之星月麗天珠璣同貫由其門者為正法焉公號智儼曹氏子世為彬之右姓兆形在孕母不嗜葷成童在侶獨不嗜戲其夙植因厚者歟生九年樂為僧父不能奪其志抱經筍入响唌山從名師執業凡進品受具聞經傳印皆當時大長老我入明門不徃諸乘我行覺路徑入智地居室方丈名聞大千護法大臣多所

賓禮嗣曹王臯之鎮湖南請為人師自是登壇蒞事山其後也分慈氏之一支為如來之別子咸有祖祿粲然貫珠大師號法融姓韋氏延陵人少為儒博極羣書既而歎曰此仁誼言耳吾志求出世間法遂入句曲依僧旻改縫掖而緇之徙居是山宴坐石室以惠力感通故早麓泉涌以神功示現故皓雪蓮生巨蛇摧伏羣鹿聽法貞觀中雙峰過江望牛頭頓錫曰此山有道氣宜有得之者乃來果與大師相遇性合神授至于無言同躋智地密付真印揭立江左名聞九圍學徒百千如水歸海由其門而為天人師者皆脉分焉顯慶二年報身示滅道在後覺神依故山戒香不絕龕坐未飾夫豈不思乎蓋神期冥教必有所待大和三年濶州牧浙江西道觀察使檢校禮部尚書趙郡李公在鎮三閩百為大脩尚理信古儒玄交修始下令禁桑門飯佛以眩人者而于真實相深達焉常謂大師像設宜從本教言

自我啓因自我成。乃召主吏籍我月入得緡錢二十萬。俾秣陵令如符經營之。三月甲子新塔成。事嚴而工人盡執誠達而山神來護。願力既從。衆心知歸。撞鐘告白龍像大會。諸天聲之香。蘊如見如聞。即生相敬。明幽同感。尚書欲傳信于後。遠命愚志之夫。上士解空而離相。中士著空而嫉有。不因相何以示覺。不由有何以悟無。彼達真諦而得中道者。當知爲而不有。賢乎以不脩爲無爲也。

袁州萍鄉縣楊岐山故廣禪師碑

天生人而不能使情欲有節。君牧人而不能去威勢以理至有。乘天工之隙以補其化。釋王者之位以遷其入。則素王立中區之教。懋建大中。慈民起西方之教。習登正覺。至哉乾坤定位有。聖人之道。參行乎其中。亦猶水火異氣成味也。同德輪轅異象。致遠也同功。然則儒以中道御羣生。罕言性命。故世衰而寢息。

佛以大悲救諸苦。廣啓因業。故劫濁而益尊。自白馬東來。而人知象教。佛衣始傳。而人知心法。弘以權實。示其攝脩。味真實者。即清淨以觀空。存相好者。佈威神而遷善。享于求者。植因以覲福。羅于苦者。證業以銷冤。革盜心于冥昧之間。泯愛緣于死生之際。陰助教化。總持人天。所謂生成之外。別有陶冶。政刑不及。曲爲調柔。其方可言。其旨不可得而言也。雖四海之大。羣倫之富。必有以得其門。而會其宗者。爲世導師焉。禪師諱乘廣。其生容州。姓張氏。七歲尚儒。以俎豆爲戲。十三慕道。遵壞削之儀。至衡陽。依天柱想公。以啓初地。至洛陽。依荷澤會公。以契真乘。決鐘蘊聲。扣之斯應。陽燄含焰。晞之乃明。始由見性。終得自在。常謂機有淺深。法無高下。分二宗者。衆生存頓漸之見。說三乘者。如來開方便之門。名自外得。放生分別。道由內證。則無異同。遂以攝化爲心。經行不倦。愍彼南裔。不聞佛經。由是結廬此山。心

與境寂。應念以起教。隨方而立。因居涉旬。而善根者知歸。逮周
月。而帶縛者漸悟。以月倍日。以年倍時。瘖聵洞開。荒憬潛革。邑
中長者十方善衆。咸發信願。大其藩垣。法堂四阿。股引僧舍。身
心恒寂。象馬交馳。墮其去來。皆得利益。踰嶺之北。涉湘而南。仰
茲高山。知道有所在。此地緣盡。脩然化俱。神歸佛境。悲結人世。
自跌坐而滅。至于茶毗。三百有六旬矣。爪髮如長。容澤差衰。真
子號呼。圍繞薪火。得舍利如珠璣者數十百焉。於戲。宵圓方之
形。故寂滅以不盡。入菩提之位。故殊相以現靈。亦猶鳳毛成字。
麟角生肉。必有以異。不知其然。於是服勤聞法之上。首曰甄升。
乃率其徒。圓寂道弘。如亮。如海等。相與拔淚。具役建塔於禪室
之右端。從衆也。初廣公始生之辰。歲在丁巳。當玄宗之中元。生
三十。而受其更臘。五十二而終。終之夕。歲直戊寅。當德宗之後
元三月。既望之。又十日也。後九年。其門人還源。以爲崇塔以存。

神與建銘以垂休。皆憑像寄懷。不可以闕一。謬謂余爲習于文
者。故蠱足千里。以誠相攻。大懼其先師德音與時寢遠。且曰白
月中黑。東川無還。颺于金石。傳信百劫。被墮淚之感。豈儒家者
流專之。敬酬斯言。銘示真俗。文曰。
如來說法。徧滿大千。得勝義者。強名爲禪。至道不二。至言無辯。
心法東行。羣迷丕變。七葉無嗣。四魔潛扇。佛衣生塵。佛法如線。
吾師覺者。冥極道樞。承受密印。端如貫珠。一室寥然。高山之隅。
爲法來者。千百人俱。裔民啾啾。戶有犀渠。攝以方便。家藏佛書。
願力既普。度門斯盛。合爲一乘。散爲萬行。即動求靜。故能常定。
絕緣離覺。乃得究竟。生非我樂。死非我病。現滅者身。常圓者性。
本無言說。付屬其誰。等空無得。後覺得之。像闕虛塔。迹留仁祠。
十方四輩。瞻禮於斯。

佛薪盡于乾竺而象教東行。是法平等。故所至為淨土。是身應
供。故隨念如降生。先是魚復人有以利金為弥勒像者。重千鈞。
眸容瑞相。人天兩足。晁氏卒事而它工未備。故寓于西偏。不知
其幾年矣。寺僧法照。瞻禮發信。赤肩白足。入諸大城。乃至聚落。
無空過者。積十餘年。得信財無量。由是購工。以嘗巧募徒。而畢
力四輩。增增工。麾以肱中。樞外脉。陰轉陰動。凝如地湧。岌如山
行。大象無言。尊容嚮明。青蓮承趺。金獸捧持。藻并花鬘。葱蘢四
垂。邑人膜拜。如佛出世。法照以願力能就。泣于佛前。因持片石
乞詞。以示後。按此寺始于宇文周初。瀕江埤。瘁皇唐神龍中。為
水所壞。有波那頽耶國僧廣照。浮海而至。頓錫不去。遂移于今
道場所。山曰磨刀。嶺曰虎岡。其經始與克脩。皆著僧是。力後之
有志者。豈無人哉。法照夔人。姓穆氏。年十有五出家。依江陵名
僧受具。肇自貞元二十年甲申。歸此寺。願崇建有為。凡脩大殿

立菩薩大弟子侍佛左右。逮長慶癸卯有成。其善植德本者歟。

毗盧遮那佛華藏世界圖讚

佛說華嚴經。直入妙覺。不出諸乘。非大圓智。不能信解。德宗朝
有龍象觀公。能于是經了第一義。居上都雲華寺。名聞十方。沙
門嗣肇。是其上足。以經中九會。纂成華藏。俾人瞻禮。即色生敬。
因請余讚之。即說讚曰。
清淨不染。花中蓮。捧持世界。百億千湧。出香海。浩無邊。風輪負
之。晝夜旋。大雄九會。化諸天。釋梵八部。來森然。從昏至覺。不依
緣。初初極。極性自圓。寫之絹。素色相全。是色非色。言非言。

成都府新脩福成寺記

益城右門街。大達坦然。西馳曰石爭街。街之北。有仁祠形焉。直
啓曰福成寺。寺之殿臺。與城之樓。交錯相輝。繡于碧霄。望之如
崑閬間物。大和四年。蜀帥非將材。不脩邊備。南詔君長。謀得內

空乘隙空入闕于城下或縱火以駭衆此寺乃焚高門脩廊委
爲寒燼如是者再歲帝念坤維丞相復來山川如迎父老相識
環視故地寺爲樵墟載興起廢之歎爰有植因之願乃命主俸
吏以吾緡錢三十萬爲經營之基自公來思蜀號無事時康歲
稔人樂擅施公言旣先應如決川乃頌囊褚乃出懷袖勝因化
愚慧力攝慳男奔女驟急於徵令匠者度材以指衆徒藝者運
思以後衆技斤鋸磨礮丁丁登登陶者儲精巧者效能歎自大
宅復爲金繩浴故鼎新因毀成妍華夷縱觀萬目同聳旣告訖
後公來慶成雲鮮日潤輝映前後於是都人舞抃而謠曰
昔公去此福成以燬今公重還福成復完民安軍治亦如此寺
庸可勿紀乎公實聞斯言遂折簡見命謹月而日之時大和某
年某月日大檀越具官封爵段氏其他發大願者程功董事者
自中貴人及賓寮將吏若僧徒僭籍之而刻于石

劉賓客文集卷第五 論上

辯迹論一首

明贄論一首

華陀論一首

天論上一首

天論中一首

天論下一首

辯迹論一首

客有能通本朝之雅故者曰時之汚崇視輔臣之用否房與杜
迹何觀焉建官取士之制地征口賦之令禮樂刑法之章因隋
而已矣二公奚施焉余愀然曰三王之道猶夫循還非必變爲
審所當勅而已隋之過豈制置名教之間邪顧名與事乖耳因
之何害焉夫上材之道非務所舉必的然可使戶曉爲迹也吾
觀梁公之迹章章如懸寓矣曷然哉請借一以明之史不云乎
初太宗怒渾戎之橫于塞也度諸將不足以必取當宁而歎曰
得李靖爲帥快哉靖時告老且病矣梁公虛其心以起之靖忘
老與病一舉虜其君都縣其地而還夫非滅國之難能起靖之

難能也靖非不克之為慮居功之為慮也古之為將度柄輕不足以遂事重則嫌生焉是以有辭第以見志有多產以取信有子質以滅貳有嬖監以虞謗其多患也如是若靖者名既成位既崇重失畏備其患又甚焉微梁公之能盡材能捍患能去忌能照私被姑藉舊勞居素貴足矣惡乎起哉夫豈感室言而起邪心相見久矣夫豈備小信而要邪道相籠久矣其後敬玄擅能去材臣而敗隨之林甫自便進蕃將而亂隨之由是而言固相萬矣子方規規然窺上材以戶曉之迹此吾之所不取也若杜萊公者在相位日淺將史失其傳然以梁公之鑒裁自天策府遂以王佐材許之則是又能以道籠房公者矣房之許與迹孰甚焉客無以應而作子劉子曰觀書者當觀其意慕賢者當慕其心循迹而求雖博寡要信矣

明賢論

古之人動必有以將意故贊之道自天子達焉夫芬芳在上臭達于下而溫粹無擇有似乎聖人者聖也故用於天子清越而瑕不自揜潔白而物莫能汚內堅剛而外溫潤有似乎君子者玉也故用手諸侯執之不鳴刑之不嗥似死義乳必能跪似知禮者羔也故卿執焉在人之上而有先後行列者雁也故大夫執焉耿介而一志者雉也故士執焉視其所執而知其任是故食愈重而志愈卑位弥尊而道弥廣耿介之志唯士得以行之何也務細而所試者寡齒卑而所蔽者衆言未足以動聽故必激發以取異行未足以應遠故必砥礪以沽聞借令由士為大夫捨雉而執雁其志也隨之故耿介之名不施於大夫矣况其上乎然則為士也不思雉之介為卿也能思羔之禮歟今夫或者不明分推理而觀之則曰此居下而嗜直是必得志而稔其計矣彼當介而務私者是必處高而肥其德矣曾不知訐當其

分則地易而自遷弘非其所則志遠而無制矣於戲責士以卿大夫之善猶諭君以士之行耳予以執賢之道得其分苟推分明矣求刑賞之僭濫得乎

華佗論

史稱華佗以恃能厭事為曹公所怒荀文若請曰佗術實工人命繫焉宜議能以宥曹公曰憂天下無此鼠輩邪遂考竟至死蒼舒病且死見賢通醫不能生始有悔之之歎嗟乎以操之明畧見幾然猶輕殺材能如是文若之智力地望以的然之理攻之然猶不能返其恚執柄者之恚真可畏諸亦可慎諸原夫史氏之書于冊也是使後之人寬能者之刑納賢者之論而懲暴者之輕殺故自恃能至有悔恚書焉後之或者復用是為口實悲哉夫賢能不能無過苟冥于理矣或必有寬之之請彼壬人皆日憂天下無材邪曾不知悔之日方痛材之不可多也或必

有惜之之歎彼壬人皆曰譬彼死矣將若何曾不知悔之日方痛生之不可再也可不謂大哀乎夫以佗之不宜殺昭昭然不待言也獨病夫史書之義是將推之而廣耳吾觀自曹魏以來執死生之柄者用一恚而殺材能衆矣又烏用書佗之事為嗚呼前事之不忘期有勸且懲也而暴者復藉口以快意孫權則曰曹孟德殺孔文舉矣孤于虞翻何如而孔融亦以應泰山殺孝廉自譬仲謀近霸者文舉有高名猶以可懲為故事矧他人哉

天說

柳宗元

韓愈謂柳子曰若知天之說乎吾為子言天之說今夫人有疾痛倦辱飢寒甚者因仰而呼天曰殘民者昌佑民者殃又仰而呼天曰何為使至此極戾也若是者舉不能知天夫果蔬飲食既壞虫生之人之血氣敗逆壅底為癰瘍疔贅癢痔虫生之木

朽而蝸中草腐而螢飛是豈不以壞而後出邪物壞虫由之生
元氣陰陽之壞人由之生虫之生而物益壞食齧之攻穴之虫
之禍物也滋甚其能去之者有功于物者也蕃而息之者物之
讎也人之壞元氣陰陽也亦滋甚墾原田伐山木鑿隄以餘
竅墓以送死而又冗為堰洩築為墻垣城郭臺榭觀游疏為川
瀆溝洫陂池燧木以燔革金以鑄陶甄琢磨悴然使天地萬物
不得其情倖倖衝衝攻殘敗撓而未嘗息其為禍元氣陰陽也
不甚於虫之所為乎吾意有能殘斯人使日薄歲削禍元氣陰
陽者滋少是有則功於天地者也蕃而息之者天地之讎也今
夫人舉不能知天故為是呼且怨也吾意天聞其呼且怨則有
功者受賞必大矣其禍焉者受罰亦大矣子以吾言為何如柳
子曰子誠有激而為是邪則信辯且美矣吾能終其說彼上而
玄者世謂之天下而黃者世謂之地渾然而中處者世謂之元
氣寒而暑者世謂之陰陽是雖大無異果蠃癰痔草木也假而
有能去其攻穴者是物也其能有報乎蕃而息之者其能有怨
乎天地大果蠃也元氣大癰痔也陰陽大草木也其為能賞功
而罰禍乎功者自功禍者自禍欲望其賞罰者大謬呼而怨欲
望其哀且仁者愈大謬子而信子之仁義以遊其內生而死耳
烏置存亡得喪於果蠃癰痔草木邪

天論上

世之言天者二道焉拘于昭昭者則曰天與人實影響禍必以
罪降福必以善俸窮阨而呼必可聞隱痛而祈必可荅如有物
的然以宰者故陰陽之說勝焉泥于冥冥者則曰天與人實刺
棘音異震震于畜木未嘗在罪春滋乎堇荼未嘗擇善蹈躄焉而
遂孔顏焉而厄是茫乎無有宰者故自然之說勝焉余之友河
東解人柳子厚作天說以折韓退之之言文信美矣蓋有激而

云非所以盡天人之際故余作天論以極其辯云大凡入形器者皆有能有不能天有形之大者也人動物之尤者也天之能人固不能也人之能天亦有所不能也故余曰天與人交相勝耳其說曰天之道在生植其用在強弱人之道在法制其用在是非陽而享生陰而肅殺水火傷物木堅金利壯而武健老而耗耗氣雄相君力雄相長天之能也陽而執樹陰而擊斂防害用濡禁焚用光斬材竅堅液礦礪懿義制強計禮分長幼右賢尚功建極開邪人之能也人能勝乎天者法也法大行則是為公是非為公非天下之人蹈道必賞違之必罰當其賞雖三旌之貴萬鍾之祿處之咸曰宜何也為善而然也當其罰雖族屬之夷刀鋸之慘處之咸曰宜何也為惡而然也故其人曰天何預乃事邪唯告虔報本肆類授時之禮曰天而已矣福兮可以善取禍兮可以惡召矣預乎天邪法小弛則是非駭賞不必盡

善罰不必盡惡或賢而尊顯時以不肖參焉或過而僂辱時以不辜參焉故其人曰彼宜然而信然理也彼不當然而固然豈理邪天也福或可以詐取而禍亦可以苟免人道駭故天命之說亦駭焉法大弛則是非易位賞怕在佞而罰恒在直義不足以制其強刑不足以勝其非人之能勝天之具盡喪矣夫實已喪而名徒存彼昧者方挈挈然提無實之名欲抗乎言天者斯教窮矣故曰天之所不能者生萬物也人之所能者治萬物也法大行則其人曰天何預人邪我蹈道而已法大弛則其人曰道竟何為邪法人而已法小弛則天人之論駭焉今以一己之窮通而欲質天之有無惑矣余曰天恒執其所能以臨乎下非有預乎治亂云爾人恒執其所能以仰乎天非有預乎寒暑云爾生乎治者人道明咸知其所自故德與怨不歸乎天生乎亂者人道昧不可知故由人者舉歸乎天非天預乎人爾

天論中

或曰子之言天與人交相勝其理微庸使戶曉盍取諸譬焉劉子曰若知旅乎夫旅者羣適乎莽蒼求休乎茂木飲乎水泉必強有力者先焉否則雖聖且賢莫能競也斯非天勝乎羣次乎邑郭求蔭于華榭飽于餼牢必聖且賢者先焉否則強有力莫能競也斯非人勝乎苟道乎虞芮雖莽蒼猶郭邑然苟由乎匡宋離郭邑猶莽蒼然是一日之途天與人交相勝矣吾固曰是非存焉雖在野人理勝也是非亡焉雖在邦天理勝也然則天非務勝乎人者也何哉人不宰則歸乎天也人誠務勝乎天者也何哉天無私故人可務乎勝也吾于一日之途而明乎天人取諸近也已或者曰若是則天之不相預乎人也信矣古之人冒引天為答曰若知操舟乎夫舟行乎澨淄伊洛者疾徐存乎人次舍存乎人風之怒號不能鼓為濤也流之沂泗不能峭為

魁也適有迅而安亦人也適有覆而膠亦人也舟中之人未嘗有言天者何哉理明故也彼行乎江河淮海者疾徐不可得而知也次舍不可得而必也鳴條之風可以沃日車蓋之雲可以見怪恬然濟亦天也黠然沈亦天也沾危而僅存亦天也舟中之人未嘗有言人者何哉理昧故也問者曰吾見其駢焉而濟者風水等耳而有沈有不沈非天曷司歟答曰水與舟二物也夫物之合并必有數存乎其間焉數存然後勢形乎其間焉一以沉一以濟適當其數乘其勢耳彼勢之附乎物而生猶影響也本乎徐者其勢緩故人得以曉也本乎疾者其勢遽故難得以曉也被江海之覆猶伊淄之覆也勢有疾徐故有不曉耳問者曰子之言數存而勢生非天也天果狹於勢邪答曰天形恒圓而色恒青周回可以度得晝夜可以表候非數存之乎恒高而不卑恒動而不已非勢之乘乎今夫蒼蒼然者一受其形于

高大而不能自還於卑小一乘其氣于動用而不能自休於俄頃又惡能逃乎數而越乎勢邪吾固曰萬物之所以為無窮者交相勝而已矣還相用而已矣天與人萬物之尤者耳問者曰天果以有形而不能逃乎數彼無形者子安所寓其數邪答曰若所謂無形者非空乎空者形之希微者也為體也不妨乎物而為用也恒資乎有必依於物而後形焉今為室廬而高厚之形藏乎內也為器用而規矩之形起乎內也音之作也有大小而響不能踰表之立也有曲直而影不能踰非空之數歟夫目之視非能有光也必因乎日月火炎而後光存焉所謂晦而幽者自有不能燭耳彼狸狎大鼠之目庸謂晦為幽邪吾固曰以自而視得形之粗者也以智而視得形之微者也烏有天地之內有無形者邪古所謂無形蓋無常形耳必因物而後見耳烏能逃乎數邪

天論下

或曰古之言天之曆象有宣夜渾天周髀之書言天之高遠卓詭有鄒子今子之言有自乎荅曰吾非斯人之徒也大凡入乎數者由小而推大必合由人而推天亦合以理揆之萬物一貫也今夫人之有顏目耳鼻齒毛頤口百骸之粹美者也然而其本在乎腎腸心腹天之有三光懸寓萬象之神明者也然而其本在乎山川五行濁為清母重為輕始兩位既儀還相為庸噓為雨露噫為雷風乘氣而生羣分彙從植類曰生按尚書傳云草木動類曰虫裸虫之長為智最大能執入理與天交勝用天之利立人之紀紀綱或壞復歸其始堯舜之書首曰稽古不曰稽天幽厲之詩首曰上帝不言人事在舜之庭元凱舉焉曰舜用之不曰天投在殷中宗襲亂而興心知說賢乃曰帝賚堯民知餘難以神誣商俗已訛引天而啟由是而言天預入乎

劉賓客文集卷第五

劉賓客文集卷第六 論中

因論七篇

劉子閒居作因論或問其旨曷歸歟對曰因之爲言有所自也
天造端乎無形垂訓于至當其立言之徒放詞乎無方措旨于
至適其寓言之徒蒙之智不逮于是造形而有感因感而有詞
匪立匪寓以因爲目因論之旨也云爾

鑿藥

訊昨

嘆牛

做舟

原力

說驥

述病

鑿藥

劉子閒居有負薪之憂食精良弗知其旨血氣交沴煬然焚如
客有謂余子病病積日矣乃今我里有方士淪跡於醫厲者造
焉而美肥輒者造焉而善馳矧常病也將子詣諸予然之之醫
所切脉觀色聆聲參合而後言曰子之病其興居之節舛衣食

之齊去聲乖所由致也今夫藏鮮能安毅府鮮能毋氣徒爲美疹之囊索耳我能攻之乃出藥一九可兼方寸以授予曰服是足以治昏煩而鉏蘊結銷蠱慝而歸耗氣然中有毒須其疾瘳而止過當則傷和是以微其齊也予受藥以餌過信而臆能輕痺能和涉旬而苛瘳絕焉抑搔罷焉踰月而視分纖聽察微蹈危如平嗜糲如精或聞而慶予且閔言曰子之獲是藥凡神乎誠難遭已顧醫之態多番術以自貴遺患以要財盍重求之所至益深矣予昧者也泥通方而徂既效猜至誠而惑勸說卒行其言逮再餌半旬厥毒果肆岑岑周軀如痞作焉悟而走諸醫醫大叱曰吾固知夫子未達也促和蠲毒者投之瀆於殆而有喜異日進和藥乃復初劉子慨然曰善哉醫乎用毒以攻疹用和以安神易則兩躡明矣苟循往以御變昧於劑宣奚獨吾儕小入理身之弊而已

訊毗

劉子如京師過徐之右鄙其道旁午有毗增增扶班白挈羈角齋生噐荷農用摩肩而西僕夫告予曰斯宋人梁人亳人穎人之逋者今復矣予愕而訊曰予聞隴西公暢轂之止方踰月矣今尔曹之来也欣欣然似恐後者其聞有勞徠之簿歟蠲復之條歟振贍之歟碩鼠亡歟瘕狗逐歟曰皆未聞也且夫浚都吾政之上游也自巨盜間釁而武臣顓焉牧守由將校以授皆虎而冠子男由胥徒以出皆鶴而軒故其上也子視卒而芥視民其下也驚其理而蟬其賊民弗堪命是軼于它上然咸重遷也非阡危穽壑不能違之曩者雖歸歟成謠而故態相沿莫我敢復今聞吾帥故爲丞相也能清靜畫一必能以仁蘇我矣其佐嘗宰京邑也能誅鉏豪右必能以法衛我矣奉斯二必而来歸惡待事實之及也予因浩歎曰行積于彼而化行于此實未

至而聲先馳聲之感人若是之速歟然而民知至至矣政在終
終也嘗試論聲實之先後曰民黠致頹頹理而後勸斯實先聲
後民離政亂頹感而後化斯聲先實後也立實以致聲則難在
經始由聲以消實則難在克終操其柄者能審是理俾先後終
始之不失斯誘明民孔易也

歎牛

劉子行其野有叟牽跛牛于蹊偶問焉何形之媿歟何足之病
歟今覈鯨然將安之歟叟攬縻而對云媿其形骸之至也病其
足後之過也請為君畢詞焉我儼車以自給嘗驅是牛引千鈞
北登太行南並商嶺掣以回之叱以聳之雖涉淖躋高較如蓬
而輶不債及今廢矣顧其足雖傷而膚尚腴以畜豢之則無用
以庖視之則有羸伊禁焉莫敢尸也甫聞邦君饗士卜剛日矣
是往也當要平售于宰夫余尸之曰以叟言之則利以牛言之

則悲若之何予方窶且無長物願解裘以贖將置諸豐草之鄉
可乎叟鞭然而咤曰我之活是屈指計其直可以持醪而鬻肥
飴子而衣妻若是之逸也奚事裘焉且昔之厚其生非愛之也
利其力今之致其死非惡之也利其財子惡乎落吾事劉子度
是叟不可用詞屈乃以杖扣牛角而嘆曰所求盡矣所利移矣
是以負能霸吳屬錢賜斯既帝秦五刑具長平威振杜郵死骸
下敵擒鍾室誅皆用盡身賤功成禍歸可不悲哉可不悲哉嗚
呼執不匱之用而應夫無方使時宜之莫吾害也苟拘于形器
用極則憂明已

傲舟

劉子浮于汴涉淮而東亦既釋紼纜榜人告余曰方今湍悍而
舟隘宜謹其具以虞焉予聞言若厲由是褫以空之灰以堊之
斲以乾之僕息而躬行夕惕而晝勤景靈晶而莫進風異响而

適止兢兢然累辰是用獲濟偃播弭擢次下淮陰于是舟之工咸沛然自暇自逸或游肆而觴矣或拊橋而歌矣隸也休役以尚寢矣吾曹無虞以宴息矣逮夜分而窾隙潛澍渙然陰潰至乎淹蹇濡薦方卒愕傳呼跳登墟僅以身脫目未及瞬而樓傾軸墊抵于泥沙力莫能支也劉子缺然自視而言曰孺子兢惕也汨洪漣而無害今予宴安曰蹈常流而致危畏之途果無常所哉不生於所畏而生於所易也是以越子鄰行吳君忽晉宣尸居魏臣怠白公屬劍子西晒李園養士春申易至于覆國夷族可不儆哉嗚呼禍福之胚胎也其動甚微倚伏之矛盾也其理甚明困而後儆斯弗及已

原力

劉子于邁舟次泗濱維絃通之于傳傳吏適傳呼曰乘駟者方來誰何之則曰力人也雅以力聞於吳楚間中貴人器之謂宜

爲瓜士獻言于上有旨趣如京師頃其至則位焉五輦咸碩其體毅其容動睛睇如曳趾岌如顧瞻遲回飲啜有聲泗濱守伍由將授也說而勞之饗以太牢飲以百壺酒酣氣振求試自矜儂如無人中若有馮有盪舟如浴者扶鼎如飛者絢鍵如麻者開兩弧而眎不憤者礙巨石而齋如流者異哉果以力駭世而聞于上也異日話於儒家者流有客俳然自奮曰斯誠力矣上之不過誇胡人而戲角抵次之不過碎期門而振衲服我之力異然以道用之可以格三苗而賓左袵以威用之可以係六羸而斷右臂由是而言彼力也長雄於匹夫然猶駟其馱籛其食我力也無敵於天下亦當蒲其輪鶴其書矣予詰之曰彼之力用于形者也子之力用于心者也形近而易見心遠而難明理乎而言則子之力大矣時乎而言則彼之力大矣且夫小大迭用曷常哉彼固有小矣子固有大矣予所不能齊也客于邑垂

涕洟劉子解之曰屠羊于肆適味于衆口也攻玉于山俟知于獨見也貪日得則鼓刃利要歲計而韞積多客聞之破涕曰吾方俟多于歲計也歲歟歲歟其我與歟

說驥

伯氏佐戎于朔陲獲良馬以遺予予不知其良也秣之稊秕飲之污池廐捱也上痺而下蒸羈絡也綴索而續韋其易之如此予方病且窶求治于肆肆之馭亦不知其良也評其價六十緡將劑矣有裴氏子羸其二以求之謂善價也卒與裴氏裴所善李生雅挾相術于馬也尤工覩之周體昭然視听然笑既而拊隨之且曰久矣吾之不觀于是也是何柔心勁骨奇精妍態宛如鑿如擘如翔如之備邪今夫之德也全然矣顧其維駒藏斃于內且秣之乖方是用不說于常目須其齒備而氣振平則衆美灼見下可以獻帝閑次可以鬻千金裴也聞言竦焉遂傲其

僕蠲其皂筐其惡蚤其溲摧以美薦秣以薊粒起之居之澡之拒之無分陰之急斯以馬養養馬之至分也居無何果以驥德聞客有唁予以喪其寶且譏其所賀也微予灑然曰始予有是馬也予常馬畜之今予易是馬也彼賢馬畜之寶與常在所遇耳且夫昔之翹陸也謂將蹄將齧抵以搥策不知箭其雲耳昔之嚙吸也謂爲疢爲癘投以藥石不知其噴玉耳夫如是則雖曠日歷月將頓踣是以曾何寶之有焉繇是而言方之於士則八十具緡也不猶踰於五段皮乎客謾而竦予遂言曰馬之德也存乎形者也可以目取然猶爲之若此矧德蘊于心者乎斯從古之難予不敢歎

述病

劉子嘗涉暑而征熱攻于腠以致病其僕也告痛亦莫能興逮浹日予有瘳醫診之曰疾幸間矣顧熱沴而未平有遺類焉宜

謹於攝衛衛之乖方則病復矣所苦既微而怠其說倦眠于衾而興焉倦隱于几而步焉面不能罷頰髮不能稍擲口不能忘味心不能無思如是未移日而疾也瘥疎錦如復瘥進藥求汗凡三換然後目能視視既分別嚮時晚然執括園侍予于前矣予訝與者也病偕坤也諱也若酷而吾微藥也也吾殷而若薄何患之同而痊之異哉僕諄諄而荅云已之被病也兀然而無知有間也亦兀然而無知髮蓬如而忘乎亂面黔如而忘乎垢自疾之菽也雖飲食是念無滑其之思日致復初亦不知也予喟然歎曰始予有斯僕也命之埋畦則蔬荒主庖則味乖顛鹿則馬瘠常謂其無適能適乃今以兀然而賢我遠甚利與鈍果相長哉僕更矣劉子遂言曰樂于用則豫章貴厚其生則社稷賢唯理所之魯何膠于域也

劉賓客文集卷第六

劉賓客文集卷第七 論下

辨易九六論

與董生論易

辨易九六論

乾之爻皆九而坤六何也世之儒曰吾聞諸孔穎達云陽尊得兼乎陰陰不得兼乎陽也它曰予與董生言及易生曰吾聞諸畢中和云舉老而稱也請徵諸撰著夫端策者一變而過少與歸奇而為五再變而過少與歸奇而為四三變如之是老陽之數分措于指間者十有三策焉其餘三十有六四四而運得九是已故易繫注云乾一爻三十六策也一變而過多與歸奇而為九再變而過多與歸奇而為八三變如之是老陰之數分措于指間者二十有五策焉其餘二十有四四四而運得六而已故易繫注云坤一爻二十四策也借如一變而過少再變三變而過多是少陽之數分措于指間者二十有一策其餘二十有

八四四而運得七一變而過多再變三變而過少是少陰之數分指于指間者十有七策其餘三十有二四四而運得八故九與六為老老為變爻七與八為少少為定位故曰舉老而稱亦

且夫筮為乾者常遇七斯乾矣常遇九斯得坤

坤者常遇八斯坤矣常遇六斯得乾矣在左氏

晉公子親筮之曰尚有晉國得貞屯悔豫皆八八非變爻故不曰有所之按坎二世而為屯屯之云云為世爻震一世而為豫豫之初六為世爻屯之二豫之初皆少陰不變斯非八乎卦由老數而舉曰六筮由著數故斥曰八在左氏春秋傳有之曰穆姜薨于東宮始往而筮之遇艮之八史曰是謂艮之隨夫艮三三艮上下之隨三三震上下唯二不動斯遇八也餘五位皆九六故及為筮法以少為卦主變者五而定者一故以八為占艮之六二曰艮其輔不拯其隨其心不快史以為東宮實幽也過此為

不利故從變爻而占苟以說于姜也何則卦以少為主若定者五而變者一即宜曰之某卦觀之否師之臨類是也變與定均即決以內外今變者五定者一宜從少占懼不吉而更之故曰是謂艮之隨是謂之云者苟以說也故穆姜終死于東宮與艮會耳而杜元凱於此註以為雜用三易故有遇八之云非臻極之理也劉子曰余與董生言九六之義信與理會為不誣矣余又于左氏二書參焉若合形影然而世人往往攘臂于其間曰生之名孰與顯達著邪而材孰與元凱賢邪 明日未嘗有聞人明是說者雖余憤然

由教立文所知皆合 予若觀三辰其不晦也如此然猶貴

聽而賤視斷斷五折然莫可更也矧無形之理不可見之道邪

余獨悲而志之以俟夫後覺初董生言本畢中和中和本其師師之學本一行云

第一指 餘一益二餘二益二 第二指 餘一益二餘二益一 第三指 餘三益四餘四益三

指與第二指同
右揲著數 掛從下起指一自下始第一指法第故益成
第一指 遇一益三并掛一為五遇第二指 遇一益二并掛一為四 第三指 遇一益一并掛一為四

右三指俱遇少通計十三策其餘三十六策四四運之得九為老陽故易繫云乾之策二百一十有六注云陽爻九一爻三十六策六爻二百一十有六

第一指 遇四益四與 第二指 遇四益三與掛一 第三指 遇四益一與掛一 為八 過 三亦同

右三指俱遇多通計二十五策其餘二十四策四四運之得六為老陰故易繫云坤之策百卅有四謂陰爻六一爻二十四策六爻一百四十有四

第一指 遇一為五 第二指 遇四益三并 第三指 遇四益三并 右初指少第二第三指多以 通計二十一策其餘

二十八策四四運之得七為少陽 第一指 遇四益四并 第二指 遇一益二并 第三指 遇一益二并 右初指多第二第三少以多為主通計一十七策其餘三

十二策四四而運得八為少陰 第一指 遇少謂一二 第二指 遇多謂三四 第三指 遇少謂一二 也並止于五 也並止于八 也並止于四

右初指少第二第三指又少以多為主通計一十七策其餘三十二策四四而運得八為少陰

第一指 遇多謂四 第二指 又遇多謂三 第三指 遇少謂一二 也止于九 也止于八 也止于四

右初指第二第三指並多第三指獨少以少為主通計二十一策其餘二十八策四四運之得七為少陽

第一指 遇少五 第二指 又遇少四 第三指 遇多止于五 又遇少四 又遇多止于八

右初指二指並少三指獨多以為主通計一十七策其餘三十二策四四運之得八為少陰

穆姜薨于東宮始往而筮之遇艮之八史曰是謂艮之隨夫艮三三艮上之隨三三震下唯六二爻不動餘五盡變者遇九六也二不動者遇八也

晉公子親筮之曰尚有晉國得貞屯悔豫皆八夫屯三三震下坎上六位盡不遇六九故不動既無以世爻為占按屯是坎

宮二世卦故以一為占則遇八夫豫三三震上坤下是震宮一世卦以初六為占亦遇八韋昭于此注云內曰貞外曰悔震下坎上

為屯坤下震上為豫言得此兩卦震在屯為貞在豫為悔八謂震兩陰爻在貞在悔皆不動所以筮史占之謂閉而不通者爻

無為也乾之策二百一十有六謂陽爻九一爻三十六策六爻當二百一十有六言三十六者坤之策一百四十有四謂陰爻六一爻二十四策六策當百四十有四言二十四者舉老陽也

凡三百有六十當暮之日 二篇之策萬有一千五百二十當

萬物之數六十四卦都三百六十四爻陰陰相半各一百九十

二爻

陽爻一爻三十六策合為六千九百一十二陰爻一爻二十四

策合為四千六百八

右六九之數

一行大衍論云三實皆剛太陽之象也三變皆柔太陰之象也

一剛二柔少陽之象也一柔二剛少陰之象也少陽之剛有始

有壯有究少陰之柔有始有壯有究因綜四象之實而成八象

焉八象之位而八卦之本列矣注云太陽始動施于太陰而生

震象之七謂少陽之七再動于壯而生坎象之七謂再索而

動于究而生艮象之七謂三索而太陰始動施于太陽而生巽

象之八謂少陰之八再動于壯而生離象之八謂再索而三動

于究而生兌象之八謂三素而得女也是以九六七八分為八象

右大衍論

國語又云董因迎公于河公問為曰吾其濟乎對曰臣筮之得泰之八曰是謂天地配亨小往大來今及之矣何不濟之有韋昭云泰三至五震象為侯陰爻不動其數皆八與貞屯悔豫義同劉子曰昭此說用互体有震按董因之言天地配亨是六五帝乙歸妹以祉元吉之爻夫泰乾坤体全內外位正內為身外為事卜得國事也以外卦為占六五居尊位故統論卦下辭曰小往大來爻過歸妹故曰天地配亨何必取互体也

右與董生言易

劉賓客文集卷第七

編號 3116
冊數 4
售價 10000

劉賓客文集卷第八 記上



天平軍節度使廳壁記

汴州刺史廳壁記

國學新修五經壁記

汴州鄭門新亭記

鄭州刺史東廳壁記

管城新驛記

和州刺史廳壁記

山南西道節度使廳壁記

山南西道新修驛路記

天平軍節度使廳壁記

元和十四年春二月王師平河南負固之地十有二州憲宗視地圖戶版俾參其地三月有詔其以曹濮隸鄆為一隅按部三郡統兵三萬乃新其軍錫號天平蓋承天威以平暴悖志動揚休在稱為雄新邦始徠汚俗猶用朝廷革之以漸故命功臣或辨吏以帥焉大和三年冬天平監軍使以故侯病聞上方注意治本乃以牙璋玉節昇右僕射官稱賜東都留守令狐公曰予

擇文武惟汝兼前年鎮州汴有顯庸往年弼憲宗有素貴徒得君重剛吾四支公再拜稽首登車有耀不踰旬抵治所夾清河而域之惟鄆州在春秋為須句之國涉漢為濟東蓋禹貢兗州之域宣精在上奎為文宿畫野在下魯為儒鄉故其人知書風俗信厚天寶末大憝起于幽都虜將困兵鋒取其地右勇左德積六十年公之來思如古醫之治劇病宣洩瀨養氣還神復大凡抗詔條國式于身以先之示菲約以裕人信賞罰以格物物力日完人風自移涉月報政踰年昇治牙門之容暨暨而恭壘門之容屹屹而和里中之容闐闐而遂勞者以安去者以歸分星而搖田祖降福凡葦前非罷供第無名錢歲鉅萬菽粟如之錦繒且千兩去苛法急徵毀家償租之令故流庸自占四方室眾無吁咨和氣乃來三田仍稔草木咸瑞豈偶爾哉初斯堂西墉有刺史記而元戎雄尊之位虛其左方豈有待邪公命愚志

之俾來者仰公知變風之自天和五年夏四月二十六日記

汴州刺史廳壁記

本朝以浚儀為汴州刺史治所自隋驪新渠吸黃河而東行州舍其樞為天下劇內屏王室東雄諸侯居無事常時帶廉察使兵興已還益以勸旄用人得否繫國輕重長慶四年詔書命河南尹燉煌令狐公來蒞來刺錫之介圭使印兵符汴人交賀者驪騰貴惟是邦始都于魏惠王始郡于宇文周星躔回環天駟垂光地為四戰故其俗右武人具五都故其氣習豪公自為宰相時已熟四方之利病凡所戾止參然前知既視事三日揖羣吏與之言曰吾食止圭田吾用止公入凡它給過制傷廉澆潔者悉罷之壹歸乎公藏凡曲防苛禁不情乖休者悉刻之壹出乎令典凡關征船筭奪時專利者悉更之壹遵乎詔條然後刑麗事而詳賞以時而均興學以勸勸示寬以化勇居數月而汴

州人恂恂然無復故態明年大成議者若曰奕奕後都國之囑
頤咀清嘖和旁暢四支東夏黜馬由我以肥是後之治非所澤
于所履而已初公七代祖在隋為納言大業中持節居此亦號
刺史距今餘二百年公實能似闕發魚書合左右契由昨階躋
遐踵前武歌然如聞其馨香肅然如觀其形容信乎君子之澤
遠而有光輝也它日命遊梁客志之書于廳事謹按前賢之在
此堂者張平原首之陸氏撰節度使記揭于東壁詳矣今公命
為刺史記書于右端謹月而右之以公為冠大和元年夏五月
某日記

國學新脩五經壁記

初大曆中名儒張參為國子司業始定五經書于論堂東西廂
之壁辯齊魯之音取其宜考古今之文取其正繇是諸生之師
心曲學偏聽臆說咸束之而歸于大同揭揭高懸積六十歲崩

剝污蟻澳然不鮮今天子尚文章尊典籍于苑囿不加尺椽而
成均以治學上言遽賜千萬時祭酒皞實尸之博士公肅實佐
戶國庠重嚴過者必式遂以羨羸再新壁書懲前土塗不克以
壽乃折堅木負墉而宇之其制如版牘而高廣其平如粉澤而
潔滑背施陰闕使衆如一附離之際無迹而尋堂皇靚深西廡
相照申命國子能通法書者分章揆日遜其業而繕寫為筆削
既成儼校既精白黑彬班瞭然飛動以蒙來求煥若星辰以敬
來趨肅如神明以疑來質決若著蔡由京師而風天下羣及九
譯咸知宗師非止版逢掖者鑽仰而已於是學官其等暨生徒
凡四百二十有八人請金石刻且歌之曰

我有學宇既頌而成之我有壁經既昧而明之孰規摹之孰發
揮之祭酒維齊博士維韋俾我學徒絃歌以時切切祁祁不教
不嬉庶乎道人來采我詩時余為禮部郎凡睿宗之事得以關

決故書之以移史官宜附于苑文志

汴州鄭門新亭記

亭于西門尊闕路北實相公以心規羣僚以辭叶而百工以樂成斧斤無聲丹素有嚴主人肅容落以金石走鄭之門嵌為右垣黃河一支滉漾北軒前瞻東顧蹙動軌直含景生姿邈望欲翔汴城具八方之人殊形詭言而耳目一說初公來臨擁節及門馭吏曰此鄭州門公心非之若曰野哉居無何即舊號而更之曰鄭門故事王人大僚之去來元侯前驅頡門而旋率立于塵坐中挹策為禮公心不然之乃下亭令于執事按亭東西函史者三之有奇而南北五之有羸樂縣宴豆前後以位棊闔對明拜欬順時脩梁衡建中虛上荷圓脊方廉高卑中經簾鑪茵帶文拋睨榻儲以應粹周用而宜乃命尹閣視亭長抱關視掌固啓閉拚除是謹是致錫命賜昨勞迎贈餞我當躬行汝先汝

獨挾瞻提醪生芻縞衣我察展事靡問文武汝唯汝從凡入而脩容凡出而脩較揚襲威儀勿籍勿訶由是貴人稱諸朝羣吏詠于家行者誇于道與人同其安者人人譯其聲而吟之始乎譏譏而威乎虜鴻欲無文字不可也公遂條白其所以然遂命學古者書之公姓令狐氏以文章典內外書命以暮明登左右相以飛語策免以思材復徵自有浚師無如今治文武兩熾其古之大臣歟

鄭州刺史東廳壁記

古諸侯之居公私皆曰寢其它室曰便坐今凡視事之所皆曰廳其它室以辨方為稱今年鄭州刺史楊君作東廳既成而落之且以書抵余為記按國章以甲乙第方域大凡環天子之居為雉州鄭實通王畿故望雉視其版多貴人且當大達故務劇君侯始來三日司稅掾舉七縣董租之吏累百君曰此百騰也

悉罷之用戶符而輸入益辨司貢掾舉梨林之征請戶曉君曰
盡弛之物籍用平賈而果益精里無吏迹民去痼疾授贖占租
如臨詛盟土毛人力日夕相長故周歲而完焉比年而愈肥雖
軍興餽輓旁午大將牙旗往復相踵而里中清夷雞犬音和人
既寧而物有餘故既成而日多暇園視舊宇宜有以更之且書
得時亦以謹始因列名氏授受月而日之庶乎繼踐于茲者知
貫珠之首其山望澤浸土風既俗與前賢之耿光備于正位有
天寶中詞人杜顥之文在大和四年某月日記

管城新驛記

大和二年閏三月滎陽守歸厚上言臣治所直天下大達肘武
牢而咽東夏誰何宜謹啓閉宜度先是驛于城中駟遽不時四
門壯鍵通夕弗禁請更于外隧永永便安制曰可守臣奉詔無
微命無奪時廢羨財募游手逮八月既望新驛成鄭人胥說琢

石而紀曰在先之方面玄負陽門街周道牆蔭行粟境勝于外
也遠購名材旁延世工暨塗宣哲瓴甃剛滑術精于內也遽廬
有甲乙牀帳有冬夏庭容牙節廡卧囊索示禮而不恩也內庖
外廡高倉邃庫積薪就陽時芻就燥有素而不愆也主吏有第
從夫有區師行者有饗亭孳行者有別邸周以高墉乃據其門
勞迎展蠲潔之敬餞別起登臨之思溱洧波瀾嵩丘雲煙四時
萬象未既于我走轂奔蹄過征急宣入而忘勞出必屢顧其傳
舍之尤乎太守姓楊氏字貞一華陰弘農人鄭為雄州非聞人
大吏不得在其選夫驛之宜遷于外也前此二千石嘗言之而
重改作若貞一可謂果於從政而決行其言惜乎未施於大也

和州刺史廳壁記

歷陽古揚州之邑於天文直南斗魁采在春秋實句吳之封後
為楚所取秦并天下以隸九江而吳為九江治所晉平吳復隸

淮南至永興初自析為郡益之以烏江宋臺建日為南豫州又益之以龍亢梁之亡北齊圖霸功擁貞陽侯以歸王僧辨來迎會于茲地二國和協故更名和州陳隋間無所革國朝因隋武德中更龍亢為含山初開元詔書以口笑第郡縣為三品之為不州元和中復命有司參校之遂進品第一按見戶萬八千有奇輸緡錢十六萬歲貢織紵二籠吳牛蘇二鈞糝鱉九甕茅蒐七千西類曰梁山浸曰歷湖田菽四穀黍全六搜廬有旨酒庖有腴魚神仙故事在郊在藪玄元有臺彭鏗有洞名山曰雞籠名塢曰濡須異有血閻祥有沸井城高而堅亞夫所營州師五百環峙于東南瀕江劃中流為水疆揭旗樹纛十有六成自孫權距陳出入六代常為宿兵之地多以材能人處之本朝混一號為善部然用人差輕非復曩時之比也始余以尚書郎待謹刺連山今也自巴東來牧考前二邦之籍與版圖總什五六而

地征三之究其所從來生植有本女工尚完堅一經一緯無文章交錯之奇男夫尚墾闢功苦戀本無即山近監之逸市無嗤眩工無彫彫無游人異物以遷其志副徵令者率非外求凡百為一出于農桑故也由是而言瘠天下者其在多巧乎寶曆九年六月二十一日刺史中山劉某記

山南西道節度使廳壁記

文皇帝初元始畫天下為十道古荆梁之地舉曰山南厥後析為東西天漢之邦實居右部按梁州為都會治所領十有五州縣道帶蠻夷山川扼隴蜀故二千石有採訪防禦之名兵興多故其任益重澄清節鉞二柄兼委建中末德宗南巡狩偃翠華而徘徊蕭勺之音洽于巴漢戡難清宮六龍言旋乃下詔復除征隸升州為府等威班制與岐益同地既尊大用人隨異故自興元至大和五十年間以勳庸佩相印者三以暮明歷真相者

九由台席授試未幾復入相者再為磊落震耀冠于天下去年夏四月今丞相趙郡公微還泰階遂命左僕射燉煌公往踐其武彛之九相及公而十為初公自河陽節度使入操國柄其後鎮宣武以禮悅懷悍治天下以清去培克居大鹵以仁蘇薦飢今來是都躡二三天君子之躅道同氣協無所改更如鼓和琴布指成韻羗夷砥平旱麓發生人無左言樂有夏聲俗既富庶居多閒暇園視府局素闕者補之先是公堂嘗為行殿人不敢斥別營侯居應門有閭祭戟未具公乃條白上言詔下有司可其奏君門肅清方有眉目趨而入者聳然生敬為惟梁山國也其節用虎出揚其威入貯宜潔舊處仄陋黷其雄稜公遂分宅之別齋且據便地署曰節室卜剛日乃邁焉敬君命而一民心軍中增氣而知禮戰衣既垂師節既嚴流眄屋壁見前修之名氏列于坐右第以梁州刺史鼎興元尹記與今稱謂不合因發

函進牘于不佞且曰我已歸東壁以新志累子於是按南梁故事起自始登齋壇之後為記云時開成二年歲在丁巳春三月某日記

山南西道新脩驛路記

開成四年梁州牧缺上玩其印凝旒深思曰伊爾卿族歸氏以文儒再世居喉舌今天官二卿融能嗣其耿光嘗自內庭歷南臺丑轂下政事以試可為元侯乃付印綬進秩大宗伯兼御史大夫玉節獸符鎮于媯墟公拜手稽首曰臣融敢揚王休于天漢之域既蒞止咨于羣執事求急病者先之咸曰華陽黑水昔稱醜地近者嘗為王所百態丕變人風邑屋與山水俱一都之會目為善部矣唯駟遽之途歌危隘束其醜尚存使如周道在公頤指耳於是因年有秋因府無事軍逸農隙人思賈餘乃懸壑山刊木之傭募其力揆鑽鑿撞柲之用庀其工異舁輦畚鍤

之器膺其要鑿鼓以程之糗膠以犒之說使之令既下奮行之徒空集我之提封居右扶風觸劍閣千一百里自散關抵褒城次舍十有五牙門將賈黯董之自褒而南逾利州至于劍門次舍十有七同鄴度副使石文穎董之西將受命分曹星馳並山當蹊頑石萬狀坳者埕者兀者銛者磊落頽欹波翻獸薄熾炭以烘之巖醴以沃之潰為埃煤一篲可掃棧閣盤虛下臨岷呀層崖峭絕柶木曰鐵因而廣之限以鉤欄狹逕深陁銜尾相接從而拓之方駕從容急宣之騎宵夜不感都曲後層一朝坦夷興後得時國人不知繇是騁行者忘其勞吉行者徐其驅孳行者家以安貨行者肩不病徒行者足不重乘行者蹄不剝公談私詠溢于人聽伊彼金其牛而誘之以利曷若我子其民而表之以義乎既訖促南梁人書事于牘請紀之以附于史官地里志

劉賓客文集卷第九 記下

夔州刺史廳壁記

連州刺史廳壁記

機汲記

洗心亭記

復荆門縣記

武陵北亭記

夔州刺史廳壁記

夔在春秋為子國楚并為楚九縣之一秦為魚復漢為固陵蜀為巴東梁為信州初城于瀼西後周大總管龍門公拓王述登白帝歎曰此奇勢可居遂移府于今治所是歲建德五年隋初揚素以越公領總管又張大之唐興武德二年詔書其以信州為夔州七年增名都督府督黔巫一十九郡開元中猶領七州天寶初罷州置郡號雲安至德二年命嗣道王鍊為太守賜之旌節統破中五郡軍事乾元初復為州偃節于有司第以防禦使為稱尋罷以支郡隸江陵按版圖方輸不足當通邑而今秩

與上郡齒特以帶蠻夷故也故相國安陽公乾曜嘗參軍事脩
圖經言風俗甚備今以郡國更名之所以然著于壁云凡名殊
必以國事建必以年謹始也長慶二年五月一日刺史中山劉
某記

連州刺史廳壁記

此郡於天文與荊州同星分田壤制與番禺相犬牙觀民風與
長沙同祖習故嘗隸三府中而別合乃今最久而安得人統也
按宋高祖世始析郴之桂陽為小桂郡後以州統縣更名如今
其制誼也郡從嶺州從山而縣從其郡邑東之望曰順山由順
以降無名而相歆者以萬教回環鬱遠迭高爭秀西北朝拱于
九疑城之下浸曰湟水由湟之外支流而合輸以百數淪漣汨
瀟擘山為渠東南入于海山秀而高靈液滲漉故石鍾乳為天
下甲歲貢三百銖原鮮而膳卉物柔澤故苧蕉為三服貴歲貢

十笥林富桂檜土宜陶甄故侯居以壯聞石侔琅玕水孕金碧
故境物以麗聞環峯密林激清儲陰海風毆溫交戰不勝觸石
轉柯化為涼颼城壓赭岡踞高負陽土伯嘯濕抵堅而散襲山
逗谷化為鮮雲故罕罹嘔泄之患亟有華皓之齒信荒服之善
部而炎裔之涼墟也永貞元年余始以尚書外郎坐黨累出補
茲郡屋無何吏議以是遷也不足庚其責故道賤為朗州司馬
後十年詔書徵還抵京師俄復前命佩故印綬而南曩之騎竹
馬北向相僕者咸任郡縣巾鞵來迎下車之日私言且笑既視
事得前二千石名姓于壁端宰臣王峻倖卿劉晃儒官嚴士元
聞人韓泰僉祥焉或久於其治功利存乎人民或不之厥官翹
顯載于歌謠余不佞從羣公之後肇武德距于今凡五十有七
人所舉者四君子猶振裘之於領袖焉元和十一年七月二十
四日刺史中山劉某記

機汲記

瀕江之俗不飲於鑿而皆飲之流予謫居之明年主人授館于百雉之內江水浩浩周墉之間一旦有工爰來思以枝自賈且曰觀今之室廬及江之涯間不容畝顧積塊峙焉而前耳請用機以汲俾轟然之狀莫我過已予方異其說且命之飭力為工也儲思環視相面勢而經營之由是比竹以為畚窶于流中中植數尋之臬輦石以壯其趾如建標為索絢以為繩縻于標垂上屬數仞之端亘空以峻其勢如張弦為鍛錢為器外廉如昂耳內鍵如樂鼓牝牡相函轉於兩端走於索上且受汲其及泉而脩綆下縫盈器而圓軸上引其往有建瓴之駛其來有推轂之易瓶緇不羸如搏而升枝長瀾出高岸拂林抄踰峻防剗蟠木以承澍貫脩筇以達脉走下潺潺聲寒空中通洞環折唯用所在周除而沃盥以蠲入爨而錡釜以盈甃餼之餘移用于湯

沐激澣之末泄注于圃畦雖漢湧于庭莫尚其需洽也昔予嘗登陴攔然念懸流之莫可遽挹方勉保庸督臧獲釀而挈之至于裂肩龜手然猶家人視水如酒醪之貴今也一任人之智又從而信之機發于冥冥而利用於物浩漑東流赴海為期幹而遷焉逐我頤指鼻之所謂阻且艱者莫能高其高而深其深也觀夫流水之應物植木之善建繩以柔而有立金以剛而無固軸卷而能舒竹圓而能通合而同功斯所以然也今之工咸盜其古先王之遺法故能成之不能知所以為成也智盡于一端功止于一名而已噫彼經始者其取諸小過歟

洗心亭記

天下聞寺數十輩而吉祥尤章章薄名山俯大江荆吳雲水交錯如繡始予以不到為恨今方弭所恨而克所望焉既周覽讚嘆於竹石間最奇處得新亭形焉如巧人畫鰲背上物即之四

顧遠通細大雜然陳乎前引人日去求瞬不得微其經始日僧
義然嘯侶為工即山求材樂高孕虛萬景空未詞人處之思出
常格禪子處之過景境而寐憂入處之百慮冰息鳥思猿清繞
梁歷援月來松間雕鏤軒墀石列筍簷藤蟠蛟螭脩竹芳竿夏
含涼颺斯亭之實錄云尔然上人舉如意挹我曰既志之盍名
之以行乎遠夫余始以是亭圍視無不適始適乎目而方寸為
清故名洗心長慶四年九月二十三日劉某記

復荆門縣記

直故郢北走之道某聚邑曰荆門揭起重關殿于樂都名視縣
內之制居殷形束之要故吏師重焉通外民之底貢會南藩之
述職故賓禮蕃焉其肇允經營實王孫昌夔居荆以表之命行
名建而締構之弗暇無幾何有由勇爵而授赤社于茲者激馳
名于省嗇謂相沿為非智因請罷去其號發踐更以董之有司

不能端究事本循空言而可其奏錄是分地征以歸它邑野之
人有回遠之歎廢文吏而顯成督行之旅有誰何之藉是利不
及下也黎民病之自鄙而南斯為畫疆抵郡之路貫其七舍持
瑞節而銜急宣之使蓋陰相交逐使服縵胡者脩問俗之對執
刀匕者申儆牽之禮是敬之不及賓也君子病之如是幾二十
歲距永貞元年江度尹裴公政成上游德及矜人大建長利俾
無遺害乃外濟羣欲內張全摹周圖經制條白于狀昌言既從
公議攸同忘勞之徒樂用之工載大其門載高其墉徑術脉分
闕閭架空然後折便地以肥之建其官以司之糜羨財以償其
力役汰冗食以資其秩稍田里不聞於徵令縣官無減於歲入
越其月既成而落之官脩其方人樂其居將迎犒餼之儀展廡
置符繻之事舉成夫有伍公吏有職由彙而分率無踰聞入其
封者可以知教元和元年四海會同天子命公師長南宮三年

公以介圭入覲途出斯邑邑人之華皓幼童咸頌于道周鉅躍而謠曰起我堙廢而完之俸我蕩析而安之昔室于墟風搖雨濡自公優柔郭閤盈兮昔飲于滂夏澗冬枯自公感道感涕生兮淑旂之華兮四牡之騑猷公之還兮觴以祝之郤略踰遷百形一音公為駐錯衡而勞之有以文從公者紀事于牘且曰民可懷也盡命夫學舊史之事以志焉公不得讓而從之走是以有授簡之辱初公以縣之之便聞于上也禹錫方以卽位貼職于計曹章下之日得以省事建今以遷人獲宥于善部工休之日得以踐履故於拜命無牢讓于傳信無愧詞以為古之創物建庸宜于人民而得其時者則必誦其事功為後代法雅有營謝美召伯也傳稱城沂賢為教也賦永泉源隰之狀志慮事命日之規當書而詠之細亦弗可略也是是用謹其本始而存乎篇俾後之視今者知楚郊之令典云

武陵北亭記

郡北有短亭繇舊也亭孤其名地藏其勝前此二千石全然見之建言而莫踐去之日率遺恨焉七年冬詔書以竹使符授尚書水曹外郎竇公常曰命爾為武陵守莅止三月以碩畫佐元侯平裔夷降渠魁又三月以順令率蒸民增水坊表大道是歲大穰明年改成農緣畝以勇勸工執技以思賈因民之餘力乘日之多暇乃顧其屬曰郊道有侯亭示賓以不恩也雖聞茲地韜美未發豈有待邪自吾之治于斯也購徒庀材大起堙廢未嘗擅私庭鬻燕寢役必先公人不余瑕調賦幸均矣城池幸完矣而重浹辰之役掠苟簡之問卒使勝躅冒役猶璞而不攻懼換符之日還復齋恨無乃遺誚於來者乎言得其宜智遇同贊於是撤故材以移用相便地而居要去凡木以顯珍茂汰汚池以通淪漣自天而勝者列于騁望由我而美者生于頤指箕張

蓬楹股引房櫳斧斤息響風物異態大道出乎左藩澄湖浸乎
前垠仙舟祖較繇是區處九月壬午工告休亭長受成赤車威
運于以落之肅賓而入園視有適沈水北澳陽陽山南麓默焉
遽遽雄殿郊隅前軒舒陽朱檻環之舞衣回旋樂簾參差北廡
延陰外阿旁注芊眠清泚羅入洞戶初筵脩平彫俎靜嘉林風
天籟與金奏合亦既醉止州從事舉白而言曰室成于私古有
發焉矧成于公庸敢無詞觀乎棼楣有嚴丹雘相宣象公之文
律曄然而光也望之弘深即之坦夷象公之酒德溫然而達也
庭芳萬本附萼交映如公之家肥熾而昌也門闕戶闔連機馳
張似公之政經便而通也因高而基因下而池躋其高可以廣
吾視詠其清可以濯吾纓俯于達惟行旅謳吟是采瞰于野惟
稼穡艱難是知雲山多狀昏旦異候百壺先韋之饒迎退食私
辰之宴嬉觀民風於嘯咏之際展宸戀于天雲之末動合于誼

匪唯寫憂公曰夫言之必可書者公言也從事不以私視予余
從而讓之是自還也其可乎迺授簡于放臣俾書以示後後之
思公者雖灌叢蔓草尚勿翦拜矧翬飛之革然石刻之隱然歟

劉賓客文集卷第十書

上杜司徒書

獻權舍人書

為京兆李尹答于襄州第一書

為京兆李尹答于襄州第二書

答饒州元使君書

答容州竇中丞書

答柳子厚書

與柳子厚書

答道州薛郎中論方書書

與刑部韓侍郎書

與道州薛郎中論書儀書

上杜司徒書

時元和元年

月日故吏守朗州司馬負外置同正員劉某謹齋沐致誠命僕夫持書敢獻于司徒相公閣下昔稱韓非善著書而說難孤憤尤為激切故司馬子長深悲之為著于篇顯白其事夫以非之書可謂善言人情使逢時遇合之士觀之固無以異于它書矣

而獨深悲之者豈非遭罹世故益感其言之至邪小人受性顛
蒙涉迹未至末學見淺少年氣粗常謂盡誠可以絕嫌猜狗公
可以弭讒慝謂慎獨防微為近隘謂艱貞用晦為廢忠芻狗已
陳刻舟徒識呂獲隨足偃然無知事去凝想恃恃自笑然後知
韓非之善說司馬子長之深悲跡符理會千古相見雖欲勿悲
可乎大凡恒人之所以靈于庶類以其能羣以勝物也烈士之
所以異于恒人以其伏節以死誼也然則交相喪者世與道難
合并者機與時是以有死誼之心而卒不獲其所者世人悲之
獲其所矣而一旦如不得終焉者君子悲之世人之悲悲其不
遇無成而虧故其感也近君子之悲悲其不幸既得而喪故其
感也深其悲則同其所以為悲則異若小人者其不幸歟間者
昧于審身推致危地始以飛謗生釁終成公議抵刑旬朔之間
再投裔土外贖相公知人之鑑內貽慈親非疾之憂常恐恩義

兩乖家國同負寒心銷志以生為慙雖欲瀝血以自明籲天以
自新適足來衆多之誚豈復有特達見知者邪遂用誼盟于心
不復自白以內咎為誼謗之具以吞聲為窒隙之媒庶乎日月
至焉而是非乃辨會友人江陵法曹掾韓愈以不宰相悲且曰
相國扶風公之過子也厚非獨余知之天下之人皆知之矣余
聞初子之橫為口語所中獨相國深明之及不得已而退則為
之流涕以訣又不得已而譴則為之擇地以居求之于今難與
侔矣抑余又聞曩子之介于司徒府奉誠敬于山園上公亟亟
稱于人以為不懈于位今則有儀條以贊其詔相者有備物以
贊其容衛者七月禮畢一朝慶行詰言敬之授以顯秩子獨足
趾一跌而前勞併捐祝網之辰動絳疎目可封之代乃為窮人
斯常情之所悲矧知子之厚者夫陪者思起必諱而求極疾者
思愈必呻而求醫子宜諱於有力而呻於有術如何以箝口自

絕為智以甘心受誣為賢嗾然自咎求知於默被李斯逐焉而為上卿鄒陽囚焉而為上客二子者豈默以求知者邪若可訴而不言則陷於畏可言而不辯則隣於怨畏與怨君子之所不處予其處之哉韓生之言未及竟而小人不知感從中來始赧然以愧又缺然以操終悄然而悲悲斯歎歎斯憤憤必有泄故見乎詞敢聞左右投所閱也嗟夫人之至信者心目也天性者父子也不惑者聖賢也然而于竊鈇而知心目之可亂于撥蜂而知父子之可間于拾煤而知聖賢之可疑况乎道謝孔顏思異天性是非之際愛惡相攻爭先利途虞相軋則釁起希合貴意雖無嫌而謗生魯酒致邶邶之圍飛鳶生博者之禍伯仁之殺由偶對伯奢之寃以吞聲動罹險中皆出意表雖欲周防亦難曲施加以吠聲者多辨實者寡飛語一發臚言四馳萌芽始奮枝葉俄茂方謂語怪終成禍梯嗚呼人必求之不能自達何

投分效節有積塵之難何諧行愛弛有決防之易何將進之日必自見其可而後親何將退之時乃人言其否而遂棄良由邪人必微邪謀必陰陰則難明微則易信罔極大甚古今同途是以前脩鑒其若此姑以推心取信不以循迹生嫌由是求忠臣于孝子求良婦于罵已食子盡節也推其忍可以疑心放麝逮命推其仁可以屬國若謂其孝于親未必能忠專于夫未必能貞忍于子未必能忍于其它仁于獸未必能仁于其類則是天下之人盡不可信而盡可誣固不然也凡人之行已必恒于所安苟非狂易不能甚異小人自居門下僅踰十年未嘗信宿而不侍坐率惟所履固無遁逃言行之間足見真態伏惟推心以明其迹追往以鑒于今苟謂其嘗掩人以自售矣嘗近名以冒進矣嘗欺謾于言說矣嘗沓貪于求取矣嘗狎比其瑣細矣嘗媒孽其僚友矣嘗矯激以賣直矣嘗詰譎以取容矣嘗漏言于

咨諏矣嘗敗務于簿書矣有一于此雖人謂其賢我得而刑也豈止于素乎苟或反是雖人謂其盜我得而任也庸可而棄乎由是而言小人之善否不在衆人所以受譴己還行反半歲當食而歎聞弦尚驚不以衆人之言為是非唯以相公之意為衡準自違間左右亟蒙簡書慰誨勤勤窮頓增感伏想仁念必思有以拯之况禮道貴終人情尚舊嘗盡其力必加以仁於犬馬之微有惟蓋之報顧異於是豈無庶幾儻浮言可以事久而明衆唾可以時久而息弘我大信以祛羣疑使皃皃微志無已矣之歎觀乎異日得夷平民然後裏足西向謝恩有所復以塵纓驚貌稱故吏於相門此言朝遂可以夕死何則復於變者其義重拯於危者其感深睽而後合示終不可睽也否而後泰示終不及否也獲實於己喪得途於既迷與夫平居不為艱故所激者其味異矣伏以大君繼明元宰柄用鴻鈞播平分之氣懸象

廓無私之照渙汗大號與人惟新昭回汪濊旁下郡國投荒為民者咸釋拳拮遂還里閭繫於捐食猶在羈絆伏讀赦令許移近郊今武陵雖京師羸二千者無幾小人祖先塚樹在京索間瘠田可耕陋室未毀濡露增感臨風永懷伏希憫其至誠而少加推恕命東曹補吏置藉於滎陽伍中得奉安輿而西拜先人松楸誓當齋志沒齒盡力於井昫之間斯遂心之願也如或官謗未塞私欲未從雖為裔民乃有善地則北距灃浦資宿春而可行無道途之勤蠲僕債之費重以鎮南用和輔理肅仁風于上游霽嚴施惠得以自遂斯便家之願也伏惟降意詳察擇可行者爰之乞恩于指顧之間為惠有生成之重雖百穀之仰膏雨豈喻其急焉嗟哉小生仕逢聖日豈曰不辰知有相君豈曰不過而乘運鍾否俾躬罹災同生無手足之助終歲有病貧之死孰不求達而獨招嫌孰不求安而獨乘坎賦命如此雖悔可

追湘沅之濱寒暑一候陽雁總到華言罕聞猿哀鳥思啁啾異
嚮莫夜之後併來愁暘懷鄉倦越吟之苦舉目多似人之喜俯
視遺體仰安高堂悲愁惴惴常集方寸盡意之具固不在言身
遠與寡捨茲何託是以因言以見意恃舊以求哀敢希末光下
燭幽蟄孤志多感重恩難忘顧瞻門館慙慙交會伏紙流涕不
知所云禹錫惶悚再拜

獻權舍人書

禹錫在兒童時已蒙見器終荷薦寵始見知名衆之指目忝閣
下閔客懼無以報稱故厚自淬琢靡遺分陰乃今道未施于人
所蓄者志見志之具匪文謂何是用顛顛懇懇于其間思有所
寓非篤好其章句泥溺于浮華時態俗尚病未能也故拙于用
譽直繩朗鑒樂所趨也故銳於求益今謹錄近所論撰凡十數
篇蘄端較是非敢闕于左右猶夫礦朴納于鎔範嘗聞昔宋廣

平之沈下僚也蘇公味道時為繡衣直指使者廣平投以梅花
賦蘇盛稱之自是方列于聞人之目是知英賢卓犖可外文字
然猶用片言借說于先達之口席其勢而後驤首當時矧碌碌
者疇能自異今閣下之名之位過于蘇公之曩日而鄙生所賦
或距于梅花則沈泥于霄懸在指顧間其詞汰而喻僭誠黷禮
也繫藩之乂覲尚舊而霽嚴禹錫惶悚再拜

為京兆李尹答于襄州第一書

閣下以大墓世在三原而去河南益遠尚繫于數百年之外于
義不安遂奮然移羣從率先行古古教為京兆人且命使者脩
敬于鄙薄缺然不敢當此之重拱惟閣下世雄翊易四姓之冠
其宗勳有八柱之貴其碩德有二老之重因都入維錫之土田
自生齒已上列于侯籍與夫其先嘗為編戶民者大殊謹按永
徽格貫在兩都者無害為木部官蓋神州赤縣尊有所厭非它

土之比實待罪輦轂下閣下宣風江漢為諸侯師介圭入覲必
參大政其展禮措事宜為羣倫所觀非據之榮報然汗下不宣
實再拜

第二書

實白前辱閣下書辱自枉屈執州人之禮兼示移羣從書明所
以去河南從京兆為望之旨于古義為得然而通行之自久或
獻疑焉是以前書不敢逡巡牢讓亦有以發閣下之雄辯使儻
然為世旌者今月某日函使至累貽理言大明時入之所以失
而我獨障顏汲而逢其原既一辭不獲命又學淺不堪往復敢
不敬從前史稱以大將軍而有揖客豈不為重循汲直之言則
有以略其理而增高者今鄙人之不讓適有以增閣下之重耳
實白

答饒州元使君書

傳使至蒙致書一函辱示政事與治兵之要明禮以及用通經
以知權視陰陽慘舒之節取震競澤濡之象知天而不泥于神
怪知人而不遺于委瑣先鄉社之治以決于舉郡首隊伍之法
以及于成師猶言教者起一而至萬操律者本黃鍾以極八音
誠通人之說章章必可行者也鄙生涉吏日淺嘗耳剽老成人
之言熟矣今研覆至論淵乎有味非游言架空之徒喜未常不
至拊也故揚權所見以累下執事云蓋豐荒異政繫乎時也夷
夏殊法率乎俗也因時在乎善相因俗在乎便安不知法斂重
輕之道維歲有順成猶水旱也不知日用樂成之義雖俗方阜
安猶蕩析也徒木之信必行則民不惑此政之先也置水之清
必勵則人知敬此政之本也 甯之機或行則姦不敢欺此政
之助也則有以其弛張雄雌雅變所適古之賢而治者稱謂各
異非至當有二也顧遭時不同耳夫民足則懷安安則自重而

畏法乏則思濫濫則迫利而輕禁故文景之民厚其生為吏者率以仁恕顯武宣之民亟於役為吏者率以武健稱其寬猛迭用猶質文循環必稽其弊而矯之是宜審其寃奪耳太史公云身脩者官未嘗亂也然則脩身而不能及治者有矣未有不自己而能及民者今之號為有志於治者咸能知民困於杼袖罷於征徭則曰司牧之道莫先於簡廉奉法而已其或材拘於局促智限於罷懦不能斟酌盈虛使人不倦以不知事為商以清一身為廉以守舊弊為奉法是心清於振闈之內而柄移於胥吏之手歲登事簡偷可理也歲札理叢則潰然攜矣故曰身脩而不及理者有矣若執事之言政詣理切情斥去迂緩簡而通和而毅其修整非止乎一身必將及物也其程督非務乎一切必將經遠也坊民之理甚周而不至皎察字民之方甚裕而不使侵俾知革故之有悔審料民之多撓厚發姦之賞峻欺下之

誅調賦之權不闕於滑吏逋亡之責不遷於豐室因有年之利以敗補汰不急之用以蓄財為邦之要深切著明若此其悉也推是言按是理而篤行之烏有不及治邪古稱言之必可行非樂垂空文耳有人民社稷固可踐其言也瀕江之郡饒為大履番君之故地漸甌越之遺俗餘干音翰有畝鍾之地武林有千童之材其民牟利鬪力狃於輕悍故用暴虐閭重以山茂損苦金豐鑠銑齊民往往投鎡基而即鑿鑄損系泉而工舉擷乘時詭求其息倍稱閭闡主分土者盡寵其利而幹之坐簿書舛錯為中執法所劾事下三府以受賕論其刑甚渥于今列郡不寒而慄彼邦人聆其風聲固曰彼股民者上罪之若此其念民也至矣今二千石以前失職非其罪執事者即入心而用之彼邦人是必翹然須其至而安矣以思治之民過習治之守欲不至於富庶得乎昌黎韓宣莫好實蹈中之士也前為司封郎以餘刃

刺劇于計曹瓚無通事能承其家法而紹明之庭堅仲容之族也坐事為彼郡司馬更閑餘者再焉是必能知風俗之良窳察之善否盍嘗問焉是為群疑之寶龜也至於否臧文律戢玩之戒均權以制動函隸以稔勇平居使不墮萃聚使不譁坐作疾徐心和氣振誠職悉於所示也故置之以須執事異日承進律之命握戡符而駕寅車而後貢其瞽言重曉左右耳

答容州竇中丞書

健步劉子良至猥奉書教以愚為希儒之徒重言一發華衮非貴世之服儒衣冠道古語居學官者為不鮮矣求其知所以然者幾何人偕曰有之未必不詬病耳今夫挾弓注矢邇空而發者人自以為皆羿可矣移之於澤宮則喋而不敢言何哉有的不可欺故也今夫儒者函矢相攻蝸蟻相喧不啻於殼弓射空矢者孰為其的哉異日况道大行則言益重使儒者之的懸於

舌端不得讓也由是知尊教之喜可勝既乎間承得一二易生劉侍絳帳荒服之外持經鼎耒爭捐珠璣以易編簡不疾而速其君子之德風歟而喬環俗已丕變矣顧其風候非民和可移地泄恒燠冬無嚴氣其在嗇神以佑蕪兼味以禦稔所謂養賢以及萬民頤之時義不可不順苟以有待及物為心則養已與養民非二道也矧羣情之顛顛乎禹錫再詳

答柳子厚書

禹錫白零陵守以函置足下書爰來層末三幅小章書僅千言申申疊疊茂勉甚悉相思之苦懷膠結贅聚至是泮然以銷所不如晤言者無幾書竟獲新文二篇且戲余曰將子為巨衡以揣其鈞石銖黍余令而繹之顧其詞甚約而味滄然以長氣為幹文為支跨躒古今鼓行乘空附離不以鑿枘咀嚼不以文字端而曼若而腴倍然以生癯然以清余之衡誠懸于心其揣也

如是子之戲余果何如哉夫矣發乎羿毅而中微存乎它人子
無曰必我之師而能我衡苟能則譽羿者皆羿也可乎索居三
歲理言蕪而不治臨書札札不具禹錫白

與柳子厚書

間發書得第郭師墓誌一篇以為其二獨得於天姿使木聲絲
聲均其所自出抑折愉繹學者無能如繁休伯之言薛訪車子
不能曲盡如此能令鄙夫冲然南望如聞善音如見其師尋文
寤事神驚心得徜徉伊鬱久而不能平嗟夫郭師與不可傳者
死矣弦張柱差楚宜枵然貌存中有至音含糊弗聞噫人亡而
器存布方冊者是已余之伊鬱也豈獨為號師發邪想足下因
僕書重有槩耳不宣禹錫白

答道州薛侍郎論方書書

禹錫再拜初兄出中臺守江華人咸曰函牛之鼎以之烹小鮮

惜乎餘地澶漫而無庸也愚獨心有槩焉以為君子受乾陽健
行之氣不可以息苟吾位不足以克吾道是宜寄餘術百藝以
洩神用其無暇日與得位同久欲以是理求有得於兄而未有
路會崔生來辱書教果惠以所著竒方十通商古今之宜而去
其并猥以一物足以了病者居多非累試輒效不在是族或取
諸胥近亦以攜拾慮恒人多怠忽不省必逮言顯白揚其功於
已然其它立論率以拜病於將然為先而政治為後言君臣必
以時言宣補必以性言砭火必本其輪榮言袪穰必因其風俗
齊和之宜炮剔之良暴灸有陰陽之候煎烹有少多之取撓火

反勞以制馭露置以養潔味有所走薰有所歸存諸纖恙易則

生患非博稽逖覽之士孰能知其所從來哉愚少多病猶省為
童兒時夙其襦袴保母抱之以如醫巫家鍼烙灌餌啞然啼號
巫嫗輒陽陽滿志引手真求竟未知何等方何等藥餌及壯見

里中兒年齒比者必覲然武健可愛羞己之不如遂從世醫號
富於術者借其書伏讀之得小品方於羣方為最古又得藥對
知本草之所自出考素問識榮衛經絡百骸九竅之相成學切
脉以探表候而天機昏淺布指於位不能分累菽之重輕第知
息至而已然於藥石不為惜矣爾來垂三十年其術足以自衛
或行乎門內疾輒良己家之嬰兒未嘗詣醫門求治者須因欲
編次已試者為一家方書顧力不足今允能我先所以辱賜之
喜信踰拱璧有以賞音適道耳常思世人居平不讀一方病則
委千金於庸夫之手至于甚殆而曰不幸豈真不幸耶甚者或
乘少壯之氣笑人言醫以為非急昌言曰飽口飽腹藥其如我
何所承之氣有時而既於禱神佞佛遂甘心焉兄以愚言覆觀
之其人固比肩耳前蒙示藥焙法謹如教地之慝果不能傷雖
菹音柴胡水瀉喜速朽者率久居而無害萬物不可以無法謂生

不由養致其誣乎山川匪遐事使之遠形不接而論者莫賢乎
書臨紙悵悵不宣禹錫再拜

與刑部韓侍郎書

退之從丞相平戎還以功為第一官然猶議者嘆然如未遷陟
此非特用文章學問有以當衆心也乃在恢廓器度以推賢盡
材為孜孜故人心樂其道行行必及物故耳前日赦書下郡國
有棄過之目以大國材富而失職者多千鈞之機固省度而釋
豈鼯鼠所宜承當然譬諸蟄虫坏戶而俯者與夫槁死魚以異
矣春雷一振必歆然翹首與生為徒况有吹律者召東風以薰
之其化更益速雷且奮矣其知風之自乎既得位當行之無忽
禹錫再拜

答連州薛郎中論書儀書

吾兄不知愚無似猥以書見攻其非且曰我與子中外屬當為

伯仲其抵我書執禮太卑按舊儀凡無婦之齒有唯無伏他以是為衰其於匹敵即前云願後云曰而已大歷初李贄皇貫常侍猶守之無渝二公何人也我與子何人也烏有從末俗以姑息為禮而不虞識者所窺邪其有云尔愚得書退而思惟愀然自 曰在恒人為宜而在愚為過豈不能幸歟故盡言於兄期有以相易耳末禮之文為者定宜尊宜卑猶四方上下左右前後稱謂一立古先聖賢所不敢移管敬仲不敢當命卿之饗虞人不敢承士之招先禮而後身也汲黯不為大將軍而虧九卿王祥不為錄尚書而屈三公先道而後時也是則非據之榮雖君命有所不受非道之利雖眾尚有所不為兄長於大曆初嘗接前輩游欲其風采去承平時不甚相遠愚長於貞元中所與游皆後來諸生然猶於稠人廣坐時聞老成人之說灌注耳目斑斑然不絕如綫其後為御史四方諸侯悉以書來賀校其禮

皆駁不同唯洪州牧李常侍巽潭州牧楊中丞憑始言執事其它如儀而同在憲司者咸以二牧為不遜愚時與其僚柳宗元昌言於眾曰監察八品也當衣碧言執事為宜不當經怪眾咸听然而哈復謂愚云子奚不碧其服邪其不堪執事已深不可以言解及謫官十年居僻陋不聞世論所以書相問訊皆昵親密友不容變更而時態高下無從知耳前年祇召抵京師偶故人席夔談因及是事乃知與十年前大殊至有同姓屬尊致書於屬卑而貴者其紙尾言起居新婦變獨竊笑之而已然猶不敢顯言詆之今有人謂東為西者一言發則凡人嗤為騃且狂苟不眾非之則東西易位久矣尊卑失其儀恬而不怪安得使人如東西不敢易之哉曾子有云君子之愛人也以德細民之愛人也以姑息謂古人悉朴且賢則斯言不當發于洙泗間耳蓋三代之尚未嘗無弊由野以至僊豈一日之為漸靡使之然

也嫉其弊而救之以歸于中道必俟乎薦紳先生德與位并者揭然建明之斯易也語曰俟自直之箭則百代無一矢俟自圓之木則千歲無一輪執矯揉之器者視之灌叢無非良材耳竊觀今之人于文章無不慕古甚者或失于野于書流獨陋古而汨于浮二者同出于古而背馳非不能盡如古也蓋為古文者得名聲為今書者無悔吝如水走為關

劉賓客文集卷第十

劉賓客文集卷第十一

表章一
為淮南

杜相公佑脩凡十首

讓同平章事表一首

謝平章事表一首

謝手詔表

詔後
敕親批

謝貸錢物表

請赴行營表一首

謝兵馬使朱鄭等官表一首

賀復吳少誠官爵表一首

賀除度王表一首

慰義陽公主薨表一首

慰王太尉薨表一首

讓同平章事表

臣某言高品吳千金至奉制加臣銀青光祿大夫同中書門下平章事兼徐泗濠等州節度觀察處置等使餘如故者初受恩榮若登霄漢退思塵忝如履春冰臣誠惶誠恐頓首臣聞以德詔官以勞定賞苟或虛授人無勸心臣自守方隅累更時歲荷唐虞宣力之寄乏齊魯報政之能愧無可稱以荅高位豈意聖慈弘獎天澤薦加以燮贊之崇名被庸虛之陋質懼速官謗有

玷大猷伏以宰相之職安危是注其在當否繫于條舒惟以材
升例無平進舉不失德則副蒼生之心苟非其人或致外夷之
哂臣雖愚昧嘗覽前言豈敢昌榮遂安竊位輒思事理冀盡芻
蕘若以汴河要津漕運所切徐方倣擾師旅未寧謹當上稟獻
謀下貞戎律克期而進屈指可平勵衆之先是臣之志既行其
事必在正名所加節制安敢飾讓至於報青貴服金鉉重名勲
蹟無文豈宜濫及伏乞賜寢前命俯亮愚衷微臣遂知止之宜
聖朝無不稱之服名器斯慎退讓有聞遐邇風孰不知勸其
新授官誥謹重封進無任懇禱屏營之至

謝平章事表

臣某言伏蒙獎拔超踐鈞衡慮玷大猷昧死陳讓再奉嚴旨不
令回辭恩厚命較位高責重中謝臣聞天下安危注意將相處
論道興瞻之地蒙總戎作鎮之權雖協夢而求無聞秉鉞之寄

登壇以拜不兼調鼎之榮授受惟艱伊昔猶爾况臣庸瑣何以
克堪陛下玄造曲成大明私照俾掌戎律復叅廟謨寵光之崇
在臣已極毫髮之効於國何施謹當罄竭微誠奉遵至教仗天
威以懾不順敷聖澤以逐群生上分旰食之憂下塞素餐之責
力誠不足心實念茲伏乞皇明俯賜照鑒臣恪居官次遐守藩
維不獲伏謝彤庭陳露丹慊心存闕下同犬馬之戀恩身在淮
濱仰雲天而結思無任懇悃屏營之至

謝手詔表

詔有批云朕自書

臣某言中使闕忠信至奉宣聖旨存問兼賜臣手詔拜捧紫泥
跪伸金簡承旨見聖神之畧感恩知身命之輕中謝臣素乏異
能幸逢昌運猥當旄鉞之寄未靖氛榮分台鼎之名何階啓
沃竊位斯久速尤是虞豈謂玄化曲成鴻私薦及特紆睿思親
洒仙毫降自九重粲然五色初喜麗天之象遠燭輝光旋驚垂

露之蹤曲覃霈澤鸞鳳騫翔而變態煙雲舒卷以呈姿賦彩飛
文聳神蕩目恭惟國寶何幸家藏感枉涕零莫知上荅應緣軍
旅庶務謹具別狀奏聞無任欣戴屏營之至

謝貸錢物表

臣某言中使南宮懷珍至奉宣聖旨存問兼賜臣墨詔天光下
濟敷澤曲流銜恩未酬居寵彌懼中謝臣受任斯極微功莫施
昨以封畧未寧干戈猶動壽春固壘以備盜淮甸興帥以扞姦
經費所資數盈鉅萬餽餉時久供億力殫慮始圖終不敢緘默
輒陳管見上黷宸聰伏蒙聖慈特遂誠請遠承如綵之首特假
聚人之財軍須不愆士氣彌振糗糧既備永無半菽之虞襦袴
足頒遠超挾纊之感是為說使咸願先登臣忝總戎倍百欣荷
伏以上公國用俯濟軍興候清煙塵謹脩饋納

請赴行營表

臣某言臣自守淮濱已周星紀虔奉朝典粗安遐方素效未聞
新恩薦及身曳西綬寄深一隅蚊蚋負山力誠不足鷹鷂逐鳥
志則有餘臣再授兵符夙參軍幕被堅執銳雖未經於戎行制
勝伐謀亦常習於事業自忝藩翰屬時清平無施汗馬之勞但
詠橐弓之什今則幸過殊獎委之專征以身率先是臣素志况
聞徐州士衆本無叛心倉卒之間危疑至此臣請自臨疆場親
領紀綱裂帛繫書諭其禍福推牛饗士養以威聲冀宣皇風煦
茲蠢類以忠義感脅從之伍以含弘安反側之徒革面悅心期
乎不日其揚州留務請令行軍司馬路應權知伏乞聖慈俯賜
照鑒

謝兵馬使朱鄭等官表

初除侍御史續
除中丞封異姓王

臣某言奏事官韋溫迴時蒙聖恩重賜朱鄭等官告宸象昭回
煥然下燭榮分右職光賁遐藩中謝臣伏以朱鄭朴忠為心沈

毅見色當建封禦侮之寄見張惛提孩之年昨者隸職徐州分鎮蘄縣繹騷之際梗亮彌彰歷險而來寔繁其旅詳探本末有足褒稱輒具奏聞恐煩獎勵伏蒙睿鑒俯亮微誠優詔先行已階直指之列殊私薦至超升獨坐之崇戶領三千爵踰五等恩生非次感異常倫轅門有光武旅增氣遂使感激之士希勇爵以捐軀猖狂之徒聆聖澤而後性風行草偃其勢必然臣忝總戎麾倍百欣荷

賀復吳少誠官爵表

臣某言中使宋惟澄至奉宣聖旨存問兼賜臣墨詔及昭示洗雪吳少誠等事天地弘覆燾之恩雷雨施渙汗之澤瑕累咸滌危疑獲安中謝臣伏以少誠擅興兵戈事生註誤自王師致討天威下臨曾無悖辭亟聞引咎初懷疑懼雖擁眾以偷生旋感聖神屢祥章而請命陛下仁深解網慮軫納隍念餽餉飛輓之

勤閔戰爭暴露之苦舉茲宥過之典副彼效順之誠一方承再造之恩九有覩惟新之化敷鴻需而覃及蠢類鼓仁風而臻于太和罷柝銷鋒自茲而始臣謬膺重寄虔守遐藩不獲稱慶瑤墀陳露丹懇仰瞻宸極倍百常情無任慶抃屏營之至

賀除虔王等表

臣某言中使李國真至奉宣聖旨存問兼賜臣墨詔鴻澤浹下大明燭幽曉諭便藩慰安稠疊中謝臣伏覩天書恭承睿旨弘愛人屈己之道酌因時適變之宜擇賢王作徐方俾張惛便主留務上則成邦家磐石之固下則副士衆拜章之請戚藩之寄斯重舊勳之祀獲全丕變猖狂之徒咸濟仁壽之域既弘在宥坐見止戈率士人臣孰不欣說臣素乏方畧謬荷寵光猥塵將相之名無施分寸之績遭逢若此報效蔑聞官謗已興涯刑宜及陛下恩深覆載道務含弘恤公私餽餉之勤念吏士鋒鏑

之苦特紆神筭昭發德音危疑獲安制置惟固好生宥過誠陛下開網之仁尸位無功重微臣素餐之責周章跼蹐胡顏自安但以遐守藩條恪居官次不獲仰謝雲陸陳露血誠未遂周任知止之言敢逃減文竊位之咎無任戰越之至

慰義陽公主薨表

臣某言伏承義陽公主薨伏惟聖懷傷悼增切伏以公主妍姿令則冠絕天人稟教皇宮已挺柔嘉之德降嬪御族益彰貞粹之儀方期作範壺闈長榮邸第豈意邁茲短曆奄謝昌辰伏慮陛下軫念未捐深慈莫遣有虧常膳罷設宮懸臣子之情不任惕戀况聖凡禮異邦家制殊伏願追齊彭殤理達脩短割肌膚之愛慰寰海之心率土人臣孰不相慰無任懇悃屏營之至

慰王太尉薨表

臣某言伏承成德軍節度使太尉兼中書令王武俊今日某日

薨歿伏以武俊生逢昌時天授忠節奮揚義勇茂建勲庸袂冠朝端參燮和於台鉉姻連戚里承嘉慶於雲霄榮掩華夷事高今昔方膺作翰之寄遽迫歸泉之期曷臣云亡梁木斯壞伏惟陛下君臣義重存沒感深臨冊祔以興懷聽鼓鼙而軫念臣恪居官守奉慰無階悲慟之誠有加常品謹遣某官某乙奉表陳慰以聞

劉賓客文集卷第十二

表章二
為淮南

杜相公佑修凡十一首

謝冬衣表一首

謝濠泗兩州割屬淮南表一首

謝曆日面脂表一首

謝墨詔表一首

論廢楚州營田表一首

請朝覲表一首

謝春衣表一首

謝賜門戟表一首

謝男師損等官表一首

謝端午日賜物表一首

謝墨詔表一首

謝冬衣表

臣某言中使王國清至伏奉聖旨慰勞臣及將佐官吏僧道耆
壽百姓等并賜臣墨詔及冬衣兩副大將衣四副者大明昭回
遠燭下土殊錫稠疊延及偏裨慶抃圖捧戴相賀云云臣謬
承委寄獲守藩條灰琯屢移塵霰無補陛下至仁天覆玄化風
薰頒以蕪衣賁茲瑣質降自天府光于轅門緘滕既開觀綵章

之盛飾蹈舞而服發溫煥於祁寒愧塵補袞之名更荷解衣之賜恩波下浹將校同沾共戴殊榮咸思竭節生成是荷雨露難酬無任懇悃慙荷之至

謝濠泗兩州割屬淮南表

臣某言伏奉十一月二十九日詔書其濠泗兩州令臣依前收管臣謬承寵光作鎮淮海位均九伯權總十連內省無堪常恐不逮豈謂恩私曲被封畧有加慙無報政之勤重受分憂之寄伏以兵戈方息閭里未安謹當奉宣皇風慰彼黔首且責成於牧宰期不失於澄清伏惟聖明俯賜照鑒無任感戴屏營之至

謝曆日面脂口脂表

臣某言中使霍子璘至奉宣聖旨存問臣及將佐官吏僧道耆壽百姓等兼賜臣墨詔及貞元十七年新曆一軸臘日面脂口脂紅雪紫雪并金花銀合二銀稜合二皇明遠燭恩錫薦臻抃

舞失容捧戴無措伏惟皇帝陛下立極御人順時布政禮崇大蜡澤浹遐藩臣叨榮日深竊位特久謬回宸眷猥降王人天書下臨覩三光之照耀玉曆受授知四時之環周雕奩既開珍藥斯見膏凝雪瑩含液騰芳頓光蒲柳之容永去癘疵之患命輕恩重上荅何階無任感抃屏營之至

謝墨詔表

臣某言中使陳日華至奉宣聖旨存問兼賜臣墨詔又以臣所奏羅珣及裴靖政理有方今各賜手詔激賞者恩降重霄澤流下土義存獎勸榮冠等夷臣昨以羅珣裴靖勵精吏理效用著明人咸說安俗致殷阜恐頒甄錄以勸在官輒獻封章具陳成績伏蒙敷鑒俯亮愚衷載嘉理行之尤光示絲綸之旨守道者益以固志懷慙者由是悅心激俗化人於茲為大臣謬司廉問職在澄清幸遇旌善之時獲免蔽賢之責無任欣感之至

論廢楚州營田表

臣某言中使曹進玉至奉宣聖旨存問兼賜臣墨詔以楚州營田廢置事令臣商量奏來者跪奉天書恭承敷旨道存致用義在隨時云伏以本置營田是求足食今則徒有糜費鮮逢順成刈獲所收無裨於國用種糧每闕常假於供司較其利害宜察已久比來循守舊制不敢輕有上陳皇明鑒微特革斯弊取其田蓄授彼黎蒸仍俾薄租誠爲至當但以田數雖廣地力各殊須量沃瘠用立程度臣已追里正臣與商量利便謹具別狀奏聞伏惟聖慮俯賜詳擇無任震越屏營之至

請朝覲表

臣某言臣聞臣之事君有犯無隱懇誠所至敢不罄陳伏惟聖明俯賜矜察云臣代受國恩忝承門蔭脫巾筮任敢期榮名陳力効官靡樹聲績始因孤直驟歷清班復加朝獎作藩外府

遠違輦下十有四年恪守淮濱逮今一紀犬馬懷戀寢興匪遑蒲柳易衰遲莫俄及竊位時久妨賢愧深况歷官已來四十八考祇奉朝謁特纔二周服勤郡符荏苒垂老屏營魏闕之思夢想承明之游如迫饑寒不忘衣食伏惟敵鑒俯亮愚衷蚤賜擇人與臣交代授受之際冀無可虞然後脂車奔赴京輦微願斯畢雖死猶生臣頃以戎務方殷猥加宰輔今既事罷實慙此名爲有藩鎮同時未敢輕上印綬伏以聖朝赫赫左右惟賢漢愧得人周慙多士臣才畧既短齒髮又衰柄用之地甘心自絕所冀退歸舊里沐浴皇風絕鐘鳴漏盡之譏展維桑與梓之敬匪惟名器不假實貴骸骨可全知止之心神祇所鑒無任懇悃怔營之至

謝春衣表

臣某言中使陳日華至伏奉聖旨慰勞臣及將佐官吏僧道耆

壽百姓等并賜臣墨詔及春衣兩副大將衣四副王人捧詔御府降衣寵光不隔於遐藩慶賜猥沾於裨將臣素乏器能謬膺驅使每慙效薄常懼食浮陛下單以至仁均其厚施寧元和而布澤順時律以頒衣出自禁中賁于臣下執領禴而拊舞失次被纖柔而顧盼增輝舉體動容既安且吉在身不稱恐招鷄翼之譏居位無功叨受鶴紋之賜下延將校同荷生成

謝賜門戟表

臣某言臣得進奏官裴邁狀報本月九日軍器使梁延壽奉宣進止付所司准省牒賜臣門戟十二竿者恩降雲天榮加門戶承旨慶抃省躬慙惶伏以禮著等威朝有命教是昭懋賚必在疇庸臣謬荷寵光素無績效旌旄之寄已忝外藩祭戟爰列更光私第賁于張闈慶及子孫覩茲盛儀實愧虛受無任欣戴屏營之至

謝男師損等官表

伏奉今月一日制授臣長男師損祕書省著作郎次男式方太常寺主簿又得進奏官裴邁狀報伏承聖恩特降中使送官告到臣宅分付師損者寵渥非常授任不次驚躍無措覩懼失容云臣謬分重寄獲守外藩受恩既深無績可紀男師損等器惟凡品教闕義方蚤沐敷慈已階官次每懷塵忝常誠滿盈豈謂鴻霈曲覃大明私照寬臣尸素之責念臣葵藿之誠下延胤息叨踐班級天書出禁中貴臨門榮冠等夷慶流宗族况著作乃論撰之地唯才史是居太常寔禮樂之司非儒者勿履顧茲庸昧忽此超昇內省慙惶若墜冰谷伏以聖朝立制建官惟賢名實無乖輪轅盡適微臣父子獨為幸人非據踰涯自中徂外虛受丘山之賜實增負乘之憂進退彷徨不知所據無任戰汗屏營之至

謝端午日賜物表

臣某言中使劉光弼至奉宣聖旨慰勞臣及將佐官吏僧道者
壽百姓等兼賜臣墨詔并衣一副金花銀器三事綵絲一軸大
將衣一副綵絲五軸寵光薦至慶賜曲霑拊舞失容捧戴無力
伏以朱明仲日端午佳辰萬國被薰風之和九天垂湛露之澤
臣幸逢休運獲守外藩叨承嚴慈猥受榮賚發詔而煥窺宸象
振衣而頓失炎威色絲表祥戴光於佩服珍器克玩盡飾於圓
方恩輝既盈喜懼交集下延禪將共荷鴻私無任感戴之至

謝墨詔表

臣某言中使陳日華至奉宣聖旨慰勞臣及將佐官吏僧道者
壽百姓等兼賜臣墨詔恩降紫泥澤流下土跪奉自天之命遙
馳捧日之心云云伏以皇帝陛下凝旒穆清軫念黎獻已洽雍
熙之化尚存宵旰之勤遠降王人特迂宸翰慰安稠疊曉諭便

蕃任重力微不知上荅應緣戎旅庶務謹具別狀奏聞伏乞皇
明俯賜照鑒無任感戴屏營之至

劉賓客文集卷第十二

劉賓客文集卷第十三 表章三

為杜司徒讓度支等使表

為杜司徒謝追贈表

為杜司徒讓立去思碑表

為李戶賀獻懿二祖表

為京兆韋尹賀雨止表

為韋尹賀祈晴獲應表

為韋尹謝許祈糴表

為韋尹賀元日祥雪表

為韋尹賀春雪表

為京兆李尹賀雨表

為李中丞謝紫雪等表

為李中丞謝鍾馗等表

為杜相公謝鍾馗等表

為武中丞謝新茶表

為武中丞謝春衣表

為武中丞再謝新茶表

為武中丞謝新橘表

為武中丞謝柑子表

為武中丞謝冬衣表

杜司徒讓度支鹽鐵等使表

臣某言伏奉制書授臣檢校司徒同中書門下平章事充度支

及諸道監鐵轉運等使者臣久塵高位尸素已多更受新恩滿
盈爲懼云云伏惟皇帝陛下詔登寶位光纂鴻猷擢用之間華
夷聳聽况利權所在宜適變通國計是資須明輕重當至化鼎
新之日是微臣遲莫之年將何以上副宸衷下成庶務進退惟
谷永炭在懷輒罄愚誠冀回天監陳力無補靡遵周任之言循
涯若驚敢飾范宣之讓慙惶跼躅倍萬常情謹奉表陳讓以聞

杜司徒謝追贈表

臣某言伏奉制書褒贈臣亡父先臣某官尚書左僕射者時逢
需澤禮極徽章云云臣家受國恩至臣累葉常懼不克負荷以
忝前人豈豈多幸遭逢猥居高位陛下應乾御極作解庇人恩
浹寰區禮成宗廟垂仁布德自葉流根紫書忽降于重霄密印
榮加于厚夜星宿增感蒸嘗有輝非臣殞越所能上報無任感
咽屏營之至

杜司徒讓淮南立去思碑表

臣某言伏見淮南節度使王錡所奏當道將吏僧道耆壽等請
爲臣立去思碑伏奉聖旨允其所奏臣內惟菲薄聲績無聞祇
荷恩私慙懼交至云云臣伏蒙先朝過獎累典方隅頃鎮江都
十有四載數周星紀水旱備經境接淮瀆兵戈時起至於邑里
粗免流離非臣所能悉稟聖化在唐堯可封之日奚假吏師當
漢宣責實之時皆承詔旨王錡與臣交代輒有上聞况以去思
爲名慙無可紀之績伏以建碑有制甲令垂文苟非至公翻益
貽誚臣伏覽故事宋璟自廣州都督入爲尚書南海之人請刊
樂石璟自遜讓至于再三雖勒其文竟從降制著在國典垂爲
美談璟非苟榮人益見德臣才誠不逮心實慕之伏乞聖慈賜
寢前命臣情非飾讓義在徇公云云

京兆李尹賀遷獻懿二祖表

臣某言伏見詔書以今月某日奉遷獻祖懿祖神主祔于德明
興聖皇帝廟盛禮云畢宗祧永安云云伏以太祖景皇帝膺期
撫運啓封于唐爲百代不遷之宗開三靈眷命之兆頃以本朝
初建清廟備儀二祖冠西室之光景皇闕東向之位諸儒獻議
歷載未行陛下濬發獻謨旁延正論爰詔多士會於中臺酌三
禮之前文參百王之故事講貫斯定詢謀僉同撰日展儀考祥
視履配貴神於遠祖正尊位于始封廟貌有嚴禘嘗允穆示人
以孝得禮之中既觀秩秩之容必降穰穰之福臣職居內史屬
忝本枝躬導盛儀獲申誠敬無任感說屏營之至

京兆韋尹賀雨止表

夏解

臣某言今月某日中使吳文政奉宣聖旨緣今年雨多恐傷苗
稼諸有靈跡處並宜祈禱者臣謹檢尋祀典方議編祠惟德動
天脩己澄霽伏以至教惠農兆人務本今歲宿麥茂于常年爰

自季春遂逢多雨蓋陰陽常教有以推遷而隴畝之間未聞傷
敗陛下勞謙思切覆育恩深或慮成災先期軫念昭薦未陳于
方社獻誠已格于上玄文明煥開陰暄潛掃有年之慶實兆于
茲辰先天不違曼超于前代臣謬司京邑虔撫蒸黎欣抃之誠
倍百群品無任踴躍屏營之至

京兆韋尹賀祈晴獲應表

臣某言今月十七日中使某奉宣聖旨以霖雨未時諸有靈跡
並令祈禱者臣當時于興聖寺竹林神親自祈祝兼差官城外
分路編祠伏以神祇效靈景物澄霽兆庶觀動天之德大田俟
多稼之期臣謬荷恩輝忝司京邑抃說之至實倍常情

京兆韋尹謝許祈糴表

臣某言伏奉詔旨以臣祈請畿內祈糴宜令度支計會定數奏
表者天慈廣被久瘼是求臣自理京邑不先威刑唯務便安所

財富庶每因賜對常奉德音府縣之間巨細令奏伏以聖明在上風雨應時順成之年穀糴常賤若無輕重之法必利兼并之家輒敢上奉請行折糴天光下燭幽隱無遺宜付所司允臣所奏事閣理本惠及生靈臣忝尹京倍百欣荷無任歡躍屏營之至

京兆韋尹賀元日祥雪表

臣某言伏以去冬已來久無雨雪臣每於內殿親奉德音以宿麥未滋爲虞以兆人生疾爲念聖情所屬神理皆通獻歲發春佳雪肇降當夷夏會同之日觀天人合應之徵迎喜氣于三元浹歡心於萬國痼疾永息豐阜可期臣以疾疹未平步趨有阻伏蒙恩貸已具奏聞謹於先宅寺中管當本務不獲隨例稱慶明庭既覩嘉祥益彰聖德無任欣躍屏營之至

京兆尹韋賀春雪表

臣某言伏奉詔旨充某郡主禮命賜使謝恩之日親承德音以春初已來雨雪彌少慮妨農事有軫睿慈今當下嫁之辰克致上玄之感雲生河漢及佳期而降祥雪滿寰區應豐年而呈瑞臣官當撫字職在肅雍慶抃之誠實倍常品

京兆李尹賀雨表

臣某言伏奉進旨以時雨愆候有妨耕農應諸有靈跡處並令祈請者德音才發膏雨驟飛滂霈已周動植咸說云伏以久愆時澤上軫聖慈爰命禱祈俾申誠敬神應如響天且不違未與雲漢之詩已致桑林之雨臣謬司京邑虔撫黎蒸觀豐年之可期同比屋而稱慶無任欣抃之至

李中丞謝賜紫雪面脂等表

臣某言中使某乙至奉宣聖旨賜臣紫雪紅雪面脂口脂各一合澡豆一袋特降王人俯臨私第銜恩慶抃省已慙惶云臣

謬荷寵私素無績效空變星霜之候猥霑慶賜之恩跪捧離奩
榮觀珍藥功能去疾永絕於癘疢澤可飾容頓光于蒲柳生成
是荷雨露難酬無任感戴

李中丞謝鍾馗曆日表

臣某言中使某乙至奉宣聖旨賜臣畫鍾馗一新曆日一軸恩
降雲霄先生里巷雖當歲莫如照陽和云云伏以將慶新年聿
循故事續其神象表去癘之方頒以曆書敬授時之始微臣何
幸天意不遺無任感戴屏營之至

杜相公謝鍾馗曆日表

臣某言高品某乙至奉宣聖旨賜臣鍾馗一新曆日一軸星紀
方回雖逢歲盡恩輝忽降已覺春來云云伏以圖寫威神祛除
羣癘頒行肆曆敬授四時施張有嚴既增門戶之貴動用協吉
常爲掌握之珍瞻仰披尋皆知聖澤無任欣戴之至貞元二十

一年十二月日

武中丞相謝新茶表 元衡

臣某言中使竇國安奉宣聖旨賜新茶一斤猥降王人光臨私
室恭承慶賜跪啓緘封云云伏以方隅入貢採掇至珍自遠爰
來以新爲貴捧而觀妙飲以滌煩顧蘭露而慙芳豈蔗漿而齊
味既榮凡口倍切丹心無任歡躍感恩之至貞元二十年三月
日

武中丞謝春衣表

臣某言中使某乙奉宣聖旨賜臣春衣一副王人臨第御府降
衣拊舞失容捧戴無措云云伏以律當春莫慶洽時豈萬物被
薰風之和九天垂湛露之澤受任非次速尤是虞方懷匪服之
憂更荷解衣之賜恩加畫飾拖朱紫而爲榮受非以庸顧形影
而增愧丹誠徒罄玄造難酬無任踴躍屏營之至

武中丞再謝新茶表

臣某言中使某乙奉宣聖旨賜臣新茶一斤猥沐深恩再需殊錫承旨慶抃省躬慙惶伏以貢自外方珍殊衆品效參藥石芳越椒蘭出自仙厨俯頒私室義同推食空荷于曲成責佳素餐實慙于虛受

武中丞謝新橘表

臣某言中使某乙至奉宣聖旨賜臣新橘若干顆特降恩光猥頒慶賜珍踰百果榮比蕪金伏以丹實初成苞貢爰至芬馨味重方列于御筵雨露恩深忽霑于賤品感同推食事等絕其豈唯適口爲珍實冀捐軀上答

武中丞謝柑子表

臣某言中使某乙至奉宣聖旨賜臣柑子若干顆特降殊私再頒名果自遠稱貴以新爲榮伏以方貢外來人間未覩黃苞輝

穎彫俎增華芬芳初佐于大庖慶賜遂沾于凡口其踰萍實剖食既同于楚謠寒比柘漿析醒何慙于漢史感恩思效倍百常情

武中丞謝冬衣表

臣某言中使某乙至奉宣聖旨賜臣冬衣一副恩降重霄榮加陋質承旨慶抃省躬慙惶臣受任已來微效莫著每更時律慙曠官常豈謂玄造曲成鴻私薦及念茲戒寒之候錫以禦冬之衣抃舞失容顧盼增飾鶴文是錫遠慙晋代之賢鷄翼不濡實懼曹風之刺無任感戴屏營之至

劉賓客文集卷第十四 表章四 牋附

為賓中丞謝上表

謝中使送上表

賀收蔡州表

賀赦表

賀赦牋

賀雪鎮州表

賀平淄青表

夔州謝上表

賀冊皇太子表

慰國哀表

賀龍飛表

賀皇太子牋

賀赦表

賀冊太皇太后表

賀冊皇太后表

和州謝上表

賀改元赦表

夔州論利害表二首

為容州賓中丞謝上表

羣時在朗州相逢因以見託

臣某言伏奉某月日制書授臣容州刺史兼御史中丞充本管經畧招討等使臣發開州日已差某官某乙奉表陳謝伏以道

途遐阻水陸縈紆臣以今日某日到本任上訖謹宣聖旨慰諭
遠人臣本書生素無吏術頃因多幸賁自丘園累沐聖慈驟居
清貫識昧通變動率事宜愧無善狀以塞公責伏惟睿聖文武
皇帝陛下凝旒穆清洞照寰海推共理之義分寄股肱念蒸人
之勤溥沾遐邇察臣前任事實恕臣本性朴愚賜以恩輝拔於
廢棄遠辭偏郡重委方隅捧印綬以爲榮望闕庭而增戀雖到
官之始惠未及人而率下之誠務先克己凡施政教皆稟詔條
參以上宜遂其物性可行必守有弊必除使蠻夷生梗之風慕
臣子盡忠之道力誠不足心實在茲伏乞聖明俯賜照鑒無任
感戴屏營之至

謝中使送上表

臣某言中使吐突仕曉至奉宣聖旨慰諭并送臣至本任者深
山遠郡忽降王人跪受恩榮仰瞻宸極伏以發自巴峽至于南

荒涉水陸湍險之途當炎夏鬱蒸之候山川縈轉晝夜奔馳幸
無他疾得至本管九重結戀遙傾捧日之心萬里獲安皆荷自
天之祐無任感戴屏營之至

賀收蔡州表

臣某言伏見詔書以唐州節度使李愬生擒逆賊吳元濟獻俘
文武百僚於興安門列班稱賀者天威遠被元惡就誅一方既
平萬國咸慶伏惟獻聖文武皇帝陛下德超邃古道合上玄臨
御已來天人協贊削平吳蜀掃蕩塞垣車書大同夷狄來貢叢
爾元濟敢懷野心輒聚犬羊苟偷時日陛下聖謨獨運敵感潛
通天助神兵人生勇氣既擒兇逆遂正刑書伏三紀之逋誅成
九轡之壯觀宗社昭告華夷式瞻行弔伐而在禮無違烜威聲
而何城不克楚氛改色淮水安流漠上疲人盡霑雨露汝南遺
老重覩昇平凡在具臣孰不欣抃臣久辭朝列恭守遐藩不獲

稱慶闕庭陳露丹悃仰瞻宸極倍萬羣情無任踴躍慶快之至
元和十二年十二月二十三日

賀赦表

臣某言伏奉今月一日制書大赦天下者聖德廣運決于華夷
天光下臨照彼幽蟄伏惟敷聖文武皇帝陛下神扶寶祚天贊
鴻猷意有所祈之事無不克當惟右凱旋之後是域中慶幸之時
順陽和以發生施需澤於寰海網開三面危疑者許以自新耳
達四聰瑕累者期於錄用求碩畫於廢位慮遺材於放臣旌忠
烈之家賞勲庸之胤仁及枯骨無隔於寇戎榮加顯親普沾於
存沒恤刑已責實廩蠲徭頒錫彰有客之詩崇儒協宗子之望
岳瀆咸秩耆艾飲和大僚承任子之恩武旅荷賜金之寵斯皆
禹湯文武之遺美高祖太宗之耿光集于聖朝然後大備德音
所至和氣隨之歡謠上徹於九天福祚永延於億載能使遠夷

屈膝豈惟小醜革心率土人臣不勝大慶臣久辭闕下恪守海
隅犬馬之誠倍百常品無任抃躍屏營之至

賀赦牋

使持節連州諸軍事守連州刺史劉某惶恐叩頭伏見今月一
日制書大赦天下者伏以獻歲布和皇恩遠降乾坤交泰寰
海廓清伏惟皇太子殿下道冠元良德兼忠孝承顏拜慶榮耀
古今某職守有限不獲隨例稱賀宮庭無任欣說之至元和十
三年正月二十九日

賀雪鎮州表

臣某言伏見四月二十七日德音以王承宗效順著明復其官
爵所獻二郡別置藩垣聖德動天鴻恩及物瑕累咸滌蒸黎永
安伏惟敷聖文武皇帝陛下自承寶位克振皇綱既以四海為
家每念一夫不獲昨因大慶爰降殊私廣宥過之科開自新之

路綸言一發神聖潛通遂令迷誤之徒頓釋憂危之慮命胤子以入侍獻名都以效誠臣心既明天網爲解因祈四郡別爲一方惟懷永圖盡去前弊大河以北化爲禮樂之鄉率土之濱重見昇平之日臣恪居官次遐守嶺隅不獲稱慶闕庭無任踴躍屏營之至

賀平淄青表

臣某言伏見制旨魏博節度使所奏逆賊李師道并男二人並梟斬訖以二月十六日御宣政殿受賀者聖德玄運兵威神速旬月之內鯨鯢就誅泰嶽既寧登封有日伏惟獻聖文武皇帝陛下有征必克舉意無違天地協神美之期雷霆助成師之氣蠢爾孽豎敢生野心繡斧一臨妖氛自滅皆由聖慈廣被敵畧潛通獻俘者盡許生還得地者復令安堵感我神化激其深衷凡是協從盡思效節五紀巢穴一朝蕩夷遂使齊魯之鄉復歸

仁壽之域捷書既至傳首繼來備文物於明庭告殊勲於清廟百辟陳賀萬方會同此止從戈所以爲武西周士庶方觀歆至之容東嶽烟雲已望告成之禮臣恪居遠服嘗忝班行慶快之誠倍萬羣品無任踴躍屏營之至元和十四年三月二十四日

夔州謝上表

臣某言伏奉某月日制書授臣使持節都督夔州諸軍事守夔州刺史跪受天詔神魂震驚伏惟文武孝德皇帝陛下垂衣穆清獻鑑旁達三統交泰百神降祥浹于華夷盡致仁壽臣家本儒素業在藝文貞元年中三忝科第德宗皇帝記其姓名知無黨援擢爲御史在臺三載例遷省官權臣奏用分判錢穀竟坐連累貶在遐藩先朝追還方念淹滯又遭讒嫉出牧遠州家禍所鍾沈伏草土禮經有制羸疾僅存并於獻畝以樂皇化伏遇陛下大明御宇照燭無私念以殘生舉其彝典獲居善部伏感

天慈臣即以今月二日到任上訖硤水千里巴山萬重空懷向日之心未有朝天之路無任感恩戀闕之至長慶二年正月五日

賀冊皇太子表

臣某言伏見制書以十二月二十日冊皇太子盛禮斯畢德音遐宣萬國以貞庶類咸說伏惟文武孝德皇帝陛下體元立極垂訓御時既闡王猷思安國本前星位定拱宸極以昭彰蒼震氣宣與天地而長久禮先七鬯澤被華夷宗祏有無疆之休生靈懷莫大之慶臣恪居官次遐守巴南不獲稱賀闕庭無任踴躍屏營之至長慶三年正月日

慰國哀表

臣某言上天降禍大行皇帝奄棄萬國奉諱號擗糜潰五情伏惟皇帝陛下孝思至性攀號罔極臣忝守所部不獲陪位兩宮

伏增感慕之至謹奉表陳慰以聞長慶四年二月日

賀龍飛表

臣某言伏見詔書正月二十六日皇帝陛下嗣登寶位萬國同歡日月繼明乾坤交泰伏惟皇帝陛下欽承顧命惟懷永圖以大孝奉宗祧以至仁蘇品物洞照寰海統和神人聖祚延長從今無極羣生鼓舞自此太寧臣守遐藩恪居官次不獲奔馳拜舞稱賀闕庭無任抃躍屏營之至長慶四年二月日

賀皇太子踐

使持節都督夔州刺史劉某叩頭伏惟皇太子踐下祇膺詔冊光啓儲闈展至性於三朝承本枝於百代宗祏永固神人以和四嶽仰維嵩之高百川承少海之濶某限以職守不獲隨例稱慶宮庭無任抃躍之至

賀赦表

臣某言伏見今月三日制書大赦天下者大明初昇萬物咸覩
渙汗一發神人以和伏惟皇帝陛下天資獻聖神啓昌期端拱
受萬國之朝承顏奉兩宮之慶初嗣大位克揚孝心三光協明
和氣來應臣伏讀赦令首於奉園陵盡誠敬親九族蘇兆人次
及定章程止進獻已通責滌夙瑕內照于九重則歸嬪媵放鷹
犬外明於四目則求隱士開直聲柔遠以仁則還其係屬賞延
以禮則澤及後昆菲食遵夏禹之規弋絺法漢文之儉墜典咸
舉舊章再因昇平之期正在今日茲號之始疾於春風殊私所
及霑若時雨臣幸逢昌運歷事五朝出守遐藩僅垂二紀欣承
雷雨作解之澤不勝犬馬戀主之誠瞻望帝鄉無任屏營懇悃
之至長慶四年三月二十七日

賀冊太皇太后表

臣某言伏見制書以二月十八日冊立太皇太后徽章克備慶

賜遠行榮冠古今澤周寰海伏惟皇帝陛下繼承列聖歡奉兩
宮太皇太后含飴保和重光疊慶漢儀盛於長信周祚興於太
任方之聖朝彼有慚德臣遠守巴峽不獲稱賀闕庭無任抃躍
屏營之至長慶四年三月日

賀冊皇太后表

臣某言伏見制書以二月一十五日冊立皇太后盛禮畢陳德
音遠被一人有慶萬國同歡伏惟皇太后稟靈作合誕聖表祥
徽號極域中之尊慈仁爲天下之母陛下君臨有國子道無違
長樂宮中永獻南山之壽濯龍門上再揚東漢之風率土臣子
不勝歡抃臣遠守荒服不獲稱慶闕庭無任踴躍屏營之至

和州謝上表

臣某言伏奉制書授臣使持節和州諸軍事守和州刺史臣自
理巴賈不聞善最思私忽降慶抃失容伏惟皇帝陛下丕承寶

祚光闡鴻猷有漢武天人之姿稟周成獻哲之德發言合古舉
意通神委用得人動植咸說理平之速從古無倫微臣何幸獲
親昌運臣業在詞學蚤歲策名德宗尚文擢爲御史出入中外
歷事五朝累承恩光三換符竹在分憂之寄祿秩非輕而素蓄
所長效用無日臣聞一物失所前王軫懷今逢聖朝豈患無位
臣即以今月二十六日到所任上訖伏以地在江淮俗參吳楚
災旱之後綏撫誠難謹當奉宣皇恩慰彼黎庶久於其道冀使
知方伏乞聖慈俯賜照鑒臣遠守清服不獲拜舞闕庭無任懇
悃屏營之至謹差當州軍事衙官章典奉表陳謝以聞長慶四
年十月二十六日

賀改元赦表

臣某言伏見今月七日制書大赦天下者帝遊出震聖澤如春
神人以和天地交泰伏惟皇帝陛下丕承鴻業光闡敵圖吉日

展嚴配之儀告天陳太平之盛九廟成禮百神降祥鑿輅旋衡
風雲改色殊私廣被再弘莫大之恩寶曆惟新更啓無疆之祚
兩宮承慶四海永寧率土臣子千萬壽臣恪居官次不獲稱
賀闕庭無任屏營之至謹差當州軍事衙官試慈州吉昌府別
將徐倫奉表陳賀以聞寶曆元年二月十六日

夔州論利害表

臣某言伏準元和十一年四月十八日赦勅諸州刺史如有利
害可言者不限時節任自上表聞奏者臣伏見貞觀中詔許羣
臣各上書言利便馬周時一布衣遂因中郎將常何獻策二十
餘事太宗深竒之盡行其言擢周爲御史至龍朔中壁州刺史
鄧弘慶進平索看精四字堪爲酒令高宗嘉之亦行其言遷弘
慶爲朗州刺史則知苟有所見雖布衣之賤遠守之微亦可施
用况臣早受國恩德宗朝忝爲御史逮今歷事四朝頻領藩條

當陛下至明之時是微臣竭節之日伏以守在遐郡不敢廣有所陳謹準敕上利害及當州公務各具別狀以聞伏乞聖慈俯賜照鑒無任感激屏營之至謹差當州軍事衙官守易州安義府別將貞外置同正負雲騎尉馮隨謹奉表以聞長慶三年十一月七日

論利害表

臣某言伏準今年正月五日德音宜令諸道觀察使刺史各具當處利害附驛以聞者伏惟皇帝陛下敷哲自天續成列聖善述先志發揚德音率土人臣不勝慶幸臣虔奉詔旨宣示蒸黎伏以華夏不同土宜各異詳求利病謹具奏聞伏乞聖慈俯賜照鑒臣伏覽國史竊見開元十八年朝集使至京玄宗臨軒親問利害時宣州刺史裴耀卿上便宜事論轉輸甚詳竟不行下至二十一年耀卿爲京兆尹再以前事奏論方見允納比及

三年漕運七百萬石省脚二十餘萬貫當耀卿前見不納必有人非之及後數年方展其効臣僻守遠郡敢望言行祇奉詔書或冀萬一伏惟明主擇之無任懇悃屏營之至長慶四年五月十四日

劉賓客文集卷第十五

表章五

賤附

為裴相公賀冊魯王表

為裴相公讓官第一表

并批荅

第二表 并批荅

第三表 并批荅

蘇州謝上表

蘇州謝賑貸表

蘇州賀冊皇太子表

賀冊皇太子賤

為裴相公賀冊魯王表

臣某言伏見制書以今日日冊魯王禮畢皇家有慶賢祚無疆
既榮本枝克固磐石伏惟皇帝陛下德符列聖道冠前王孝敬
承兩宮之歡慶恭奉九廟之祀先崇大禮慶浹天人次念建封
事兼家國伏以魯王夙承敵訓特稟天姿爰擇吉辰光膺寵冊
既示之以君親之道又錫之以禮義之邦寰海聞風室家相慶
臣自嬰疾疹已歷旬時不獲展禮明庭拜舞稱賀

裴相公讓官第一表

并批荅

臣某言臣去冬得疾近日方劇西夕之景豈能久留及其未亂披露誠懇臣犬馬之齒六十有七壽雖不長亦不爲短位忝公台近十五年皆由際會非以才進常懼官謗以招國刑今被病得死保其始終爲幸甚厚豈復嗟咨所恨者遇聖明之君不得佐成太平之化自量氣力忽恐奄然則有微素無階上達伏惟聖慈照鑒憐而察之伏以三公非曠職之地宰相非卧理之官伏枕之初已有陳乞請罷真食兼辭責階伏蒙優詔終遂一事頻降中使慰勉再三專令御醫旦夕診視苟安名器不覺經時主恩則深公議不可伏思陛下臨御之始宰臣四人逮今零落忽已一半臣旦危假餘年幾何唯易直外鎮獨得無恙竊推此理權位難居伏乞賜臣停官許在家養疾就閑辭祿或冀有瘳害盈福諫固是神理儻天眷稠厚念以伏葦多年臣之所陳未蒙便遂則國朝勳舊以疾辭位者皆得致仕使其家居足以順

養既有成例著于舊章伏望天恩特賜哀允

省表具知夫爵位崇高以酬勲德君臣協契諒在始終斯乃前王之令圖有國之彝典也况卿輔相睿祖逮于朕躬履歷四朝夷險一致服事君之大節推濟物之深誠道光朝倫行滿天下倚注之意豈同他人屬朕纂曆御乾興師伐叛騷動累歲端憂靡遑及河朔載寧郊立畢事方欲咨詢元老康靖生靈不虞寒暑所侵勤勞過疾雖國醫診視中口省臨憂屬之誠頃刻在念忽覽章奏退讓官榮雖知止之心則思避寵而謀猷之體斯乃爲時寢食之間勉加願養其所陳乞非朕意焉

第二表 并批荅

臣某言臣所獻章表發於至誠伏奉批荅未蒙允詳外負公責內迫私情祈於必遂敢守難奪臣束髮已來口號強力及其晚

節亦未甚衰一朝被病遂至縣愒臣自思省得其端倪非飲食不節無有霧露之犯益由才微而任重功薄而賞厚竊位既久妨賢則多以積年之過幸致今日之沈疾不能酌損所以生災悟雖已晚情實非矯伏惟陛下念其委使之久察其危苦之詞特降深恩救臣不逮無冒榮之咎得遂性之宜物議不形病心自泰思死俟命披肝再陳伏乞聖慈俯賜容納無任迫切懇禱之至

省表具知卿勲績崇高誠節忠蓋秉心一德宣力四朝訐謨緝熙獨予于理勤勞事國啓沃匪躬功格道光常所嘉尚所疾未瘳勉於善養勿藥之喜佇即痊平台衮之司倚卿爲重乃累陳退讓殊謂不然宜體朕懷即斷表

第三表 并批荅

臣某言得疾踰年在假三月再有陳請未蒙允從慮其奄忽銜

愧入地伏惟聖慈哀而信之臣聞君之使臣在知其心而聽其言不以容尸祿爲惠也臣之事君在無隱情而盡忠節不以受非據爲榮也然後上下交感終始可誅臣伏事陛下五年于茲葵藿微誠已蒙識察桑榆暮景所冀哀憐豈今危愒之時更懼滿盈之禍雖有藥石安得調和聖明難逢生涯漸短體羸無拜舞之望心在有涕戀之悲臣伏覽國史脩見前事太宗朝李靖高宗朝劉仁軌皆自宰臣乞骸致政其後知猶可用復起于家進退之間曲盡情禮君臣之際良史美談伏望陛下悉臣至誠念臣羸病許遂願養以保餘年俟其有瘳或冀萬一無任懇款遑迫之至

省表具悉謝病之制雖起于昔賢盡瘁之詞亦標于古典况卿有功於國作相置朝自匡輔眇躬又勤勞載載豈可以微疾去位以重望辭榮章疏徒來延遲彌切至如太宗朝許李

靖致政高宗朝遂仁執乞骸朕非不知事則有異何者時當明
聖在上理道已成宰臣優游固得自便今則生物尚困庶工
未脩言念勲賢方深倚注惟此故事恐難遽行卿宜體朕誠
懷力更願養必有多福以扶大忠無至確然復陳章表

蘇州謝上表

臣某言伏奉制書授臣使持節蘇州諸軍事守蘇州刺史始從
郎署出領郡章承命若驚省躬增感伏惟皇帝陛下受上玄之
眷佑揚列聖之耿光大康黎元慎擇牧守德音每發品物咸蘇
臣本書生素無黨援謬以薄技三登文科德宗皇帝擢爲御史
在臺三載例轉省官永貞之初權臣領務遂奏錄用蓋聞虛名
唯守職業實無劬附竟坐飛語貶在遐藩憲宗皇帝後知事情
卻授刺史凡歷外任一十餘年伏遇陛下應運重光初無廢滯
收拾耆舊塵忝班行既幸逢時常思展效在集賢院四換星霜

集供御書二千餘卷儒臣之分耳老於典墳優詔忽臨又委之
符竹分憂誠重戀闕滋深石室之書空留筆札金閨之籍已去
姓名本末可明申雪無路豈意 聖慈弘納不隔卑微面辭之
日特許升殿天顏咫尺臣禮兢惶不敢盡言空懷誠懇承恩而
出生光於九陌之間受訓而行布政於五湖之外臣即以今月
六日到任上訖伏以水災之後物力索空臣謹宣皇風慰彼黎
庶臣聞有味之物蠹虫必生有才之人讒言必至事理如此古
今同途了然辨之唯在明聖伏惟陛下察臣此言則天下之人
無不幸甚江海遠地孤危小臣雖雨露之恩幽遐必被而犬馬
之戀親近爲榮大和六年二月六日

蘇州謝賑賜表

臣某言伏奉去年二月十五日敕蘇州宣賜米一十二萬石委
刺史據戶均給者恩降九天澤流萬姓伏以臣當州去年災沴

尤甚水潦雖退流庸尚多臣前月到任奉宣聖旨闔境老幼無
不涕零詢訪里閭備知凋瘵方具事實使欲奏論聖慈憂人照
燭幽遠特有賑卹救其災荒蒼生荷再造之恩儉歲同有年之
慶臣忝爲長吏倍萬常情無任感激抃躍之至大和六年三月
二十四日

蘇州賀冊皇太子表

臣某言伏奉制書以今月十日冊皇太子德音遐布盛禮畢陳
國本永安人心同慶伏惟皇帝陛下以繼天之聖有知子之明
義兼君親禮重宗祏寵搜肇建展嘉禮於三朝鳳曆延長固本
支於萬葉臣守在遐郡不獲稱慶闕庭無任踴躍屏營之至大
和七年八月十七日

蘇州賀冊皇太子牋

朝議大夫使持節蘇州諸軍事守蘇州刺史上柱國劉某叩頭

叩頭伏惟皇太子殿下允膺上嗣光啓東朝蒼震發前星之輝
黃離表重輪之瑞位居守器禮重承祧萬國以貞九圍咸說某
限以守郡不獲稱慶宮庭

劉賓客文集卷第十五

劉賓客文集卷第十六 表章六

蘇州謝恩賜加章服表

蘇州賀皇帝疾愈表

汝州謝上表

同州謝上表

賀臯斬鄭注表

賀德音表

賀赦表

謝恩賜粟麥表

慰淄王薨表

謝恩放先貸斛斗表

謝分司東都表

蘇州謝恩賜加章服表

臣某言伏奉去年十一月二十七日詔書加臣賜紫金魚袋餘如故者恩降重霄榮沾陋質虛黷陟明之典恐興彼已之詩寵過若驚喜深生懼中謝臣起自書生業文入仕德宗朝爲御史以孤直在臺順宗朝爲郎官以緣累出省憲宗皇帝後知其寃特降敕書追赴京國緣有虛稱恐居清班務進者爭先上封者

譖毀巧言易泛孤憤難申俄復一麾外轉三郡伏遇陛下膺期
御宇太振滯淹哀臣宿舊猥見收拾職兼書殿官忝儀曹微勞
未宣薄命多故又離省署重領郡符延英面辭親承教誨銜命
卽路星言再馳到任之初使逢災疫奉宣聖澤恭守照條上稟
獻謀下求人瘼才術雖短憂勞則深倖免流離漸臻完復皆承
聖化所及遂使人心獲安豈由微臣薄劣能致臣素乏親黨家
本孤貧年衰無酒食之娛性拙無博奕之藝自領大郡又逢時
災晝夜苦心寢食忘味曾經誣毀每事防虞唯託神明更無媒
援豈期片善上達宸聰回日月之重光燭江湘之下國絲綸褒
異苦節既彰印綬煒煌老容如少望雲天而拜舞豈盡丹誠視
環玦以裴回空嗟白首無任感激屏營之至大和七年十二月
十六日

蘇州賀皇帝疾愈表

臣某言臣得本道觀察使報伏承聖躬痊愈已於紫宸殿視朝
者一人有慶萬國同歡伏惟皇帝陛下外親萬務內奉三宮常
懷宵旰之勤遂失寢興之適上玄降祐列聖表靈百神奔走以
來扶四海精誠而致感勿藥有喜如山永安宗廟保無疆之休
寰瀛申莫大之慶臣恪居官次遐守江干不獲稱賀闕庭無任
踴躍屏營之至

汝州謝上表

臣某言伏奉去年七月十四日詔書授臣使持節汝州諸軍事
守汝州刺史兼御史中丞充本道防禦使餘如故者臣久居遠
服戀闕常深忽降新恩近鄉爲貴承旨慶抃省躬慙惶臣某誠
歡誠喜頓首頓首伏惟皇帝陛下垂衣穆清之中旁照寰瀛之
內車書所及動植咸安昨離班行遠守江徼延英辭日親奉德
音知臣所部災荒許臣到任條奏共承獻旨宣示群黎減其征

徭頒以賑賜伏蒙聖澤救此天災疲羸再蘇幼艾同感二年連
遭水潦百姓幸免流離交割之時戶口增長雖才術不至於事
未周而憂勞則深為衆所悉臣本業儒素頻登文科時命遭回
再領軍郡即以今月二十七日到任上訖謹當奉宣皇化慰彼
蒼生臨汝水之波朝宗尚阻望秦城之日回照何時無任感激
屏營之至謹差防禦押衙韋禮簡奉表陳謝

同州謝上表

臣某言伏奉去年十月二十二日制書授臣使持節同州諸軍
事守同州刺史兼御史中丞充本州防禦長春宮等使恩降九
重榮忝三輔承旨慶抃省躬慙惶臣某伏惟皇帝陛下丕承列
聖光闡鴻猷氛祲掃除乾坤交泰臣幸逢昌運累沐殊私空荷
生成之恩寧酬雨露之澤即以今月二日到本州上訖謹宣敷
音安慰蒸黎伏以本州四年以來連遭旱損閭閻凋瘵遠近共

知臣頃任蘇州之年亦遭大水之後面辭之日親奉德音至于
撫綏皆承聖教二年之後百姓獲安今本部災荒物力困涸忝
為長吏敢不竭誠即頒條疏續具聞奏臣恪居官次幸接王畿
不獲拜舞彤庭陳露丹慙犬馬懷戀寢興匪寧瞻魏闕之容朝
天尚阻望長安之路近日為榮無任感激屏營之至謹差防禦
知衙官試殿中監楊克文奉表陳謝大和九年十二月二十一
日

批荅省表具知卿任居三輔職奉六條累聞問俗之勞載覽
勤人之志言惟顧行深慰朕懷勉弘故經以副憂寄所謝知

賀臬斬鄭注表

臣某言伏奉前月二十五日詔書示逆賊鄭注已梟首訖氛妖
殄滅華夏又安伏以逆賊鄭注本出細微潛懷梟獍之心兼結
兇狂之黨人倫共棄神理不容陛下獻覽畧感通天合人應重

臣協力禁旅齊心指顧之間猖狂自潰乾坤交泰日月增明凡在人臣不勝慶伏臣恪居官次不獲稱賀闕庭無任欣歡抃躍之至大和元年十二月二日

賀德音表

臣某言伏見今月十六日德音布告遐邇天道下濟人情大安狀惟皇帝陛下凝旒思理垂衣擇材以日月無私之光照寰區有截之內貴使下情盡達寧虞厚貌潛謀一昨李訓鄭注等敢有逆心兼連兇黨陛下敵謀神斷左右協同頃刻之間掃除已定重臣畢力禁旅竭忠氛祲禱廟清華夷咸說言念正刑之外或有誑誤之徒再發德音廣宣聖澤當星紀回天之日迎陽和照物之光懷危疑者如山之安欲告訐者望風知懼非同謀者一切不問未結正者三省從寬含生之倫普天同感臣恪居官次不獲稱慶闕庭云謹差防禦知衙官朝議郎權知容州都督

府司馬孫揚奉表

賀赦表

臣某言伏奉今月一日制書改大和十年爲開成元年大赦天下者雷雨作解人神說隨澤及八荒網開三面臣某誠歡誠喜頓首頓首伏惟皇帝陛下上承乾綱下立人極用舍弘光大之澤副夷夏會同之心獻歲改元惟新景祚先明首罪次及群妖述敵情以曉萬方施鴻需以蘇庶物恤辜宥過已責弛征郡縣之舊弊悉除賦稅之新規咸備停藩方節獻之禮以惠疲人回權管餘羨之財以資京邑命使展澄清之志察言求謹直之材考旌賁于立園粟帛頒于耆艾爰以初告御于明庭德音一發于九天和氣驟周于四海開物成務實表于建元應天順人永延于億載臣幸居近輔先受殊恩不獲稱慶闕庭倍榮班次衆星列位常拱北辰之光新歲拜章遙獻南山之壽無任抃躍屏

營之至

謝恩賜粟麥表

臣某言伏奉今月一日制書以臣當州連年歉旱特放開成元年夏青苗錢并賜斛斛六萬石仰長吏逐急濟用不得非時量有抽歛於百姓者恩降九天澤周萬姓優詔終下羣情頓安臣某誠歡誠喜頓首頓首伏以災殄流行陰陽常數物力既竭人心匪違輒敢奏聞本求貸借皇恩廣被立造曲成既免在田之征仍頒發廩之賜臣謹宣教文節目彰示兆人鼓舞歡謠自中徂外臣初到所部便遇儉時今蒙聖慈特有賑恤主恩及物已爲壽域之人衆意感天有必豐年之應臣恪居官業不獲拜舞闕庭無任感激之至

慰淄王薨表

臣某言臣得進奏官楊陽狀報淄王薨輟朝三日伏惟皇帝陛下德邁前王情深近屬憫枝葉之謝諒切神衷割肌膚之愛何堪聖念萬方知化九族歸仁凡愛國恩伏深悽惻臣恨以藩守不獲奉慰闕庭無任屏營之至

謝恩放先貸斛斗表

臣某言臣奉五月二十九日敕牒據度支所奏諸道節度觀察使及州府借便省司錢物斛斗等數內當州欠三萬六千二十三貫石並放免者殊私忽降逋責滌除藩方永安遐邇咸說臣某誠歡誠喜頓首頓首伏以闕輔之間頻年歉旱田租既須矜放公用又不支持承前長吏例有借便以救一時之急皆成積欠之名既未支填常懷憂懼聖恩周洽洞見物情爰命有司使之條奏去其舊弊衆已獲安嚴立新規人知所措臣恪居官次不獲拜舞闕庭無任抃躍屏營之至

謝分司表

臣某言奉伏今月十九日制書授臣太子賓客分司東都耆寵
命自天戰越無地臣癸迹書生以文爲業出身入仕四十餘年
頃自集賢學士出守吳郡面辭之日親承德音念百姓水潦之
餘示微臣政理之法臣祇膺聖旨夙夜竭誠閭里獲安流庸盡
復猥蒙朝獎錫以金章及遷同州又遇歉旱悉心綏撫幸免流
離今荷天慈憫臣耆舊列名賓護之職分局河洛之都老馬沾
束帛之恩枯株蒙雨露之澤獲居榮秩以畢餘年顧此微軀實
爲厚幸伏以臣始爲御史逮事德宗今忝官寮幸逢聖日舉四
海之內賢能則多求六朝之臣零落將盡雖迫桑榆之景猶傾
葵藿之心臣無任感恩賜抃之至

劉賓客文集卷第十六

劉賓客文集卷第十七狀



為淮南杜相公論新羅請廣利方狀

為京兆韋尹降誕日進衣狀

為京兆李尹降誕日進衣狀

為京兆韋尹進野豬狀

為杜相公自淮南追入長安至長樂駟謝賜酒食狀

為杜相公謝就宅賜食狀

為東都韋留守謝賜食狀

為裴相公進東封圖狀

舉崔監察羣自代狀

舉開州柳使君公綽自代狀

舉姜補闕倫自代狀

蘇州舉揚子韋中丞自代狀

蘇州上後謝宰相狀

蘇州加章服謝宰相狀

汝州上後謝宰相狀

汝州舉杭州裴大夫自代狀

汝州進鷹狀

同州舉蕭諫議自代狀

上宰相賀德音狀

上宰相賀改元赦書狀

薦處士嚴恣狀

薦處士王龜狀

為淮南杜相公論新羅請廣利方狀

淮南節度觀察處置等使敕賜貞元廣利方五卷右臣得新羅賀正使朴如言狀稱請前件方一部將歸本國者伏以纂集神

効出自聖表藥必易求疾無隱狀搜方伎之秘要拯生靈之夭瘥坐比華胥咸躋仁壽遂令絕域遐聽風聲美茲豐功爰有誠請臣以其久稱藩附素混車書航海獻琛既已通於華禮釋病蠲癘豈獨隔於外區正當四海為家冀覩十全之效臣即欲寫付未敢自專謹錄奏聞

為京兆韋尹降誕日進衣狀

衣一副四事黃折造衫一領白吳綾汗衫一領白花羅半臂一領白花羅袴一腰右伏以正陽令月誕聖嘉辰運協千年慶流萬國凡在臣子合有獻陳敢傾就日之心願奉如山之壽輕瀆宸衷無任兢惶

為京兆李尹降誕日進衣狀

衣一副四事右伏以水德方清真龍下降天長地久瞻北極以常尊獻壽稱觴配南山而永固臣地居宗屬職忝尹京慶賀之

誠倍萬常品。前件衣服。謹詣銀臺門奉進。輕裘旒裳。伏用競惶。
貞元十九年四月十九日。

為京兆韋尹進野猪狀

右伏以收獲之餘。田獵有獲。異于芻豢。著在方書。既堪充庖。輒
敢上獻。前件野猪。謹隨狀進。謹奏。

為杜相公自淮南追入長安至長樂驛謝賜酒食狀

具官臣某。右臣今日至長樂驛。高品某奉宣聖旨。賜臣酒食者。
伏以恩降王人。榮分御膳。未展儀于雙闕。先受賜于八珍。品越
膾膳。味香醪醴。拍驚凡口。倍益歡心。無任欣躍。

為杜相公謝就宅賜食狀

具官臣某。右高品某奉宣聖旨。賜臣食者。出自太官。飲于私第。
光榮曲被。猥承推食之恩。駕蹇未施。益重素餐之責。舉其七筮。
若負丘山。無任戰荷。躍踴之至。

為東都常留守謝賜食狀

具官臣某。右臣食今日發至長樂驛。中使某奉宣聖旨。賜臣食
者。伏以味兼海陸。品溢圓方。降自御厨。光臨傳舍。臣初辭魏闕。
倍懷犬馬之誠。猥受珍羞。更切稻粱之感。無任欣躍。

為裴相公進東封圖狀

集賢殿御書院開元東封圖一面。右臣謹按開元十三年。玄宗
皇帝以天下太平。登封東嶽。聲明文物。振耀古今。伏惟陛下。丕
承耿光。再闡鴻業。祖宗盛事。紹復有期。臣所以寫成此圖。輒敢
上獻。至於繪畫。躬自指揮。徵史氏之文。纂禮容之要。山川氣象。
悉擬真形。羽衛威儀。盛稽故實。所異獻情。一覽遐想。玄蹤臣叨
榮過深。抱疾已久。望陛下告成之日。心必前知。嗟老臣將謝之
年。身恐不見。疲羸之際。感激倍深。右件圖。謹差某官某。謹詣光
順門上進。謹奏。

舉崔監察羣自代狀

御史臺宣歙池等州都團練判官監察御史裏行崔羣右臣蒙恩授監察御史伏準建中元年正月五日制常叅官上後三日舉一人自代者伏以前件官在諸生中號爲國器繫維外府人咸惜之臣既深知敢舉自代貞元十九年閏十月日

舉開州柳使君公綽自代狀

尚書屯田某官等守開州刺史柳公綽右臣蒙恩授尚書屯田負外郎伏準建中元年正月五日制常叅官上後三日舉一人自代者伏以前件官以賢良方正再敷王庭在流輩間號爲端士昨除遠郡人皆惜之臣初蒙授官得以論薦多士之內非無其人竊惟用材宜自遠始謹具如前謹錄奏聞伏聽勅旨貞元二十一年四月八日

舉姜補闕倫自代狀

東都尚書省前左補闕姜倫右臣蒙恩授尚書主客郎中分司東都伏準建中元年正月五日敕常叅官上後三日舉一人自代者臣伏詳詔旨欲達聰旁求發揚幽遠故人得言所知不當循其階次也臣伏以前件官有儒學士行蒙以諫官徵會其年老被疾不堪上道有司按視如狀不復逼迫至今家居而篤志無倦臣謹舉爲郎吏分司別都庶優賢振滯兩得其道大和元年六月十四日

蘇州舉韋中丞自代狀

蘇州狀上中書門下諸道鹽鐵轉運江淮留後朝議郎守太僕少卿兼御史中丞上柱國賜紫金魚袋韋應物右臣蒙恩授蘇州刺史伏準建中元年正月五日制刺史上後舉一人自代者前件官歷掌劇務皆有美名執心不回臨事能斷今預職雖重本官尚輕伏以當州口賦首出諸郡况茲災沴切在撫綏尚省

無能輒承公舉司權筦之利誠藉時才流豈弟之風實惟邦本
非承臆說以塞詔書今具聞奏大和六年十二月九日

蘇州上後謝宰相狀

朝議大夫使持節蘇州諸軍事守蘇州刺史上柱國劉某右某
今月六日到州上 訖某山東一書生潦倒疎濶在少壯日猶
不逮人况今衰遲智力愈短相公哀憐不遇擢授名邦實為弘
獎慙非器使伏以當州由大瀆之後物力蕭然飢寒殞仆相枕
于野誓當悉心條理續具奏論才術素空憂勞方始懼無聞問
忝負恩知不任瞻望懇迫之至

蘇州加章服謝宰相狀

右某素乏吏才謬居劇郡以無庸之器當難治之時恭守詔條
勤求人瘼伏以聖德柔遠皇明燭幽凡有上陳皆可具奏遂令
管見得及疲黎自承雨露之恩非有循良之政猥蒙朝獎特降

命章顧逢掖之腐儒被華章之貴服有黷陟明之典誠招彼已
之譏限以守官不獲拜謝瞻望榮感心魂載馳大和七年十二
月日

汝州上後謝宰相表

朝議大夫使持節汝州諸軍事守汝州刺史兼御史中丞充本
州防禦使上柱國賜紫金魚袋劉某右某自領吳郡仍歲天災
上稟詔條下求人瘼地苞藪澤俗尚剽輕悉心撫綏用法擒搃
事繁才短常積憂虞忽蒙天恩稍移近郡家本榮上籍占洛陽
病辭江干老見鄉樹榮感之至實倍常情印綬所拘不獲拜謝
瞻望德宇精誠坐馳無任感戀之至

汝州舉裴大夫自代狀

正議大夫使持節杭州諸軍事守杭州刺史上柱國賜紫金魚
袋裴弘泰右臣蒙恩授汝州刺史兼御史中丞充本州防禦使

伏準建中元年正月五日敕諸州刺史上後舉一人自代者伏以前件官前爲九卿出領兩鎮頃因微累遂有左遷今授遠州物情未塞臣前任鄰接具 公才舊屈未伸輒舉自代云云

汝州進鷹狀

汝州防禦使當使進奉籠母鷹六聯右伏以前件鷹等學習應期馴養斯至獻于常貢有異衆禽受紕之時志已存于雲外下韝之際思用展于霜前既懷百中之能急獻三驅之禮謹差防禦押衙景再休隨狀奉進以聞大和九年九月十一日

同州舉蕭諫議自代狀

同州防禦使前諫議大夫蕭倣右臣蒙恩授同州刺史兼御史中丞充本州防禦長春宮等使伏準貞元二年正月二十四日敕上後三日舉一人自代者伏以前件官生于貴族伏膺儒門搢紳之間號爲端士前蒙朝獎冠于諫垣時方被病不果上道

長告已滿塊然家居今聞疾瘳可以効用臣與倣久同班列悉其材能爲官擇人敢舉自代大和九年十二月四日

上宰相賀德音狀

同州狀上中書門下今月十六日德音右被刑部牒宣示德音伏以聖澤滋深就恩廣被言念正刑之外或有註誤之徒爰降殊私特弘在宥瑕累咸滌危疑獲安此皆廟筭弼諧致君及物事光前史功格上玄某限以守官不獲隨例拜賀無任抃躍之至大和九年十二月二十三日

上宰相賀改元赦書狀

同州狀上中書門下改元赦見右伏奉今月一日制書改大和十年爲開成元年大赦天下者伏以律首三元禮崇四始順陽和發生之德敷大號渙汗之恩宥過恤刑施征已責盡去人瘼通知物情德音朝發於九天和氣夕周於四海此皆相公弼諧

之道燮贊之功進熟於密勿之間發揚成滂沛之澤其恪守官業印綬所拘不獲隨例拜賀

薦處士嚴忠狀

處士嚴忠左右庶子損之之孫國子司業士元之子舊名保嗣亦有官班頃者李賓客渤常與之游辟爲桂州支使其後寄家汝海專靜自居其常典汝州與語甚熟歷代史及國朝故事悉能說通搵心甚危觀跡相副未逢知己已過壯年汨沒風塵有足悲者伏見赦文節目委州郡長史披訪隱淪夫舉無他惟善所在每覽珠英卷後列學士姓名有常州人符鳳白衣在選取其執業不棄遠人某忝被儒官得以薦士亦非出位冀不廢言儻弘文集賢史氏之館採其實學有勸諸生伏以桂州辟之於前某薦之於後豈必有土長吏然後事行伏惟 試味斯言降意詳擇謹狀

薦處士王龜狀

處士王龜古者選公族大夫必以惇惠者教之文敏者道之果敢者諗之鎮靜者循之孜孜于此者蓋膏粱之性難正而懼公侯之胤不能嗣其耿光可以深惜然則成宣之後而老爲大夫非恥乎此智武子誠文子既冠而見之詞也是知古之取士不專寒族必參用世胄以廣得人之路今見處士王龜即居守之第三子也天性貞靜搵心甚危不由門資誓志自立樂處士之號不汨綺襦之間自到洛都便居山寺耽玩墳籍放情烟霞曾邀與語如鋸木屑信有稟受居然出羣以北在京師甚足知者諫院有狀名流亟言其流滯周南靜閱時輩身雖不用心甚愛才况遇相公持衡敢有所啓誠懸之下輕重難欺伏惟深賜詳擇知卿族之內有遺逸焉謹狀正議大夫檢校禮部尚書兼太子賓客分司東都劉某狀

劉賓客文集卷第十七

劉賓客文集卷第十八 啓

上杜司徒啓

上淮南李相公啓

上門下武相公啓

上中書李相公啓

謝門下武相公啓

謝中書裴相公啓

賀門下裴相公啓

上門下裴相公啓

賀門下李相公啓

自西川入為大夫并相

上僕射李相公啓

謝相公裴啓

謝竇相公啓

上杜司徒啓

某啓一自謫居七悲秋氣越聲長苦聽者誰哀湯網雖疎久而猶註失意多病衰不待年心如寒灰頭有白髮惕厲之日利於退藏是以彌年不敢奏記近本州徐使君至奉手筆一函稱謂不移問訊加劇重後點竄一無客言忽疑此身猶在門下收紙

長想欣然感生。尋省遭罹萬重不幸。方寸之地。自不能言。求人見諒。豈復容易。伏蒙遠示。且曰。浮謗漸消。况承慶宥。期以振刷。方今聖賢合德。朝野多歡。澤柔異類。仁及行葦。萬族咸說。獨為窮人。四時平分。未變寒谷。自同類牽復。又已三年。側聞衆情。或以哀歎。某材畧無取。廢錮是宜。若非舊恩。孰肯留念。六翮方鍛。思重託于扶搖。孤桐半焦。冀見收于灰燼。伏紙流涕。不知所言。謹啓。

上淮南李相公啓

某啓。某間以昧于周身。措足危地。駭機一發。浮謗如川。巧言竒中。別白無路。祝網之日。漏息者三。咋舌競魂。分終齋寢。豈意天未勦絕。仁人登庸。施一陽于剝極之際。援衆溺于坎深之下。南箕簸物。不勝昌言。危心鍛駟。絲絲是保。陰施之德。已然乃聞。受恩罔人。盟以死荅。私感竊抃。積於窮年。化摧禮絕。孤志莫展。今幸伍中。牽復司存。字下伏慮。因是記其姓名。謹獻詩二篇。敢聞左右。古之所以導下情。而通比興者。必文其言以表之。雖毗謠俚。旨可儼風什。伏惟降意詳擇。斯大幸也。謹因揚子程留後行。謹奉啓不宣。謹啓。

上門下武相公啓

某啓。去年本州吏人自蜀還。復伏奉示問。兼賜衣服繒綵等。雲水路遙。緘滕既厚。恭承惠下之旨。重以念舊之懷。熙如陽和。列在緗簡。苦心多感。危涕自零。驚神駢思。若侍頴杖。伏以聖上注意。本銳求國禎。念外臺報政之功。追宣室前席之事。重下丹詔。再昇黃樞。羣情合符。和氣來應。八柄所在。三人同心。協台坐之精。膺傑材之教。談笑于規隨之際。從容于陶冶之間。物皆由儀。人識所措。某久罹憲網。兀若枯株。當萬類咸說之辰。抱窮途終慟之苦。清朝無絳灌之列。至理絕椒蘭之嫌。此時不遇。可以言

命嗟乎一身主祀萬里望松楸之鄉高堂有親九年居蠻陌之地從坐之典固有等差同類之中又尋牽復頃在臺日獲奉準繩指吏途于按讞道文律于章奏藻鑑之下難逃陋容炎涼載移足見真態自違闕左右沈淪遐荒歲月滋深艱真彌厲細思受譴之始他人不知屬山園事繁孱懦力竭本使有內嬖之吏供司有恃寵之臣言涉猜嫌動礙閑束城社之勢函矢紛然彌縫其間崎嶇備盡始慮罪因事闕寧虞謗逐跡生智乏周身又誰咎也伏以趙國公頃承一顧之重高邑公夙荷見知之深雖提挈不忘而顯白無自蓋以永貞之際皆在外方雖得傳聞莫詳本末特哀黨錮亟形語言自前歲振淹命行中止或聞輿論亦愍重傷伏遇相公秉鈞輒已自賀儻重言一發清議攸同使聖朝無錮人大冶無廢物自新之路既廣好生之德遠彰群蟄應南山之雷窮鱗得西江之水指顧之內生成可期伏惟發膚

寸之陰成彌天之澤同一瞬之念致再造之恩誠無補於多事之時庶有助於陰施之德無任懇悃之至謹啓

上中書李相公啓

絳

某啓去年國子主簿楊歸厚致書相慶伏承相公言及廢錮愍色甚深哀仲翔之久謫恕元直之方寸思振淹之道廣錫類之依遠聆一言如受華袞伏自不窺墻仞九年于茲高卑邈殊禮數懸絕雖身居廢地而心時至公伏以相公久以訐謨參于宥審材既爲時而出道以得君而享令發於流水之源化行猶偃草之易習強仇者自納於軌物困杼軸者咸躋於仁壽六轡在手平衡居心運思於陶冶之間宣猷於魚水之際然能軫念廢物遠哀窮途嗟哉小生有足悲者內無手足之助外乏強近之親爲學苦心本求榮養得罪由己翻乃貽憂捫躬自劾愧入肌骨禍起飛語刑極淪胥心因病怯氣以愁耗近者否運將泰仁

人持衡伏惟推曾閔之懷憐烏鳥之志處夔龍之位傷屈賈之心沛然垂光昭振幽蟄言出口吻澤濡寰區昔者行葦勿傷枯猶掩哀老以出奠愍窮而開懷無情異類尚或嬰慮顧惟江干逐客曾是相府故人言念材能誠無所取譬諸飛走庸或知恩嗚呼以不駐之光陰抱無涯之憂悔當可封之至理爲永廢之窮人聞弦尚驚危心不定垂耳斯久長鳴孔悲賜回淚盡言不宣意謹啓

謝門下武相公啓

某啓其一坐飛語廢錮十年昨蒙徵還重罹不幸詔命始下周章失圖吞聲咋舌顯白無路豈謂烏鳥徵志剛于深仁恤然動拯溺之懷煦然存道舊之旨言念敵讎慰安蒼黃推以恕心期于造膝重言一發敵聽克從回陽曜于肅殺之辰沃天波于璿璣之際俾移善地獲奉安輿率土知孝治之源羣生識人倫之

厚感召和氣發揚皇風豈惟匹夫獨受其賜某即以今月十一日到州上訖守在要荒拘于印綬巾鞬詣謝有志莫從誠知微生不足酬德捐軀之外無地寄言効節肅屏虔然心禱無任懇悃屏營之至謹勒軍事衙官左威衛慈州吉昌府別將負外置同正負常懇奉啓起居不宣謹啓

謝中書張相公啓

某啓某智乏周身動必招悔一坐飛語如衝駭機昨者詔書始下驚懼失次叫闈無路擠壑是虞草木賤軀誠不足惜烏鳥微志實有可哀伏蒙聖慈遽寢前命移莅善郡載形論言凡在人臣皆感至德凡爲人子同荷至仁豈唯輒生獨受其賜伏以相公心符上德道冠如仁一夫不獲戚見于色密旨未下歎形于言竟回三舍之光能拔九泉之厄袁公之平楚獄不忍錮人晏子之哀越石乃伸知己所以慶垂胤祚言成春秋神理孔昭報

應斯必身侔蟬翼何以受恩死輕鴻毛固得其所卑守有限拜
謝末由無任感激兢惶之至謹勒軍事衙官守左威衛慈州吉
昌府別將員外置同正員常懇奉啓起居不宣謹啓

賀門下裴相公啓

某啓伏以相公含道傑出降神挺生坐籌以弼敵謨秉鉞以行
天討風雲助氣川嶽效靈制勝于尊俎之間指縱于韞韞之末
蕭斧既定衮衣必歸君心如魚水人望如風草一德交決萬邦
和平運神思于鴻鑪納生靈于壽域文武丕績冠于古今某恪
守遐荒不獲隨例拜賀瞻望踴躍無任

上門下裴相公啓

某啓曩者淮右通誅即戎歲久天子齋戒以命元臣登壇之日
上畧前定從九天而下縱以神兵分六符之光掃其長孽授鉞
於西顛之半策勳於北陸之初功成偃節復執大柄君臣相遇

播于樂章山河啓封載在盟府上方注意人益具瞻因魚水之
協符極夔龍之事業時屬四始思覃萬方致君及物其德兩大
古先後賢所未備者我從容而保之殆非人事抑有幽贊夫異
同之論我以獨見剖之文武之道我以上材統之崇高之位我
以大功居之造物之權我以虛心運之然持衡盈之術古所難
也實在陰施及物享其德基以左右功庸而百祿是荷人所欽
載久而愈宜昔袁太尉不忍錮人而楚獄衰息一言之慶子孫
丕承以今日將明之材行前脩博施之義筆端膚寸澤及九垓
猶夫疾耕必有滯穗其頃墜危厄常受恩厚誼盟於心要之自
効常懼廢死荒服永辜願言敢因賀賤一寄丹懇固非竒理不
足以縈于冲襟然則利於行者固在乎常談而卓詭孤特之言
未必利於行也伏惟以愚言與賢者參之謹啓

賀門下李相公啓

自西川入爲
大夫拜相

某啓伏以聖君當功成愷樂之日而求賢愈切思治益深是上
玄垂休欲速致太平之明效以相公事業而逢此時天下之人
視仁壽之域其猶尋尺故命書所至德風隨之微材片善咸自
磨拂况同主國柄如吹埴篲含生之倫唯所措置日月亭午物
無邪陰聖賢合德人識正道雖居畎畝足以詠歌某遐守要荒
不獲隨例拜賀私感竊亦實倍恒情

上僕射李相公啓

某啓州吏還伏蒙擺落常態手筆具書言及貞元中登朝人逮
今無十輩及發中書相公一函其道閣下亟言曩遊顏間頗有
衰色夫溝中之木與犧象同體追琢不至坐成枯薪朱而蓋之
猶足爲器苟液滿曲戾不足枉斧斤願爲庭燎以照嘉客謹啓

謝裴相公啓

某啓某遭不幸歲將二紀雖累更符竹而未出網羅親知見憐
或有論薦如陷還淳動而愈沉甘心終否無路自奮豈意天未
勦絕仁人持衡紆神慮多於方起埋沈於久廢居剥極之際一
陽復生出坎深之中平路資始通藉郎位分曹樂都喬木展舊
國之思行雲有故山之戀姻族相賀壺觴盈門官無責詞始自
今日禽魚之志誓以死生草木之年惜其晷晚章程有字拜謝
無由瞻望岩廊虔然心禱謹啓

謝竇相公啓

某啓某一辭朝列二十三年雖轉郡符未離謫籍卑濕生疾衰
遲鮮歡望故國而未歸如痿人之念起昨蒙罷免其守立園相
公不棄舊遊特哀久廢每奉華翰賜之衷言果蒙新恩重忝清
貫薦延有漸拯拔多方六律變幽谷之寒一九銷彌年之疹鐵
翮將舉危心獲安布武夷途自此而始分曹有繫拜謝無由瞻
望德藩坐馳情爽無任感激之至謹啓

劉賓客文集卷第十八

劉賓客文集卷第十九 集紀

唐故相國李公集紀

唐故中書侍郎平章事韋公集紀

唐故相國贈司空令狐公集紀

唐故尚書主客員外郎盧公集紀

唐故衡州刺史呂君集紀

唐故尚書禮部員外郎柳君集紀

董氏武陵集紀

澈上人文集紀

唐故相國李公集紀

天以正氣付偉人必歸之使光耀于世粹和細縕積于中鏗鏘
發越形乎外文之細大視道之行止故得其位者文非空言咸
繫于訐謨宥密庸可不紀惟唐以神武定天下羣慝既驚驟示

以文韶英之音與鉦鼓相襲故起文章爲大臣者魏文貞以諫諍顯焉高唐以智畧奮岑江陵以潤色聞無草昧汗馬之勞而任過在功臣上唐之貴文至矣後王纂承多以國柄付文士元和初憲宗遵聖祖故事視有宰相器者貯之內庭猶是釋筆硯而操化權者十八九公實得時而光焉公諱絳字深之趙郡人在貢士中傑然有奇表既登太常第又以詞賦升甲科授祕省校書郎歲滿從調有司設甲乙問以觀決斷復居高品補渭南尉擢拜監察御史未幾以本官充翰林學士居中轉尚書主客員外郎歷司勳郎中知制誥遷中書舍人風儀峻整敷奏謹切言事感動上輒目送之一旦召至浴堂門與語半日曰將移用於大位宜稔熟民隱遂出爲戶部侍郎遷中書侍郎同平章事毅然有直聲及免而問望益大周旋公卿間五爲尚書歷御史大夫左僕射一以三公領太常刺近輔居保釐登齋壇皆再爲

大和三年以司空鎮南鄭居二歲坐氣剛玉折海內寬惜之後三年嗣子前京兆府尹戶曹掾琢次子前監察御史裏行頊等泣持遺草請編之聲自從試有司至于宰天下詞賦詔誥封章啓事歌詩贈餞金石颺功凡四百餘篇勒成二十卷上所以知君臣啓沃之際下所以備風雅詩聲之義洪鐘駭聽瑤瑟清音其在翰苑及登台庭亟言大事誠貫理直感通神祇龍鱗收怒天日回照有所謂一言興邦者信哉始愚與公爲布衣游及仕畿服幸公同邑其后雖翔泳勢異而不以名數革初心今考其文至論事疏感人肺腑毛髮皆聳嗚呼其盛唐之遺直歟

唐故中書侍郎平章事韋公集記

漢庭以賢良文學徵有道之士公孫弘條對第一席其勢鼓行人間取丞相且侯使漢有得人之聲伊弘發也皇唐文物與漢同風故天后朝燕國張公說以詞標文苑徵玄宗朝曲江張公

九齡以道侔伊呂徵德宗朝天水姜公公輔杜陵韋公執誼河
東裴公均以賢良方正徵憲宗朝河南元公稹京兆韋公淳以
才識兼茂徵隴西牛公僧孺李公宗閔以能直言極諫徵咸用
對冊甲於天下繼爲有聲宰相古今相望落落然如騎星辰與
夫起寂築飯牛者異矣公本名淳舉進士登第賢良既仕方更
名處厚字德載漢丞相扶陽侯之裔孫后周逍遙公曼之八代
孫江陵節度參謀監察御史裏行贈右僕射其之元子生而聰
明絕人在提孩發言成詩未幾能賦受經於先君僕射學文於
伯舅許公孟容及壯通六經旁貫百氏咨天人之際遂探曆數
明天官窮性命之源以至於佛書尤邃初爲集賢殿校書郎宰
相李趙公監修國史引直東觀就改咸陽尉遷右拾遺轉左補
闕世稱有史才而能諫諍入尚書爲郎歷禮部考功皆人望所
在上方用威武以誓不庭宿兵寢久韋丞相貫之酌人情上言

不合意冊免因歷詆所善公在詠中出爲開州刺史居三年執
友崔敦詩爲相徵拜戶部郎中至關下旬歲間以本官知制誥
穆宗新即位注意近臣召入翰林充侍講學士初授諫議大夫
續換中書舍人侍遊蓬萊池延問大義退而進六經法言二十
篇優詔荅之賜以金紫尋遷權知兵部侍郎知制誥翰林侍講
史館脩撰長慶四年春敬宗踐祚以公用經術左右先帝五年
稔聞其德尤所欽倚內署故事與外廷不同凡言翰林學士必
草詔書有侍講者專備顧問雖官爲中書舍人或他官知制誥
第用其班次耳不竄言於訓詞至是上器公且有以寵之乃使
內謁者申命去侍講之稱慮未諭于百執事居數日降命書重
舉舊官以明新意尋真拜夏官二卿由是內庭詞臣無出其右
者凡密旨必承乎權輿故號承旨學士上富春秋未親爲政或
有凝滯視公如著龜寶曆季年宮壺間一夕生變人情大駭雖

鼎臣無所關決。唯內署得參焉。群議閔及胡貢然。俟公一言而定。

戡難績服。再維乾綱。今上繼明策勳第一。擢拜中書侍郎同中書門下平章事。以高材遇英主。功顯人伏。言無不從。筆端膚寸澤及天下。盡罷冗食。請歸材人。事先得司物。止常貢。城社無託。巖廊益尊。感恩盡瘁。不啻神用。大和二年十二月。上前言事未及畢辭。疾作暴殲。以朝服委地。同列白奏。搢笏扶持之。不能起。上命中貴人左右翼負歸于中書。如大醉狀。上震驚咨嗟。徵醫賜藥。旁午疊委。會莫有與。至第。詰旦以不起聞。贈祿如常禮。後十年。嗣子蕃以太子舍人直弘文館。編次遺文七十通。銜哀貢誠乞詞以冠其首。謹按公文未為近臣。已前所著詞賦讚論記述銘志。皆文士之詞也。以才麗為主。自入為學士至宰相。以往所執筆。皆經綸制置材成潤色之詞也。以識度為宗。觀其發德音。福生人沛然。如時雨。褒元老。諭功臣。穆然如景風。命相之冊。

和而莊。命將之詰昭而毅。薦賢能。其氣似孔文舉。論經學。其博似劉子駿。發十難以摧言利者。其辯似管夷吾。噫。逢時得君。奮智謀以取高位。而令名隨之。豈不偉哉。初。蕃既纂脩父書。咨于先執李習之。請文為領袖。許而未就。一旦習之。撫然謂蕃曰。勳昔與韓吏部退之。為文章盟主。同時倫輩。惟柳儀曹宗元。劉賓客。夢得耳。韓柳之逝久矣。今勳又被病。慮不能自述。有孤前言。齋恨無已。將子薦誠于劉君乎。無何。習之夢奠于襄州。蕃具道其語。余感相國之平昔。且嘉蕃之虔虔孝敬。庶幾能世其家。故不讓云。

唐故相國贈司空令狐公集記

起文章而陟大位。丹青景化。焜耀藩方。如非烟祥風。緣飾萬物。而與令名相終始者。有唐文臣令狐公實當之。公名楚。字懿士。燉煌人。今占教于長安右部。天授神敏。性能無師。始學語言。乃

協宮徵故五歲以爲詩成章既冠參貢士果有名字時司空杜公以重德知貢舉擢居甲科琅邪王拱誠公於童州雅器重之至是拱自虞部正郎領桂州銳于辟賢以酬不次之遇先拜章而後告公既而授試弘文館校書郎公爲人子重難遠行稟命而去居一歲竟迫方寸而歸家在并汾間急于祿養捧從事檄于并州凡更三收官至監察御史元和初憲宗聞其名徵拜右拾遺歷太常博士入尚書爲禮部員外郎性至孝既孤以善居喪聞一月除刑部員外時帝女下嫁相禮闈官公以本官攝博士當問名之答上親臨帳幄簾內以窺之禮容甚偉聲氣朗徹上目送良久謂左右曰是官可用記其姓名未幾改職方知制誥詞鋒犀利絕人遠甚適有旨選司言高第者視草內庭宰臣以公爲首遂轉本司郎中充翰林學士滿歲遷中書舍人專掌內制武帳通奏栢梁陪燕嘉猷高韻冠于一時會淮右稽誅上遣

丞相即戎以督戰公草詔書詞有涉嫌者相府上言有命中書參詳竄定因罷內職歸閣中而君心眷然將有大用且出入以試之乃牧華州兼御史中丞錫以金紫居鎮七月遷大夫充河陽三城懷州節度使又七月急召抵京師拜中書侍郎同中書門下平章事天下然后知上心倚以爲相非一朝也是歲元和十七年秋明年正月憲宗晏駕惜其在位日淺遭時大變穆宗踐祚轉門下侍郎平章事萬幾百度別有所付第以舊相署位充山陵使七月禮畢部下吏有以贓狀聞者朝典用責率之義是以左授宣歙池等州都團練觀察處置使兼御史大夫恩顧一異媒孽隨生旋又貶衡州刺史移郢州轉太子賓客分司東都尋起爲陝虢觀察使或有上封者稱前以奉陵寢不檢下獲譴今陵土猶濕未宜遽用次陝一日重爲賓客分司長慶四年改河南尹其秋授檢校禮部尚書兼汴州刺史充宣武軍節

度管內觀察處置等使。汴州爲四戰之地，擇帥先有功峻刑，右武疑似沉命，號爲危邦者，積年公始以清儉自律，以恩信待人，以夷坦去羣疑，以禮讓汰慘急，自上化下，逮于置郵，泮林革音，無復故態，壘書勞之，就加大司馬。文宗纂服三年冬，上表以大臣未識天子，願朝正月，制曰可。操節入覲，遷戶部尚書，俄爲東都留守，又轉檢校尚書右僕射兼鄆州刺史、天平軍節度使。后以王業之始，實爲北京，移鎮太原，從人望也。以吏部尚書徵，續換太常卿，真拜尚書左僕射。大和九年冬十一月，京師有急兵起，上方御正殿，即日還宮。是夕，召公決事禁中，以見賢通事傳古義爲對，其詞謹切，無所顧望，上心嘉之。居一二日，守本官兼諸道鹽鐵轉運使，以幹利權，既非素尚，乞乞牢讓，故復爲檢校左僕射。興元尹山南西道節度觀察使兼御史大夫，開成二年十一月十二日薨于漢中官舍，享年七十。齊終之前一日，自脩

遺物表，初述感恩陳力之大義，中及朝廷刑政之或闕，意切言盡，神識不昏，上深悼之，形于恩冊，未登三事，故以贈之，歸全之。女有大星殞于正寢之上，光燭于庭，天意若曰：既稟之而生，亦有涯而落，其文章貴壽之氣，焰歟！初憲宗覽國書，見五王復辟之際，狄梁公實尸之，公爲台臣，獨召便殿，問曰：仁傑有后乎？公以其支孫試校書郎，兼謬爲對，即日拜左拾遺。公遂草制，他日相銜者，因挾其詞，以爲非。春秋諱魯之旨，穆宗新即位，謀讓不自決，遂有衡州之貶，公議寬之，嗟乎！天之於賦予也，甚嗇而難周，公獨賦文華於良時，歷名卿，至元老，蓋忠廉孝友，愛才與物，合是粹美，以將之邪？可謂全德矣！既免喪，嗣子左補闕絢，集公之文成一百三十卷，因長子太子左諭德弘分司東都，負其笥來謁，泣曰：先正司空與文人爲顯交，撤懸之前五日，所賦詩寄友，非它人也。今手澤尚存，言之嗚咽，長號予爲之慟，收淚而

視分當編次之始公參大鹵記室以文雄於邊議者謂一方不
足以騁用徵拜於朝累遷曹郎乃登西掖入內署訐謨密勿遂
委魁柄斯以文雄於國也嗚呼咫尺之管文敏者執而運之所
如皆合在藩聳萬夫之觀望立朝賁羣寮之頰舌居內成大政
之風霆導馭澮於章奏鼓洪瀾於訓誥筆端膚寸膏潤天下文
章之用極其至矣而又餘力工於篇什古文士所難兼焉晉王
珣為晉僕射夢人授大筆如椽覺而謂人曰此必有大手筆事
後孝武哀冊文乃珣之詞也公為宰相奉詔撰憲宗聖神章武
孝皇帝哀冊文時稱乾陵崔文公之比今考之而信故以為首
冠尊重事也其它各以類聚著于篇

唐故尚書王客負外郎盧公集記

心之精微發而為文文之神妙詠而為詩猶夫孤桐朗玉自有
天律能事具者其名必高名歸實生故久而益大尚書郎盧公

諱象字緯卿始以章句振起于開元中與王維崔顥比肩驥首
鼓行于時妍詞一發樂府傳貴由前進士補秘書省校書郎轉
右衛舍曹掾丞相曲江公方執文衡揣摩后進得公深器之擢
為左闕補河南府司錄司勳負外郎名盛氣高少所卑下為飛
語所中左遷齊汾鄭三郡司馬入為膳部負外郎時大盜起幽
陵入洛師東夏衣冠不克歸王所為虜劫執公墮脅從伍中初
謫果州長史又貶永州司戶移吉州長史天下無事朝廷思用
宿舊徵拜主客負外郎道病留武昌遂不起故相崔太傅時為
右史方在鄂以文誌其墓其詞曰噫公妙年有聲振耀當代翻
翔雲路不虞矰則層繳盛名先物易生癘疵三年即署坐或遺
羣蹭蹬江臯棲栖沒齒見知者恨之公遠祖元魏北齊後周皆
為帝師公之叔父嵩山逸人諫議大夫顥然真隱者也公下世
後七十三年其孫元符捧遺草來乞詞以表之嘗經亂離多散

落今之存者十有二卷凡若干篇

唐衡州刺史呂君集紀

五行秀氣得之若多者爲俊人其色瀲灩於顏間其聲發而爲文章天之所與有物未相彼由學而致者如工人染夏以視羽畎有生死之殊矣初貞元中天子之文章煥乎垂光慶霄在上萬物五色天下文人爲氣所召其生乃蕃靈芝萐莆與百果齊拆然煌煌翹翹出乎其類終爲偉人者幾希矣東萊呂和叔實生是時而絕人遠甚始以文學震三川三川守以爲貢士之冠名聲四馳遠如羽檄長安中諸生咸避其鋒刃甲科連中芑又愈出德宗聞其名自集賢殿校書郎擢爲左拾遺明年大戎請和上問能使絕域者君以奇表有專對材膺選轉殿內史錫之銀章還拜尚書戶部員外郎轉司封遷刑部郎中兼侍御史副治書之職會中執法左遷緣坐道州刺史以善政聞改衡州年

四十而沒后十年其子安衡泣捧遺草來謁咨余紬之成一家言凡二百篇和叔名溫別字化光祖考皆以文學至大官蚤聞詩禮于先侍郎又師吳郡李質通春秋從梁肅學文章勇於藝能咸有所稔年益壯志益大遂撥去文學與雋賢交重氣槩震名實歆然以致君及物爲大欲每與其徒講疑考要王霸富彊之術臣子忠孝之道出入上下百千年間詆訶角逐疊發連注得一善輒盱衡擊節揚袂頓足信容德色舞于眉端以爲按是言循是理合于心而氣將之昭昭然若揭日月而行孰能闕其勢而爭天光者嗚呼言可信而時異道甚長而命窄精氣爲物其有所歸乎古之爲書者先立言而後體物賈生之書首過秦而荀卿亦後其賦和叔年少過君而卒以謫似賈生能明王道似荀卿故余所先後觀二書斷自入文化成論至諸葛武侯廟記爲上篇其它咸有爲而爲之始學左氏書故其文微爲富豔

夫羿之闢弓。唯巴蛇九日。乃能盡其殼。而同注鸚鵡。亦要夫中於尋常之間。非羿之手。弓有能有不能。所遇然也。後之達解者。推而廣之。知余之素交。不相索於文字之內而已。

唐故尚書禮部員外郎柳君集紀

八音與政通。而文章與時高。下三代之文。至戰國而病。涉秦漢復起。漢之文。至列國而病。痛唐興復起。夫政厖而土裂。三光五嶽之氣。分扶問大音不完。故必混一。而後大振。初貞元中。上方嚮文章。昭回之光。下歸萬物。天下文士。爭執所長。與時而奮。策焉如繁星麗天。而芒寒色正。人望而敬者。五行而已。河東柳子厚。斯人望而敬者歟。子厚始以童子有奇名。於貞元初。至九年。為名進士。十有九年。為材御史。二十有一年。以文章稱。首入尚書。為禮部員外郎。是歲。以疎雋。少檢獲。訕出牧邵州。又謫佐永州。居十年。詔書徵不用。遂為柳州刺史。五歲不得召。病且革。留

書抵其友中山劉某曰。我不幸卒。以謫死。以遺草累故人。某執書以泣。還編次為三十通行於世。子厚之喪。昌黎韓退之誌其墓。且以書來弔曰。哀哉。若人之不淑。吾嘗評其文。雄深雅健。似司馬子長。崔蔡不足多也。安定皇甫湜。於文章少所推讓。亦以退之之言為然。凡子厚名氏與仕。與年暨行已之大方。有退之誌。若祭文。在今附于第一通之末云。

董氏武陵集紀

片言可以明百意。坐馳可以役萬里。工於詩者能之。風雅躰變。而興固古今調殊。而理具達於詩者能之。工出於才。達生於明。二者還相為用。而後詩道備矣。余嘗執斯評為公。是且衡而度之。誠懸乎心。默揣群才。鈞銖尋尺。隨限而盡。如有所閱者百態。一旦得董生之詞。杳如搏翠屏。浮層瀾。視聽所遇。非風塵間物。亦猶明金辭羽。得于遐裔。雖欲勿寶。可乎。生名佖。字庶中。幼嗜

屬詩晚而不衰。心源為鑪，筆端為炭，鍛鍊元本，雕鑿群形。糾紛舛錯，逐意奔走。因故沿濁，協為新聲。嘗所與游者，皆青雲之士。聞名如盧杜。盧員外象，杜員外甫。高韻如包李。包祭酒信，李侍郎紆。進以章句，揚於當時。末路寡徒，值余歡甚。因相謂曰：問者身以廷尉屬為荊州從事，移疾罷去，幽卧於武陵。迄今四年，言未信於世，道不施於人。寓其性懷，播為吟咏。時復發笥，紛然盈前。凡五十篇，因地為目。吾子嘗號知我，盡表而志之。為生羽翼，余不得讓。而著于篇。因系之曰：詩者，其文章之蘊耶？義得而言喪，故微而難能。境生於象外，故精而寡和。千里之繆，不容秋毫。非有的然之姿，可便戶曉。必俟知者，然後鼓行於時。自建安距永明，已還詞人比肩。唱和相發，有以朔風零雨，高視天下。蟬噪鳥鳴，蔚在史策。國朝因之，粲然復興。由篇章以躋貴仕者，相踵而起。兵興已還，右武尚功。公卿大夫，以憂濟為任，不暇器人於文什之間。故其風寢

息。樂府協律，不能足。去聲新詞以度曲，夜諷之職。寂寥無紀，則董生之貧卧于齋土也。其不得於時者歟？其不試故藝者歟？

澈上人文集記

釋子工為詩尚矣。休上人賦別怨約，法師哭范尚書，咸為當時才士之所傾歎。厥後比比有之。上人生於會稽，本湯氏子。聰察嗜學，不肯為凡夫。因辭父母出家，號靈澈。字源澄。雖受經論，一心好篇章。從越客嚴維學為詩，遂籍籍有聞。去聲維卒，乃抵吳興。與長老詩僧皎然游，講藝益至。皎然以書薦于詞人包侍郎信。包得之大喜，又以書致于李侍郎紆。是時以文章風韻主盟於世者，曰包李。以是上人之名，由二公而颺如雲。得風柯葉，張王以文章接才子。以禪理說高人，風議甚雅。談笑多味。貞元中西遊京師，名振輦下。緇流疾之，造飛語激動中貴人。因侵誣得罪。徙汀州。會赦歸東越。時吳楚間諸侯多賓禮招延之。元和十一

年終于宣州開元寺七十有一門人遷之建塔於越之山陰天
柱峯之隈從本教也初上人在吳興居何山與畫公為侶皎然
字清
畫時以時予方以西髦執筆硯陪其吟咏皆曰孺子可教後相
遇于京洛興支許之契焉上人沒後十七年予為吳郡其門人
秀峰捧先師之文來乞詞以志且曰師嘗在吳賦詩僅二千首
今刪取三百篇勒為十卷自大曆至元和凡五十年間接詞客
聞人酬唱別為十卷今也思行乎昭代求一言羽翼之因為評
曰世之言詩僧多出江左靈一導其源護國襲之清江揚其波
法振沿之如么絃孤韻暫入人耳非大樂之音獨吳興畫公能
備衆躰畫公後澈公承之至如芙蓉園新寺詩云經來白馬寺
僧到赤烏年謫汀州云青蠅為弔客黃耳寄家書可謂入作者
閭域豈特雄於詩僧間耶

劉賓客文集卷第十九

劉賓客文集卷第二十

傷我馬詞

口兵戒

猶子蔚邁越戒

又觀博

觀市

論書

劉氏集畧說

名子說

奏記丞相府論學事

澤宮詩

魏生兵要述

救沈志

傷我馬詞

馬乾類蓋健而善馳君子之所宜求為獸也故法求于力或逸
而善駭法求于和或乾而易仆由德稱者之鮮焉曩予知善馬
之難遭也不求于肆而于其鄉一旦果得陰山之阿躡畧其形
蕭然其鳴長顧遠視順而能力顧其軀非騫然而偉也雖士得
以乘之始予被皂衣于朝朝之人多三四其狀以迭馭予無兼

馬水轍之淋漓淖途之汪洋結爲確犖融爲惻堂前有債輶後
崔濡裳我策垂空我鑣方揚振鬣軒昂矯如飛翔翹翹其雄也
非力而何烈火之具舉鈎膺之疊舞一蹊手趾駢比齟齬度者
斯擠捍者斯怒我鞍如山我轡如組猗毛容與宛若孤處靡靡
其柔也非慧而何前日予之獲譴于闕下背商顏趨昭立日中
而踰舍循門之南非騎所宜夷則沮洳高則嶽巖虎跑空林蟻
鬪荒燹風雨孤征簡書之威俾予弗顛我馬是依肩胛其勞也
非德而何予至武陵居沅水之傍或踰月未嘗跨馬以故莫得
伸其所長渴躋顧望兮頓其鎖韁飲斲日削兮精耗神傷寒慙
騷騷兮瘁毛蒼涼路聞踈蹠兮逸氣騰驤朔雲深兮邊草遠意
欲往兮聲不揚墮然似不得其所而死故其嗟也兼常初玄宗
羈大宛而盡有名馬命典牧以時起居泊西幸蜀往民間得其
種而蓄焉故良毛色者率非中土類也稽是毛物豈祖于宛與

漢之歌曰龍爲友武陵有水曰龍泉遂歸骨于是川且弔之曰
生于磧礪善馳走萬里南來困丘阜青菰寒菽非適口病聞北
風猶舉首金臺已平骨空朽投之龍淵從爾友

口兵戒

余讀蒙莊書曰兵莫慘于志莫邪爲下缺然知志士之傷夫生
也它日讀遠祖中壘校尉書曰口者兵也盡然知言之爲兵又
慘乎志因博考前載極其兩端夫志兵之薄人激烈抗憤不過
無從容于世耳口兵之起其刑渥焉繇是知吾祖之言爲急作
戒以書于盤盂五刃之傷藥之可平一言成病智不能明久或
罹兵道塗奔救托方效扶思恐其後人或罹譖比肩狐疑借有
解紛毀輒隨之故曰舌端之孽慘乎楚鉄夷竈城謀執戈以驅
掩人誠智折筭以詈賢者誨子信有其旨發言之難伸舌猶爾
辯爲詐媒默爲德基玉積不啓孰能瑕疵孽麋深居孰謂可唾

戒哉我口之啓爾心之門無爲我兵當爲我藩以慎爲健以忍爲門可以多食勿以多言

猶子蔚適趙戒

猶子蔚晨跪于席端曰臣幼承叔父訓始勺萌至于扶疎前日不自意有司以名汙賢能書又自不意被丞相府召爲從事重兢累媿懼貽叔父羞今當行乞辭以爲戒余曰若知藝器乎始乎斲輪因人規矩刻中廡外楞然而有容者理賦質堅然後加密石焉風戾日晡不副不聲五交然後青黃之鳥獸之飾乎瑤金貴在清廟其用也暮以養潔其藏也積以養光苟措非其所一有毫髮之傷徧然與破甑爲伍矣汝之始成人猶器之作朴是宜力學爲礪斷親賢爲青黃睦僚友爲瑤金忠所奉爲清廟盡敬以爲慕慎微以爲積去怠以護傷在勤而行之耳設有人思披重霄而挹顛氣病無階而升有力者揭層梯而倚泰山然

而一舉足而一高非獨揭梯者所能也凡大位未嘗曠故世多貴人唯天爵并者乃可偉耳夫偉人之一顧踰乎華章而一非亦慘乎黜刑行矣慎諸吾見垂天之雲在爾肩腋間矣昔吾友柳儀曹嘗謂吾文雋而膏味無窮而灸愈出也遲汝到丞相府居一二日袖吾文入謁以取質焉丞相吾友也汝事所從如事諸父借有不如意推起敬之心以奉焉無忽

觀博

客有以博戲自任者逮余觀焉初主人執握槩之器寘于廡下曰主進者要約之既揖讓即次有博齒二異乎古之齒其制用骨觚稜四均鑊以朱墨耦而合數取應暮月視其轉止依以爭道是制也通行之久矣莫詳所祖以其用必投擲故以博投設之是日客抵骨于局且祝之曰其來如趨其去如脫事先趨起命中無蹉跌無從彼呼無戾我但分曹道迫自朝至于日中稷

搜其也 而率與所祝異焉客視骨如有情焉如或馮焉悉詈之不洩又從而齧齧蹂躪之莫顧其十日之咥讓也乃曰非予術之不工是巧器者不予畀也請刷恥于奕棋主人云從命命燭以續驚神默計巧竭智匱主進者書勝負之數于牘視其所喪又倍前籍焉觀者曰以夫人之福心亦將詬棊而抵枰矣既乃恬而不恤赧然有失鵠求身之色人咸異之子劉子曰先人者制人博技是已從人制于人枯棊是已二者豈有數存乎其間哉但處之勢異耳是知當軸者易生嫌而退身者易爲譽易生之嫌不足貶也易爲之譽不足多也亦辨其所處而已

觀市

由命士已上不入于市周禮有焉乃今觀之蓋有因也元和二年沅南不雨自季春至于六月毛澤將盡郡守有志于民誠信而雩遂徧山川方社又不雨遂遷市于城門之遠余得自麗譙

而俯焉肇下令之曰布市籍者咸至夾軌道而分次焉其左右前後班間錯跣如在闔閭制其列 區榜揭價名物參外夷之貨馬牛有絳私屬有閑在中笥者織文及素焉在凡閭者彫形及質焉在筐筥者白黑巨細焉業于饗者列饗饕陳餅餌而苾然業于酒者舉酒旗滌杯盃而澤然鼓刀之人設膏俎解豕羊而赫然華實之毛畋漁之生交蜚走錯水陸羣狀夥名入隊而分韞藏而待價者負挈而求沽者乘射其時者竒贏以游者坐賈顯顯行賈遑遑利心中驚貪目不瞬于是質劑之曹較估之倫合彼此而騰躍之冒良苦之巧言數量衡于儉手抄忽之差鼓舌僨僨詆欺相高詭態橫出鼓翼詳坐煙埃奮羶腥疊巾屨嚙而合之異致同歸雞鳴而爭赴日中而駢闐萬足一心恐人我先交易而退陽光西阻幅負不移經術如初中無求隙地俱唯守犬烏鳥樂得腐餘是日倚衡而閱之感其盈虛之相尋也

速故著于篇云

論書

或問曰書足以記姓名而已工與拙何損益于教哉答曰此誠有之蓋舉下之說爾非蹈中之說亦猶言居室曰避燥濕而已言衣裳曰適寒燠而已言飲食曰充腹而已言車馬曰代勞而已言祿位曰代耕而已今夫考居室必以閭門豐屋爲美筭衣裳必以文章道澤爲甲評飲食必以精良海陸爲貴第車馬必以華輶絕足爲高干祿位必以重侯累封爲意是教者皆不行舉下之說奚獨于書也行之邪禮曰士依于德游于藝德者何曰至曰敏曰孝之謂藝者何禮樂射御書數之謂是則藝居三德之后而士必游之也書居數之上而六藝之一也詩曰飽食終日無所用心難矣哉不有博奕者乎爲之猶賢乎己是則博奕不得列於藝差愈于飽食無所用心耳吾觀今之人適有面

詆之曰子書居下品矣其人必道爾而笑或誓然不屑詆之曰子握藥奕碁居下品矣其人必赧然而媿或靦然而色是故時敢以六藝斥人不敢以六博斥人嗟乎衆尚之移入也問者曰然則彼魏晉宋齊間亦嘗尚斯藝矣至有君臣爭名父子不讓何哉答曰吾姑欲求中道耳子寧以尚之之弊規我與且夫信者美德也秦繆尚之而賢臣莫贖黃老者至道也實后尚之而儒臣見刑道德且不可尚矧由道德以下者哉所謂中道而言書者何處之文學之下六博之上材鈞而善者得以加譽遇一過鈞而善者得以議能所加在乎譽非實也不贖于賞所議在乎過非實也不紊于刑夫如是庶乎六書之學不埋墜而已乎

劉氏集畧說

子劉子曰五達之井百汲而盈科未必涼而其所處之勢然也人之詞待扣而揚猶井之利汲耳始余爲童兒居江湖間喜與

屬詞者游謬以為可教視長者所行止必操觚從之及冠舉秀才一幸而中說有司懼不厭于衆亟以口譽之長安中多循空言以為誠果有名字益與曹輩畋漁于書林宵語途語琴酒調謔一出于文章俄披乃為記室參軍會出師淮上恒磨墨于楮真上或寢羣書中居一二歲由旬服升諸朝凡三進班而所掌猶外府或官課或為人所倩昌言奏記移讓告諭莫神志葵或猥并為及謫于沅湘間為江山風物之所蕩往往指事成歌詩或讀書有所感輒立評議窮愁著書古儒者之大同非高冠長劍之比耳前年蒙恩澤以郡符居海壖多雨惡作適晴喜躬曬書于庭得以書四十通適爾自哂曰道不加益焉用是空文為真可供醬蒙萊楮耳它日子婿博陵崔生閔言曰某也曩游京師偉人多問丈人新書幾何且欲取去而某應曰無有輒媿起于顏間今當復西期有以珥媿者由是刪取四之一為集略以

貽此即非敢行乎遠也

名子說

魏司空王昶名子制誼咸得立身之要前史是之然則書神銘器孰若發言必稱之乎今余名爾長子曰咸允字信臣次曰同虞字敬臣欲爾於人無賢愚于事無小大咸推以信同施以敬俾物從而衆說其庶幾乎夫忠孝之于人如食與衣不可斯須離也豈俟余勗哉仁義道德非訓所及可勉而企者故存名乎夫朋友字之非吾職也顧名者所在遂從而釋之孝始于事親終于事君偕曰臣知終也

奏記丞相府論學事

十一月七日使持節都督夔州諸軍事夔州刺史劉某謹奏記相公閣下凡今能言者皆謂天下少士而不知養材之道鬱埋而不揚非天不生材也亦猶不耕者而歎廩庾之無餘非地不

產百穀也伏以貞觀中增築學舍二百區生徒三千餘人時外夷上疏請遣子弟入附于三雖者五國雖菁菁者莪育材之道不足比也今之膠庠不聞絃歌而室廬祀廢生徒衰少非學官不能振舉也病無貲財以給其用輒生今日一見使太學立富幸過相公在位可以索言之禮云凡學官春釋奠于其先師斯禮止于辟雍類宮非及天下也今四海郡縣咸以春秋上丁有事孔子廟其禮不應于古且非孔子意也炎漢初定羣臣皆起屠販爲公卿故孝惠高后之間置原廟于郡國建孝元時韋玄成以碩儒爲丞相遂建議罷之夫以子孫尚不敢違禮以饗其祖况后學師先聖之道而首違之乎祭義曰以祭不欲教語云祭神如神在與其煩于舊饗孰若行其教道今夫子之教曰顏靡而以非禮之祀媚之斯儒者所宜憤悱也竊觀歷代無有是事皇家武德二年詔于國學立周公孔子廟四時致祭貞觀

十一年又詔 宣尼廟于兗州至二十年許敬宗等奏乃遣天下諸州縣置三獻官其他如方社敬宗非通儒不能稽典禮開元中玄宗嚮學與儒臣議由是發德音其罷郡縣釋奠牲牢唯酒脯以薦后數年令定時王孫林甫爲宰相不涉學委御史中丞王敬從刊之敬從非文儒遂以明衣牲字編在學令是首先于敬宗而終失于林甫習以爲常罕有敢非之者謹按本州四縣一歲釋奠物之直緡錢十六萬有奇舉天下之郡縣當千七百不啻羈縻者不在數中凡歲中所出于經費過四千萬適資三獻官飾衣裳飽妻子而已于尚學之道無有補焉前日詔書許列郡守臣得上言使事今謹條奏其乞下禮官博士詳議典制罷天下縣邑牲牢衣幣如有生徒春秋依開元教旨用酒醴服暇脩膳脯稌粟不敬其事而州府許如故儀然後籍其資半附益所隸州使增學校其半率歸國庠猶不下萬計築學室

其器用豐饗食增學固以備使令凡儒官各加稍食其紙筆鉛
黃視所出州率令折入學徒既備明經日課繕書若干紙進士
命讎校亦如之則貞觀之風粲然不殊其它郡國皆立程督授
故懷重棫撲華良可詠矣伏惟相公發迹咸自諸生其尊素
王之道儀刑四方宜在今日是以小生敢沿故事以奏記于左
右姑舉其大較至于證據纖悉條奏具之章下之日乞留神省
察不勝大願惶恐拜手稽首

澤宮詩

澤宮送士歲貢也晉昌唐如晦以信誼爲良弓文學爲敢矢規
爵祿猶衆禽密殼持滿遡風蜚繳者數矣有措杯之妙而無雙
鷄之獲韞弓收視歸究其術由是跡愈屈而名愈聞君子益多
之彼不由其行一幸而中者雖懸額在庭君子未嘗多也歲殫
矣告予以西予爲賦澤宮一章庶見子之弓弗再張也已秩秩

澤宮有約維鵠祁祁庶士子以干祿彼鵠斯微若止若翔千里
之差起于毫芒我矢旣直我弓旣良依于高墉因我不減高墉
伊何維器與時視之以心誰謂鵠微

魏生兵要述

余爲書殿學士四年所與居皆鴻生彥士一旦詔下懷吳郡章
而東門下生咸惜是行且曰吳中富士必有知書宜爲太守所
禮者及下車閱客籍森然三千有鉅鹿魏生持所著書來謁曰
不佞始讀書爲文章凡二十年在貢士中孤鳴甚哀卒無善聽
者退而收視易慮伏北窗下考前言成兵要十編度諸侯未遑
是事將笈而西求一言以生羽翼予取書觀之始自黃帝伏蚩
尤終于隋氏平江南語春秋戰國事最備磅礴下上數千年間
其擔據評議無遺策用裹以干握兵符貴人宜有虛己而樂聞
者子盍行乎吾知元侯上舍不獨善雞鳴殫長缺三五九九之

彼顛之而已

救沈志

貞元季年夏大水熊武五溪鬪洪于沉突舊防毀民家躋高望之溟滓葩華山腹爲坻林端如莎湍道駛悍不風而怒崩巖前邁浸滂旁掩柔者靡之固者脫之規者旋環之矩者倒顛之輕而泛浮者礮磕之重而高大者前卻之生者力音殪者死形蔽流而東若木柯然有僧愀然爲誓于路曰浮圖之慈悲救生最大能接彼于溺我當爲魁里中兒願從四三輩皆狎川勇游者相與乘堅舟挾善器維以脩紜杙于崇立水當洄泝人易寘力凝臚執用俟可而拯大凡室處之類穴居之彙在牧之羣在豢之馴上羅黔首下逮毛物技乎洪濶致諸生地者數十百焉適有擊獸如鷓夷而前攫持流拏首用不陷隅目傍睨其姿弭然甚如六擾之附人者其徒將取焉僧趣音促訶之曰第無濟是爲

日之可里所而不能有所持矣舟中之人曰吾聞浮圖之教貴空空生普普生慈不求報施之謂空不擇善惡之謂普不逆困窮之謂慈邠也生必救而今也窮見廢無乃計善惡而忘普與慈乎僧曰甚矣問之迷且妄也吾之教惡乎無善惡哉六塵者在身之不善也佛以賊視之末伽聲聞者在彼之未寤也佛以邪目之惡乎無善惡也吾鄉也所援而出死地者衆矣形乾氣還各復本狀蹄者躑躅然羽者翹蕭然而言者譏談然隨其所之吾不尸其施也不德吾則已焉能害爲彼形之乾髮鬚之姿也彼氣之還暴悖之用也心足反噬而齒其最靈是必肉吾屬矣庸能躑躅譏談之比歟夫虎之不可使知恩猶人之不可使爲虎也非吾自貽患焉爾且將貽患于衆多吾罪大矣子劉子曰余聞善人在患不救不祥惡人在位不去亦不祥僧之言遠矣故志之

劉賓客文集卷第二十

劉賓客文集卷第二十一

雜興三十一首

學阮公歎三首

少年負志氣，信道不從時。只言繩自直，安知室可欺。百勝難慮敵，三折乃良醫。人生不失意，焉能慕已知。
朔風悲老驥，秋霜動驚禽。出門有遠道，平野多層陰。滅沒馳絕塞，振迅拂華林。不因感衰節，安能激壯心。
昔賢多使氣，憂國不謀身。日覽千載事，心交上古人。侯門有仁義，靈臺多苦辛。不學腰如磬，徒使甑生塵。

偶作二首

終朝對尊酒，嗜興非嗜甘。終日偶衆人，縱言不縱談。世情閑盡見，藥性病多諳。寄謝稽中散，予無甚不堪。
萬卷堆牀書，學者識其真。萬里長江水，征夫度要津。養生非但

藥悟佛不因入燕石何須辨逢時即至珍

古詞二首 一作諷古

軒后初冠冕前旒爲蔽明安知從復道然後見人情
薄領乃俗士清談信古風吾觀蘇令綽朱墨一何工

寓興二首

常談即至理安事非常情寄語何平叔無爲輕老生
世途多禮教鵬鷃各逍遙何事陶彭澤拋官爲折腰

昏鏡詞 并引

鏡之工列十鏡于賈奩發奩而視其一皎如其九霧如或曰良
楛之不侔甚矣工解頤謝曰非不能盡良也蓋賈之意唯售是
念今來市者必歷鑒周疎求與己宜彼皎者不能隱芒杪之瑕
非美者不合是用什一其數也予感之作昏鏡詞

昏鏡非美金漠然喪其晶陋容多自欺謂若他鏡明瑕疵闇不

見妍態隨意生一日四五照自言美傾城飾帶以綺繡裝匣以
瓊瑛秦宮豈不重非適乃爲輕

養鷲詞 并引

途逢少年志在逐 絕句方呼鷹隼以襲飛走因縱觀之卒無所獲
行人有常從事於斯者曰夫鷲禽飢則爲用今哺之過篤故然
者也余感之作養鷲詞

養鷲非玩形所資擊鮮力少年昧其理日夜哺不息探羅網黃
口旦莫有餘食寧知下韝時翅重飛不得韝上林表狡兔自
南北飲啄既已盈安能勞羽翼

武夫詞 并引

有武夫過詭余以從軍之樂翌日質于通武之善經者則曰果
有樂也夫威恣而賞勞則樂用威雄而賞醜則樂橫 去顧其樂
安出耳余惕然作是詞

武夫何沈沈衣紫襲絳裳借問胡爲爾列校在鷹揚依倚將軍
勢交結少年場探九害公吏袖刃妒名倡家產既不事顧盼自
生光酣歌高樓上袒裼大道傍昔爲編戶人秉耒耳哺糠今來
從軍樂躍馬殷持梁猶思風塵起無種取侯王

賈客詞 并引

五方之賈以財相雄而鹽賈尤熾或曰賈雄則農傷余感之作
是詞

賈客無定遊所遊唯利并駭俗雜良苦乘時取重輕心計析秋
毫搖鈎伴懸衡錐刀既無棄轉化日已盈徽福禱波神施財遊
化城妻約雕金釧女垂貫珠纓高資比封君奇貨通倖卿趨時
驚鳥思藏錘盤龍形大編浮通川高樓次旗亭行止皆有樂關
梁自無征農夫何爲者辛苦事寒耕

調瑟詞 并引

里有富豪翁厚自奉養而嚴督臧獲力屈形削然猶後之無藝
極一旦不堪命亡者過半追亡者亦不來復翁頽沮而追昨非
之莫及也余感之作調瑟詞

調瑟在張絃弦平音自足朱絲二十五闌一不成曲美人愛高
張瑤軫再三促上弦惟獨響下應不相屬日莫聲未和寂寥一
枯木却顧膝上弦流淚難相續

讀張曲江集作 并引

世稱張曲江爲相建言放臣不宜與善地多從五溪不毛之鄉
及今讀其文自內職收始安有瘡癘之歎自退相守荆門有拘
囚之思託諷禽鳥寄詞草樹鬱然與騷人同風嗟夫身出于遐
陬一失意而不能堪矧華人士族而必致醜地然後快意哉議
者以曲江爲良臣識胡雛有反相羞凡器與同列密放廷爭雖
古哲人不及而燕翼無似終爲餒鬼豈知心失忠恕陰譴最大

雖二美莫贖邪不然何袁公一言明楚獄而鍾鼎四葉以是相
較神可誣乎余讀其文因爲詩以弔

聖言貴忠恕至道重觀身法在何所恨色相斯爲仁良時難久
恃陰譎豈無因寂寞韶陽廟魂歸不見人

庭梅詠寄人

早花常犯寒繁實常苦酸何事上春日坐令芳意闌天桃定相
笑遊妓肯回看君問調金鼎方知正味難

詠古二首有所寄

車音想鞞鞞不見綦下塵可憐平陽第歌舞嬌青春金屋容色
在文園詞賦新一朝復得幸應知失意人

寂寥照鏡臺遺基古南陽真人昔來遊翠鳳相隨翔日成在桑
野志遂貯椒房豈無三千女初心不可忘

詠史二首

驃騎非無勢少卿終不去世道劇顛波我心如砥柱
賈生明王道衛綰工車戲同過漢文時何人居貴位

苦雨行

悠悠飛走情同樂在陽和歲中三百日常恐風雨多天人信遐
遠時節易蹉跎洞房有明燭無乃酣且歌

萋兮吟

天涯浮雲生爭蔽日月光窮巷秋風起先摧蘭蕙芳萬貨列旗
亭恣心注明璫名高毀所集言巧智難防多謂行大道斯須成
太行莫吟萋兮什徒使君子傷

經檀道濟故壘

萬里長城壞荒營野草秋秣陵多士女猶唱白符鳩史云當時
人歌曰可

憐白符鳩枉
殺檀江州

題歌器圖

秦國功成思稅駕晉臣名遂歎危機無因上蔡牽黃犬願作丹徒一布衣

聚蚊謠

沉沉夏夜蘭堂開飛蚊伺暗聲如雷嘈然歛起初駭聽殷殷若自南山來喧騰鼓舞喜昏黑昧者不分聰者惑露花滴瀝月上天利觜迎人着不得我軀七尺爾如芒我孤尔衆能我傷天生有時不可遏爲尔設幄潛匡牀清高一來秋日曉羞尔微形飼丹鳥

百舌吟

曉星寥落春雲低初聞百舌間關啼花柳滿空迷處所搖動繁英墜紅雨笙簧百轉音韻多黃鸝吞聲燕無語東方朝日遲遲升迎風弄景如自矜教聲不盡又飛去何許相逢綠楊路綿蠻宛轉侶娛人一心百舌何紛紛醜顏俠少停歌聽墜珥妖姬和

睡聞可憐光景何時盡誰能依回避鷹隼廷尉張羅自不關潘郎挾彈無情損天生羽族尔何微舌端萬變乘春輝南方朱鳥一朝見索漠無言蒿下飛

飛鳶操

鳶飛杳杳青雲裏鳶鳴蕭蕭風四起旗尾飄揚勢漸高箭頭若劃聲相似長空悠悠霽日懸六翮不動凝飛烟遊鷗翔雁出其下度雲清景相回旋忽聞飢鳥一噪聚瞥下雲中爭腐鼠騰音礪吻相喧呼仰天大嚇慘鴛雛畏人避犬技高處俛吻無聲猶屢顧青鳥自矜玉山禾仙禽徒貴華亭露撲棟危巢向暮時趨趨飽腹蹲枯枝遊童挾彈一麾肘臆碎羽分人不悲天生衆禽各有類威鳳文章在仁義鷹隼儀形螻蟻心雖能戾天何足貴

秋螢引

漢陵秦苑遙蒼蒼陳根腐葉秋螢光夜空寥寂金氣淨千門九

陌飛悠揚紛綸暉映互明滅金鑪星噴鐙花發露華洗濯清風
吹低昂不定招搖垂高麗采摠照蛛網斜歷璇題舞羅幌曝衣
樓上拂香帚承露臺前轉仙掌槐市諸生夜讀書北窓分明辨
魯魚行子東山起征思中郎騎省悲秋氣銅雀人歸自入簾長
門帳開來照淚誰言向晦常自明童兒走步嬌女爭天生有光
非自銜遠近低昂暗中見撮蚊祆鳥亦夜飛翅如車輪而已佈

華山歌

供鑪作高山元氣鼓其索俄然神功就峻拔在寥廓靈蹤露指
爪殺氣見稜角凡木不敢生神仙聿來託天資帝王宅以我爲
開鑰能令下國人一見換神骨高山固無限如此方爲嶽丈夫
無特達雖貴猶碌碌

磨鏡篇

流塵翳明鏡歲久者如漆門前負局人爲我一磨拂萍開綠池

滿暈盡金波溢白日照空心圓光走幽室山神袂氣沮野魅真
形出却思未磨時瓦礫并唐突

有獺吟

有獺得嘉魚自謂天見憐先祭不敢食捧鱗望清玄人立寒沙
上心專脰肩有漁翁以爲妖塊投其前呼兒貫鰓歸與獺同
烹煎關閑黃金鷄大翅格江烟下見盈尋魚投身孽洪漣攫拏
隱嶙去哺雛林岳巔鷓鴣欲伺隙遙噪莫敢前長居青雲路彈
射無由緣何地無江湖何水無鮪鱸天意不宰割菲祭徒虔虔
空餘知禮重載在淹中篇

劉賓客文集卷第二十二

五言今體三十首

春日退朝

紫陌夜來雨南山朝下看
戟枝迎日動閣影助松寒
瑞氣卷綃縠遊光泛波瀾
御溝新柳色處處拂歸鞍

經東都安國觀九仙公主舊院作

仙院御溝東今來事不同
門開青草日樓閉綠楊風
將火昇天路披霓赴月宮
武皇曾駐蹕親問主人翁

蜀先主廟

漢末謠黃牛白腹五銖當復

天下英雄氣千秋尚凜然
勢分三足鼎業復五銖錢
得相能開國生兒不象賢
淒涼蜀故妓來舞魏宮前

觀八陣圖

軒皇傳上畧蜀相運神機
水落龍蛇出沙平鵝鶴飛
波濤無動

勢鱗介避餘威會有知兵者臨岐指是非

八月十五夜翫月

天將今夜月一遍洗寰瀛暑退九霄淨秋澄萬景清星辰讓光彩風露發晶英能變人間世儵然是玉京

許給事見示哭工部劉尚書詩因命同作

漢室賢王後從叔望出河間孔門高第人濟時成國器樂道任天真特

達主無玷堅貞竹有筠總戎寬得衆市義貴能貧護塞無南牧

馳心拱北辰乞身來闕下賜告卧漳濱榮耀初題劔清羸已抱

紳宮星徒列位隙日不回輪自昔追飛侶今為侍從臣素絃寒

已絕青簡歎猶新未遂揮金樂空悲撒瑟晨淒涼竹林下無復

見清塵從叔自渭北節度以疾歸朝比及拜尚書竟不克中謝

奉和中書崔舍人八月十五日夜翫月二十韻

莫景中秋爽陰靈既望圓浮精離碧海分照接虞淵迥見孤輪

出高從倚蓋旋二儀含皎澈萬象共澄鮮整御當西陸舒光麗

上玄從星變風雨順日助陶甄遠近同時望晶熒此夜偏運行

調玉燭潔白應金天曲榭凝瑤鏡通衢若象筵逢人盡冰雪遇

境即神仙引素吞銀漢凝清洗綠烟臯禽警露下鄰杵思風前

水是還珠浦山成種玉田劔沉三尺影燈罷九枝燄象外形無

迹寰中影有遷稍當雲闕正未映斗城懸靜對揮宸翰閑臨襞

彩牋境同牛渚上宿在鳳池邊興掩尋安道詞勝命仲宣從今

紙貴後不復咏陳篇

奉和淮南李相公莫秋即事寄成都武相公

八柱共承天東西別隱然遠夷爭慕化真相故臨邊並進夔龍

位仍齊龜年相公詩有齊年並進之句也同心舟已濟造膝瑩常聯對領專

征寄遙持造物權斗牛添氣色并絡靜氛煙獻可通三畧分耳

出萬錢漢南趨節制趙北賜山川玉帳觀渝舞虹旌獵楚田步

媿雙綬重夢入九城偏秋與離情動詩從樂府傳聆音還竊抃
不覺撫么弦季中書自揚州見示詩本因命仰和

元和癸巳歲仲秋詔發江陵偏師問罪蠻繳後命宣慰
釋兵歸降凱旋之辰卒尔成詠寄荆南嚴司空

蠻水阻朝宗兵符下渚宮前籌得上策無戰已成功漢使星飛
入夷心草偃同歡謔開竹枝拜舞擲桑弓就日知冰釋後人念
鳥窮網羅三面解章奏九門通并服聯操袂雕題盡鞠躬降幡
秋練白驛騎畫塵紅火號休傳警機橋罷巨室登山不見虜振
旆自生風江遠烟波靜軍回氣色雄佇看聞嘉後金石賜元戎

武陵書懷五十韻

并引

按天官書武陵當翼軫之分其在春秋及戰國時皆楚地後為
秦惠王所并置黔中郡漢興更名曰武陵東從于今石所常林
義陵記云初項籍殺義帝于郴武陵人曰天下憐楚而興今吾

王何罪乃見殺郡民縞素哭于招屈亭高祖聞而義之故亦曰
義陵今郡城東南亭舍其所也晉宋齊梁間皆以分王子弟事
存于其書永貞元年余始以尚書外郎出補于山守道賤為是
郡司馬至則以方志所載而質諸其人民顧山川風物皆騷人
所賦乃其所聞見而成是詩因自述其出處之所以然故用書
懷為目云

西漢開支郡南朝號戚藩四封當列宿百雉俯清沅高岸朝霞
合驚湍激箭奔積陰春暗度將霽霧先昏俗尚東皇祀謠傳義
帝寬桃花迷隱跡練葉慰忠魂尸算資漁獵鄉豪恃子孫照山
會火動躡月俚歌喧擁檝舟為市連薨竹覆軒披沙金粟見拾
羽翠翹翻茗折滄溪秀蘋生枉渚妍蒼溪茶為邑人所禽驚格
磔起魚戲噉喙繁按本草短曰鷓鴣聲沈約臺榭故李衛墟落
存隱侯臺本奴洲並在湘靈悲鼓瑟泉客泣酬恩露變蒹葭浦星懸橘柚

村虎咆空野震鼉作滿川渾隣里皆遷客兒童習左言炎天無
冽井霜月見芳蕪清白家傳遺詩書志所敷列科叨甲乙從宦
出立樊結友心多契馳聲氣尚吞士安曾重賦元禮許登門草
檄嫖姚幕巡兵戍已屯築臺先自隗送客獨留髡遂結王畿綬
來觀嚮室尊鸞飛入鷹隼魚日儼璵璠曉燭羅駢道朝陽闕帝
閣王正會夷夏月朔盛旗幟獨立當瑤闕傳訶步紫垣按章清
犴獄視祭潔蘋蘩御曆昌期遠傳家寶祚蕃由文光夏啓神教
畏軒轅內禪因天性膺圖授化元繼明懸日月出震統乾坤大
孝三朝備洪恩九族惇百川宗渤澥五嶽輔崑崙何幸逢休運
微班識至尊校緡資筦榷復土奉山園時以本官判度支蓋一
鉄等兼崇陵使判官
失貴人意徒聞太學論直廬辭錦帳遠守愧朱轡巢幕方猶燕
搶榆尚笑鯢遭回過荆遙流落感涼温旅望花無色愁心醉不
昏春江千里草莫雨一聲猿問卜安冥教者方理病源帶賒衣

改製塵澀劍成痕三秀悲中散二毛傷虎賁耒憂禦魑魅歸願
牧雞豚就日秦京遠臨風楚奏煩南登無灞岸旦夕上高原

經伏波神祠

蒙蒙篔竹下有路上壺頭漢壘磨鼃關蠻溪霧雨愁懷人敬遺
像閱世指東流自負霸王畧安知恩澤戾鄉園辭石柱筋力盡
炎州一以功名累翻思馬少遊

聞董評事疾因以書贈

董生奉
內典

繁露傳家學青蓮譯梵書火風垂四大文字廢三餘敬枕晝眠
靜折巾秋髮疎武皇思視草誰許茂陵居

贈澧州高大夫司馬霞寓

前年收錦城馬躅血泥行千里追戎首三軍許勇名殘兵疑鶴
唳空壘辨烏聲一誤雲中級南遊湘水清

宿誠禪師山房題贈二首

宴坐白雲端清江直下看來人望金刹講席繞香壇虎嘯夜林
動鼉鳴秋澗寒衆音徒起滅心在淨中觀
不出孤峯上人間四十秋視身如傳舍閱世甚東流法爲因緣
立心從次第脩中宵問真偈有住是吾憂

晚泊牛渚

蘆葦晚風起秋江鱗甲生殘霞忽變色遊雁有餘聲戍鼓音响
絕漁家燈火明無人能詠史獨自月中行

罷郡歸洛陽閒居

十年江外守旦夕有歸心及此西還日空成東武吟花間教
酒月下一張琴聞說功名事依前惜寸陰

城中閒遊

借問池臺主多居要路津千金買絕境永日屬閒人竹筵縈
紆入花林委曲巡斜陽衆客散空鎖一園春

罷郡歸洛陽寄友人

遠謫年猶少初歸鬢已衰門閒故吏去室靜老僧期不見蜘蛛
集頻爲樓句欺穎微囊未出寒甚難吹渡落唯心在平生有
已知商歌夜深後聽者竟爲誰

陝州河亭陪韋伍大夫雪後眺望因以留別與韋有布

衣之舊一別二紀經遷貶而歸

雪霽大陽津城池表裏春河流添馬頰原色動龍鱗萬里獨歸
客一杯逢故人因高向西望關路正飛塵

途中蚤發

中庭望啓明促促事晨征寒樹鳥初動霜橋人未行水流白烟
起日上彩霞生隱士應高枕無人問姓名

初至長安

時自外郡
再授郎官

左遷凡二紀重見帝城春老大歸朝客平安出嶺人每行經舊

處却想侶前身不改南山色其餘事事新

大和戊申歲大有年詔賜百寮出城觀秋稼謹書盛事
以俟采詩者

長安銅雀鳴秋稼與雲平玉燭調寒暑金風報順成川原呈上
瑞恩澤賜閑行欲及重城掩猶聞歌吹聲

蚤秋集賢院即事

時爲
學士

金數已三伏火星正西流樹含秋露曉閣倚碧天秋仄瑤應新
律銅壺添夜籌高聽從朔塞爽氣入神州蕙草香書殿槐花點
御溝山明真色見水靜濁烟收蚤歲忝華省再來成白頭幸依
羣玉府有路向瀛洲

金陵懷古

潮滿冶城渚日斜征虜亭蔡洲新草綠幕府舊烟青興廢由人
事山川空地形後庭花一曲幽怨不堪聽

畫居池上亭獨吟

日午樹陰正獨吟池上亭靜看蜂教誨閒想鶴儀形法酒調神
氣清琴入性靈浩然機已息几杖復何銘

分司東都蒙襄陽李司徒相公書問因以奉寄

蚤忝金馬客晚爲高洛翁知名四海內多病一生中舉世往還
盡何人心事同幾時登峴首恃舊揖三公

奉和吏部楊尚書太常李卿二相公策免後即事述懷

贈答十韻

文雅關西族衣冠趙北都有聲真漢相無類勝隋珠當軸龍爲
友臨池鳳不孤九天開內殿百辟看晨趨誠滿澄歌器成功別
大鑪餘芳在公論積慶是神扶步武離台席徊翔集帝梧銓材
秉秦鏡典樂去齊竽瀟灑風塵外逢迎詩酒徒唯應待華皓更
食萬錢厨

門下相公榮加冊命天下同歡忝沐眷私輒敢申賀
冊命出宸衷官儀自古崇特膺平土祥光贊格天功再佩扶陽
印常乘鮑氏驄七賢遺老在猶得詠清風

病中一二禪客見問因以謝之

勞動諸賢者同來問病夫添鑪擣雞舌灑水淨龍鬚身是芭蕉
喻行須筇杖扶醫王有妙藥能乞一丸無

劉賓客文集卷第二十二

劉賓客文集卷第二十三

古調十六首

登司馬錯故城

秦昭王命錯征五溪蠻城在武陵沅江南

將軍將秦師西南奠遐服故壘清江上蒼烟晦喬木登臨值蕭
辰周覽壯前躅塹平陳葉滿壙高秋蔓綠廢井抽寒菜毀臺生
糴穀耕人得古器宿雨多遺鏃楚塞鬱重疊蠻溪紛詰曲留此
數仞基幾人傷遠目

臥病聞常山旋師策勳宥過王澤大洽因寄李六侍御

寂寐重寐寂病夫卧秋齋夜蛩思幽壁稿葉鳴空塔南國異氣
候火旻尚昏霾瘴烟跼飛羽沴氣傷百骸昨聞凱歌旋飲至酒
如淮無戰陋丹水垂仁輕藁街清廟既策勳園丘俟燔柴車書
一以混幽遠靡不懷遂客顛顛久故鄉雲雨乖禽魚各有化予
欲問齊諧

謁枉山會禪師

我本山東人平生多感慨弱冠遊咸京上書金馬外結交當世
賢馳聲溢四塞勉脩貴及蚤徂健不知退錙銖揚芬馨尋尺招
瑕類淹留郢南鄙摧翫羽翰碎安能咎往事且欲去沈痼吾師
得真如自在人寰內哀我墮名網有如翺飛葦矐矐揭智炬照
使出昏昧靜見玄關啓歆然初心會夙尚一何微今得信可美
覺路明證入便門通懺悔悟理言自忘處屯道猶春色身豈吾
寶慧性非形碍思此靈山期未卜何年載

善卷壇下作

在柱山上

先生見堯心相與去九有斯民既已治我得安林藪道爲自然
貴名是無窮壽瑤壇在此山識者常回首

武陵觀火詩

楚鄉祝融分炎火常爲虞是時直突烟發自晨炊徒盲風扇其

威白晝曛陽烏操綆不暇汲循墻寧避踰怒如列缺光迅與焚
輪俱聯延掩四達赫奕成洪爐洵疑雲濤翻颯若鬼神趨當前
迎焮輓是物同膏腴金烏入梵天赤龍遊玄都騰烟透窓戶飛
焰生藥櫃火山摧半空星雨灑中衢瑤壇披霖潦寶樹攢珊瑚
光縣與琴焦旗亭無酒濡市人委百貨邑令遺雙鳧餘勢下隈
隩長燄烘舳艫吹熒照水府炎浪愁天吳災罷雲日晚心驚視
聽殊高灰辨廩庾黑土連闔閭衆燼合星羅遊氛鑱人膚厚地
藏宿熱遙林呈驟枯火德資生人庸可一日無御之失其道敲
石彌天隅晋庫走龍劍吳宮傷燕雛五行有沴氣先哲垂訐謨
宋鄭同日起時當賢大夫無苛自可樂弭患意祈圖賢守恤人
瘼臨烟駐驪駒弔傷色慘怛言失詞劬愉下令蠲里布指期輕
市租開垣適未立苦蓋自相娛山木行翦伐江泥宜瑾塗魯臣
不必葺何用徽越巫

崔元受少府自貶所還遺山薑花以詩答之

故人博羅尉遺我山薑花採從碧海上來自謫仙家雲濤潤孤
根陰日照晨葩淨搖扶桑日豔對瀛洲霞世人愛芳辛塞擷忘
幽遐傳名入帝里飛駟辭天涯王濟本尚味石崇方鬪奢雕盤
多不識綺席乃增華驛馬損筋骨貴人滋齒牙顧予藜藿士持
此重咨嗟

途中蚤發

馬蹋塵上霜月明江頭路行人朝氣銳宿鳥相辭去流水隔遠
村漫山多紅樹悠悠關塞內往來無閑步

和董庶中古散調詞贈尹果毅

昔聽東武吟壯年心已悲如何心護落聞君苦辛辭言有窮巷
士弱齡頗尚竒讀得玄女符生當事邊時借名遊俠窟結客幽
并兒往來長楸間能帶雙鞬馳崩騰天寶末塵暗燕南垂燿火

入咸陽詔徵神武師是時占軍募插羽揚金羈萬夫列轅門觀
射中戟枝誓當雪國讎親愛從此辭中霄倚長劔起視蚩尤旗
介馬晨蕭蕭陳雲竟天涯陰風獵白草旗檠光參差勇氣貫中
腸視身忽如遺曾擒白馬將虜騎不敢追貴臣上戰功名姓隨
意移終歲飢骨苦他人印累累謁者既清宮諸侯各罷戲上將
賜甲第門戟不可窺皆血下沾襟天高問無期却尋故鄉路孤
影空相隨行逢里中舊撲捩昔所嗤一言合侯王晉佩黃金龜
問我何自苦可憐真數竒遲回顧徒御得意懸雙眉翻然悟世
途撫已昧所宜田園已蕪沒流浪江海湄鷺禽毛翮摧不見翔
雲姿衰容蔽逸氣孑孑無人知寂寞草玄徒長吟下書惟聞君
發哀韻粲若瑤林枝有客識其真潺湲涕交頤勸爾一杯酒陶
然足自怡

望衡山

東南倚蓋卑維嶽資柱石前當祝融居上拂朱烏翮青冥結精
氣磅礴宣地脉還聞膚寸陰能致彌天澤

遊桃源一百韻

沅江清悠悠連山鬱岑竅回流抱絕巘峻鏡含虛碧昏旦遞明
媚烟嵐紛委積香蔓垂綠潭暴龍照孤磧此下潭名綠淵明著

前志子驥思遠蹠子驥事見陶先生本記寂寂無何鄉密爾天地隔金行

太元歲漁者偶探曠尋花得幽蹤窺洞穿閭隙依微聞雞犬豁

達值阡陌居人互將迎笑語如平昔廣樂雖交奏海禽心不悻

揮手一來歸故溪無處覓繚綿五百載市朝幾遷革有路在壺

中無人知地脉皇家感至道聖祚自天錫金闕傳本枝玉函留

寶曆禁山開祕宇復戶潔靈宅詔隸二十戶免徭以奉洒掃藥檢香氛氲醮

壇烟暮暮我素塵外躅瑩若朝醒析崖轉對翠屏水窮留畫鷁

三休俯喬木千級攀峭壁旭日聞撞鐘綠雲迎躡屐遂登最高

頂縱目還楚澤平湖見草青遠岸連霞赤幽尋如夢想繇思屬

空閭寅緣且忘疲耽玩近成癖清猿向曉發瑤草陵寒拆祥禽

舞葱蘢珠樹搖率璣羽人顧我笑勸我稅歸輶霓衣何飄颻童

顏潔白暫重巖是藩屏馴鹿受羈約棲居通清霄蘿萋成翠帶

仙翁遺竹杖王母留桃核姹女飛丹沙青童護金液寶氣浮鼎

耳神先生劒脊虛無天樂未德宰鬼兵役丹丘肅朝禮玉札工

紬繹枕中淮南方牀下阜鄉寫明鏡坐遙夜幽籟聽浙瀝因話

近世仙聳然心神暢乃言瞿氏子骨狀非凡格往事黃先生羣

兒多侮劇訾然不屑意元氣貯肝鬲往往遊不歸洞中觀博奕

言高未易信猶復加訶責一旦前致辭白云仙期迫言思有道

骨前事常被謫如今三山士名字在真籍悠然謝主人後歲當

耒覲言畢依庭樹如烟去無跡觀者皆失次驚追紛絡繹日莫

山暹窮松風自蕭撼適逢脩蛇見瞋目光激射如巖三清居不

使恣搜索唯餘涉江勢八趾在沙礫至今東北隅表以壇上石
列仙徒有名世人非目擊如何庭廡際白日振飛翮洞天豈幽
遠得道如咫尺一氣無死生三光自遷易因思人間世前路何
湫窄瞥然此生中善祝期滿百大方播群類秀氣肖翕闢性靜
本同和物牽成阻阮是非闢方寸葷血昏精魄遂令多天傷猶
喜見斑白喧喧車馬馳冉冉桑榆夕共安緹繡榮不悟泥途適
紛吾本孤賤世業在逢掖九流宗指歸百氏旁擔披公卿偶慰
薦鄉曲謬推擇居安白社貧志傲玄纁辟功名希自取籌組俟
聆蕭韶侍祠閱琮璧嘗聞履忠信可以行蠻貊自述希古心妄
時干時畫巧言忽成錦苦志徒食蘖平地生峯巒深心有予戟
層波一震盪弱植果淪溺北渚弔靈均長岑思亭伯禍來昧幾
兆事去空歎惜塵累時與深流年隨漏滴才能疑木雁報施迷

夷路楚奏繫鍾儀商歌勞甯戚稟性非懸解對境方感激自從
嬰網羅每事問龜策王正降雷雨環玦賜遷斥儻後夷平人誓
將依羽客買山構精舍領徒開講席冀無身外憂自有閑中益
道牙期日就塵慮乃冰釋且欲遺姓名安能慕竹帛長生尚學
致一流豈虛擲芝朮資餒糧烟霞拂巾幘黃石履者墮洪崖肩
可拍聊復嗟蜉蝣何煩哀虺蝎青囊既深味瓊葩亦屢摘縱無
西山姿猶免長戚戚

客有爲余話登天壇遇雨之狀因以賦之

清晨登天壇半路逢陰晦疾行穿雨過却立視雲背白日照其
上風雷走于內澗濺雪海翻搓牙玉山碎蛟龍露鬣鬣神鬼含
變態萬狀互相生百音以繁會俯觀羣動靜始覺天宇大山頂
自晶明人間已霽霽豁然重昏歛澳若春水潰反照入松門瀑
流飛縞帶遙光泛物色餘韵吟天籟洞府撞仙鐘村墟起夕靄

却見山下侶已如迷世代問我何處來我來雲雨外

有僧言羅浮事因爲詩以寫之

君言羅浮上容易見九垓漸高元氣壯洶湧來翼身夜宿最高
峯瞻望浩無鄰海黑天宇曠星辰來逼人
是時當朏魄陰物恣騰
振日光吐鯨背劍影開龍鱗
倏若萬馬馳旌旗聳齋淪又如
廣樂奏金石含悲辛疑其有巨靈怪物盡來賓
陰陽迭用事乃俾夜作晨
呶嗷天雞鳴扶桑色晰晰赤波千萬里湧出黃金輪
下視生物息靈如隙中塵醜雞仰甕口亦謂雲漢津
世人信耳目方寸度天鈞安知視聽外怪愕不可陳
悠悠想大方此乃括水濱知小天地大安能識其真

秋江蚤發

輕陰迎曉日霞霽秋江明草樹含遠思襟懷有餘清
凝眸萬象起朗吟孤憤平渚鴻未矯翼而我已遐征
因思市朝人方聽晨雞鳴昏昏戀枕衾安見元氣英
納爽耳目變玩竒筋骨輕滄洲有竒趣浩蕩吾將行

雞鳴昏昏戀枕衾安見元氣英納爽耳目變玩竒筋骨輕滄洲有竒趣浩蕩吾將行

裴祭酒尚書見示春歸城南青松塢別墅寄王左丞高

侍郎之什命同作

蚤宦閱人事晚懷生道機時從學省出獨望郊園歸
野約度春水山花暎巖扉石頭解金章林下步綠薇
青松鬱成塢脩竹盈尺圍吟風起天籟蔽日無炎威
危筵盤羊腸連甍聳翬飛幽谷響樵斧澄潭環釣磯
因高見帝城冠蓋揚光輝白雲雞持寄清韻投所希
二公如長離比翼翔大微含情謝林壑酬贈駢珠璣
顧予久即潛愁寂對芳菲一聞丘中趣再撫黃金徽

和河南裴尹侍郎宿齋太平寺詣九龍祠祈雨二十韻

有事九龍廟潔齋梵王祠玉簫何時絕碧樹空涼颼吏散埃壙
息月高庭宇宜重城蕭穆間澗水潺湲時人稀夜復閒慮靜境

亦隨緬懷斷螯足凝想乘鸞姿朱明盛農節膏澤方愆期瞻言
五靈瑞能救百穀嗟咿喔晨雞鳴闌干斗柄垂脩容謁神像注
意陳正詞驚飈起泓泉若調雷雨師黑烟聳鱗甲灑液如焚絲
豐隆震天衢列缺揮火旗炎室忽淒緊高雷懸綆縻生物已霽
霈濕雲稍離披丹霞啓南陸白水含東菑漘漘飛走適藹藹草
樹滋浮光動宮觀遠思盈川坻吳公敏于政謝守工爲詩商山
有病客言賀舒龐眉

冬夜宴河中李相公中堂命箏歌送酒

朗朗鷓鴣弦華堂夜多思簾外雪已深坐中人半醉翠娥發清
響曲盡有餘意酌我莫憂狂老耒無逸氣

劉賓客文集卷第二十三

劉賓客文集卷第二十四

七言五十六首

西塞山懷古

西晉樓船下益州，金陵王氣漠然收。
千尋鐵鎖沉江底，一片降幡出石頭。
人世幾回傷往事，山形依舊枕寒流。
今逢四海為家日，故壘蕭蕭蘆荻秋。

陽山廟觀賽神

梁松南征至此遂為其神在朗州

漢家都尉舊征蠻，血食如今配此山。
曲蓋幽深蒼檜下，洞簫愁絕翠屏間。
荆巫脉脉傳神語，野老婆婆啟醉顏。
日落風生廟門外，幾人連蹋竹歌還。

漢壽城春望

古制州刺史治亭下有子胥廟兼楚王古墳

漢壽城邊野草春，荒祠古墓對荆榛。
田中牧豎燒芻陌，陌上行人看石麟。
華表半空經霹靂，碑文纔見滿埃塵。
不知何日東瀛

變此地還成要路津

後梁宣明二帝碑堂下作

玉馬朝周從此辭園陵寂寞對豐碑千行宰樹荊州道莫雨蕭蕭聞子規

荊州道懷古

南國山川舊帝畿宋臺梁館尚依稀馬嘶古道行人歇麥秀空城澤雉飛風吹落葉填宮井火入荒陵化寶衣徒使詞臣庾開府咸陽終日若思歸

朗州竇員外見示與澧州元郎中郡齋贈答長句二篇

因而繼和

鴛鴦差池出建章綵旗朱戶鬱相望新恩共理犬牙地昨日同含雞舌香白芷江邊分驛路山桃溪外接茸棠應憐一罷金闈籍枉渚逢春十度傷

早春對雪奉寄澧州元郎中

新賜魚書墨未乾賢人暫屈遠人安朝驅旌旆行時今夜見星辰憶舊官梅蓋覆階鈴閣煥雪峯當戶戟枝寒寧知楚客思公子北望長吟澧有蘭

竇朗州見示與澧州元郎中蚤秋贈答命同作

鄰境諸侯同舍郎芷江蘭浦恨無梁秋風門外旌旗動曉露庭中橘柚香玉簾微涼宜白晝金笳入莫應清商騷人昨夜聞啼鴉不歎流年惜衆芳

衢州徐員外使君遺以縞紵兼竹書箱因成一篇用答

佳贖按此郡本自婺州析置徐自台州遷

爛柯山下舊仙郎列宿來添婺女光遠放歌聲分白紵知傳家學與青箱水朝滄海何時去蘭在幽林亦自芳聞道天台有遺愛人將琪樹比茸棠

唐秀才贈端州紫石硯以詩答之

端州石硯人間重贈我應知正草玄闕里廟堂空舊物開方竈
豈天然玉燭吐水霞光靜絲翰朝搖風一作錦鮮此日慵工
記名姓因君數到墨池前

覽董評事思歸之什因以詩贈

幾年油幕佐征東却泛滄浪狎釣童歌枕醉眠成戲蝶抱琴閒
望送歸鴻文儒自襲膠西相倚杖能齊塞上翁更說扁舟動鄉
思青菰已熟柰秋風

松滋渡望破中

渡頭輕雨灑寒梅雲際溶溶雪水來夢渚草長迷楚望夷陵土
黑有秦灰巴人淚應猿聲落蜀客船從鳥道回十二碧峯何處
祈永安宮外是荒臺

揚州春夜李端公益張侍御登段侍御平仲密縣李少

府賜秘書張正字復元同會于水館對酒聯句追刻

燭擊銅鉢故事遲輒舉觥以飲之逮夜艾群公沾醉

紛然就枕余獨醒因題詩於段君枕上以志其事

寂寐獨看金燼落紛紛只見玉山頽自羞不是高陽侶一夜星
星騎馬回

逢王十二學士入翰林因以詩贈

時貞元二十二年王以藍田尉充學士

廐馬翩翩禁外逢星槎上漢香難從定知欲報淮南詔促召王
褒入九重

闕下口號呈柳儀曹

綵仗神旗獵曉風雞人一唱鼓蓬蓬銅壺漏水何時歇如此相
催即老翁

監祠夕月壇書事

其祀用畫

西皞司分晝夜平羲和亭午太陰生鏗鏘揖讓秋光裏觀者如

雲出鳳城

戲贈崔千牛

學道深山許老人，留名萬代不關身。
勸君多買長安酒，南陌東城占取春。

元和甲午歲詔書盡徵江湘逐客，余自武陵赴京宿于都亭，有懷續來諸君子。

雲雨江湖起卧龍，武陵樵客躡仙蹤。
十年楚水楓林下，今夜初聞長樂鐘。

江陵嚴司空見示與成都武相公唱和，因命同作。

南荆西蜀大行臺，幕府旌門相對開。
名重三司平水土，威雄八陳役風雷。
彩雲朝望青城起，錦浪秋經白帝來。
不是郢中清唱發，誰當丞相換天才。

徵還京師見舊番官馮叔達

前者匆匆襍被行，十年顛顛到京城。
南官舊吏來相問，何處淹留白髮生。

故洛城古牆

粉落椒飛知幾春，風吹雨灑旋成塵。
莫言一片危一作色基在，猶過無窮來往人。

元和十一年自朗州承召至京，戲贈看花諸君子。

紫陌紅塵拂面來，無人不道看花回。
玄都觀裏桃千樹，盡是劉郎去後栽。

再遊玄都觀絕句

余貞元二十一年爲屯田員外郎時，此觀未有花。是歲出牧連州，尋貶朗州司馬，居十年召至京師，人人皆言有道士手植仙桃，滿觀如紅霞。遂有前篇以志一時之事。旋又出牧，今十有四年，復爲主客郎中，重遊玄都，蕩然無復一樹。唯兔葵燕麥動搖。

于春風耳因再題二十八字以俟後遊時大和二年三月日
百畝中庭半是苔桃花淨盡菜花開種桃道士歸何處前度劉
郎今又來

望夫石

正對和州郡樓

終日望夫夫不歸化為孤石苦相思望來已是幾千載只似當
時初望時

金陵五題

余少爲江南客而未遊秣陵嘗有遺恨後爲歷陽守跋而望之
適有客以金陵五題相示道尔生思歎然有得他日友人白樂
天掉頭苦吟歎賞良久且曰石頭題詩云潮打空城寂寞回吾
知後之詩人不復措詞矣餘四詠雖不及此亦不孤樂天之言
爾

石頭城

山圍故國周遭在潮打空城寂寞回淮水東邊舊時月夜深還
過女墻來

烏衣巷

朱雀橋邊野草花烏衣巷口夕陽斜舊時王謝堂前燕飛入尋
常百姓家

臺城

臺城六代競豪華結綺臨春事最奢萬戶千門成野草只緣一
曲後庭花

生公講堂

生公說法鬼神聽身後空堂夜不扃高坐寂寥塵漠漠一方明
月可中庭

江令宅

南朝詞臣北朝客歸來唯見秦淮碧池臺竹樹三畝餘至今入

道江家宅

謝氏雙檜

雙檜蒼然古貌奇，含烟吐霧鬱參差。
晚依禪客當金殿，初對將軍映畫旗。
龍象界中成寶蓋，鴛鴦瓦上出高枝。
長明燈是前朝焰，曾照青青年少時。

韓信廟

將畧兵機命世雄，蒼黃鍾室歎良弓。
遂令後代登壇者，每一尋思怕立功。

秋夜安國觀聞笙

織女分明銀漢秋，桂枝梧葉共颼颼。
月露滿庭人寂寂，霓裳一曲在高樓。

洛中寺北樓見賀監草書題詩

高樓賀監昔曾登，壁上筆蹤龍虎騰。
中國書流讓皇家，北朝文

士重徐陵偶因獨見空驚目，恨不同時便伏膺。
唯恐塵埃轉磨滅，再三珍重囑山僧。

聞韓賓擢第歸觀以詩美之兼賀韓十五曹長時韓收

永州

零陵香草滿郊垌，丹穴雛飛入翠屏。
孝若歸來呈畫讚，孟陽別後有山銘。
蘭陔舊地多纒結，桂樹枝色更青。
爲報儒林丈人道，如今從此鬢星星。

寄揚韓一作韓八壽州

風獵紅旗入壽春，滿城歌舞向朱輪。
八公山下清淮水，千騎塵中白面人。
桂嶺雨餘多鶴迹，茗園晴望似龍鱗。
聖朝方用敢言者，次第應須舊諫臣。

李賈二大諫拜命后寄揚八壽州

諫省新登二直臣，萬方驚喜捧絲綸。
遙知天子明如日，肯放淮

陽高卧人

宣上人遠寄賀禮部王侍郎放榜后詩因而繼和
禮闈新榜動長安九陌人人走馬看一日聲名徧天下滿城桃李屬春官自吟白雪銓詞賦指示青雲借羽翰借問至公誰印可支郎天眼定中觀

贈東嶽張鍊師

東嶽真人張鍊師高情雅淡世間稀堪爲烈女書青簡久事元君任翠微金縷機中拋錦字玉清壇上著霓衣雲襪不要吹簫伴只擬乘鸞獨自飛

祕書崔少監見示墜馬長句因而和之

麟臺少監舊仙郎洛水橋邊墮馬傷塵汗膏間青盞緩風飄掌上紫遊韉上車著作應來問折臂三公定送方猶賴德全如醉者不妨吟詠入篇章

寄揚虢州與之舊姻

避地江湖知幾春今來本郡擁朱輪阮郎無復里中舊楊僕却爲關外人各繫一官難命駕每懷前好易沾巾玉城山裏多靈藥擺落功名且養神

秋日題竇負外崇德里新居

竇氏判度支案

長愛街西風景閒到君居處暫開顏清光門外一渠水秋色墻頭數點山疎種碧松通月朗多栽紅葉待春還莫言堆案無餘地認得詩人在此間

蒙恩轉儀曹郎依前充入賢學士舉韓湖州自代因寄

七言

翔鸞闕下謝恩初通籍由來在石渠暫入南宮判祥瑞還歸內殿閱圖書故人由在三江外同病凡經二紀餘今日薦君嗟久滯不唯文體似相如

途次華州陪錢大夫登城北樓春望因觀李崔令狐三
相國唱和之什翰林舊侶縱矍華城山水清高鸞鳳
翔集皆忝夙眷遂題是詩

城樓四望出風塵見盡關西渭北春百二山河雄上國一雙旌
旆委名臣壁中今日題詩處天上同時草詔人莫怪老郎呈濫
吹官途雖別舊情親

三鄉驛樓伏觀玄宗望女几山詩小臣斐然有感

開元天子萬事足唯惜當時光景促三鄉陌上望仙山歸作霓
裳羽衣曲仙心從此在瑤池三清八境相追隨天上忽乘白雲
去世間空有秋風詞

洛下初冬拜表有懷上京故人

鳳樓南面控三條拜表郎官蚤渡橋清洛曉光鋪碧簾上陽霜
葉剪紅綃省門簪組初成列雲路鴛鴦想退朝寄謝慇懃九天

侶捨榆水擊各逍遙

尉遲郎中見示自南遷幸復却至洛城東舊居之作因
以和之

曾遭飛語十年謫新受恩光萬里還朝服不妨遊洛浦郊園依
舊看嵩山竹含天籟清商樂水遶庭臺碧玉環留作功成退身
退如今只是暫時閒

洛中洲福建陳判官見贈

潦倒聲名擁腫材一生多故苦遭迴南宮舊籍遙相管東洛開
門晝永開靜對道流論藥石偶逢詞客與瓊瑰怪君近日文鋒
利新向延平看劍來

始聞秋風

昔看黃菊與君別今聽玄蟬我却回五夜颼颼枕前覺一年顏
狀鏡中來馬思邊草奉毛動鷗看青雲瞞眼開天地肅清堪四

望爲君扶病上高臺

和蘇十郎中謝病閒居時嚴常侍蕭給事同過訪歎初
有二毛之作

清瀛隱几望雲空左掖鴛鴦到室中一卷圖書銷永日數莖斑
鬢對秋風菱花照後容雖改著草占來命已通莫怪人人驚蚤
白緣君合是黑頭翁

酬淮南廖參謀秋夕見過之作

休公著爲揚從州事參謀
從釋子反初服

揚州從事夜相尋無限新詩月下吟初服已驚玄髮長高情猶
向碧雲深語餘時舉一杯酒坐久方聞教處砧不逐繁華訪聞
散知君擺落俗人心

題王郎中宣義里新居

愛君新買街西宅客到如遊鄴杜閣雨後退朝貪種樹申時出
省趁看山門前巷陌三條近牆內池亭萬境閒見擬移居作鄰

里不論時節請開關

酬朗州崔負外與任十四兄侍御同過鄙人舊居見懷

之什時守吳郡

昔日居鄰招屈亭楓林橘樹鷓鴣聲一辭御苑青門去十見蠻
江白芷生自此曾沾宣室召如今又守闔閭城何人萬里能相
憶同舍仙郎與外兄

任侍御子外兄崔
負外南宮同官

美温尚書鎮定興元以詩寄賀

旌旗入境犬無聲戮盡鯨鯢漢水清從此世入聞耳目始知名
將出書生

劉駙馬水亭避暑

千竿竹翠數蓮紅水閣虛涼玉簟空琥珀瓊紅疑瀉酒水晶簾
密更通風賜冰滿盃沈朱實法饌盈盤覆碧籠盡日逍遙避煩
暑再三珍重主人翁

述舊賀遷寄陝虢孫帝侍

南宮左輔兩處交代

南宮幸襲芝蘭後左輔曾交印綬來多病未離清洛苑新恩已
歷望仙臺關頭古塞桃林靜城下長河竹箭回聞道隨車有零
雨此時偏動子荆才

酬端州吳大夫夜泊湘川見寄一絕

夜泊湘川逐客心月明猿叫血沾襟湘妃舊竹痕猶淺從此因
君染更深

劉賓客文集卷第二十四

劉賓客文集卷第二十五

雜體三十九首

翠微寺有感

吾王昔遊幸離宮雲際開朱旗迎夏蚤涼軒避暑來陽餅賜都
尉寒冰嶺上才龍顛不可望玉坐生浮埃

連州臘日觀莫徭獵西山

海天殺氣薄蠻軍部伍置林紅葉盡變原黑草如燒圍合繁鉦
息禽興大旆搖張羅依道口喉犬上山腰猜鷹慮奮迅驚鹿時
躡跳瘴雲四面起臘雪半空消箭頭餘鷓血鞍傍見雉翹日莫
還城邑金笳發麗譙

觀舞柘枝二首

胡服何歲氍毹僊登綺墀神飄獵紅葉龍燭然金枝垂帶覆織
腰安鈿當嫵眉翹袖中繁鼓傾眸遡華棖燕餘有舊曲淮南多

治詞欲見傾城處君看赴節時
山雞臨清鏡名燕赴遠津何如上客會長袖入華茵體輕似無
骨觀者皆聳神曲盡四身處曾波猶注人

君山懷古

屬居八十一此地阻長風千載威靈盡赭山寒水中

秋江晚泊

長泊起秋色空江涵霽暉莫霞千萬狀賓鴻次第飛古戍見旗
迎荒村聞犬稀軻峨艣上客勸酒夜相依

步出武陵東康臨江寓望

鷹至感風候霜餘變林麓孤颿帶日來寒江轉沙曲戍遙旗影
動津晚櫓暮促月上彩霞收漁歌遠相續

秋日送客至潛水驛

候吏立沙際田家連竹溪神林社日鼓茅屋午時雞雀噪晚禾

地蝶飛秋草畦驛樓官樹近疲馬再三嘶

晚歲登武陵城顧望水陸悵然有作

星象承鳥翼蠻貊想犬牙俚人祠竹節仙洞開桃花城基歷漢
魏江源自竇巴華表廖立墓菜地黃瓊家霜輕菊秀晚石淺水
文斜樵音遠故壘汲路明寒沙清風稍改葉盧橘始含葩野橋
鳴驛騎叢祠發迥笳跳鱗避舉網倦鳥寄行查路塵高出樹山
火遠連霞夕照轉赤岸浮藹起蒼葭軋軋渡溪漿連連赴林鷗
叫閣道非遠賜環期自賒孤臣本危涕喬木在天涯

湖州崔郎中曾長寄三癖詩自言癖在詩與琴酒其詞

逸而高吟咏不足昔柳吳興亭臯隴首之句王融書
之白團扇故爲四韻以謝之

視事畫屏中自稱三癖翁管絃泛春渚旌旆拂晴虹酒對青山
月琴韻白蘋風會書團扇上知君文字工

爲郎分司寄上都同舍

籍通金馬門身在銅駝陌省闈畫無塵宮樹遠凝碧荒街淺深
轍古渡潺湲石唯有嵩立雲堪誇蚤朝客

登陝州城北樓卻寄京都親友

獨上百尺樓日窮思亦愁初日徧露草野田荒悠悠塵息長道
白林清宿烟回首雲深處永懷鄉舊遊

請告東歸發灞橋卻寄諸僚友

征途出灞回首傷如何故人雲雨散滿目山川多行車無停
軌流景同迅波前歡漸成昔感歎益勞歌

秋晚題湖城驛上池亭

秋次池上館林塘照南榮塵衣紛未解幽思浩已盈風蓮墜故
萼露菊含晚英恨爲一夕客愁聽晨雞鳴

平蔡州三首

蔡州城中衆心死祇星夜落照河水漢家飛將下天來馬鬣一
揮門洞開賊徒崩騰望旗拜有若羣蟄驚春雷狂童面縛登檻
車大帛夭矯垂捷書相公從容來鎮撫常侍郊迎負文弩四人
歸業閭里閑小兒跳踉健兒舞

汝南晨雞嗷嗷鳴城頭鼓角音和平路傍老人憶舊事相與感
激皆涕零老人收泣前致辭官軍入城人不知忽驚元和十二
載重見天寶承平時

九衢車馬渾渾流使臣來獻淮西囚四夷聞風失匕筩天子受
賀登高樓妖童擢髮不足數血污城西一坏土南風無火楚澤
閑夜行不鎖穆陵關策勳祀畢天下泰猛士按劍看常山
時唯常山

平齊行二首

胡塵昔起薊北門河南地屬平盧軍貂裘代馬繞東嶽暉陽孤

桐削爲角地形十二虜意驕恩澤含容歷四朝魯人皆科帶弓
箭齊人不復聞蕭韶今朝天子聖神武手握玄符平九土初哀
狂童襲故事文告不來方震怒去秋詔下誅東平官軍四合猶
嬰城春來羣鳥噪且驚氣如壞山墮其庭牙門大將有劉生夜
半射落旌槍星帳中虜血流滿地門外三軍舞連臂驛騎函首
過黃河城中無賊天氣和朝廷侍郎來慰撫耕夫滿野行人歌
泰山沈冠六十年旅祭不饗生愁咽今逢聖君欲封禪神使陰
兵來助戰秋氛瑞盡河水清日觀杲杲嶺雲見開元皇帝東封
時百神受職爭奔馳千鈞猛麓順流下洪波涵浹浮熊羆侍臣
燕公秉文筆玉檢告天無愧詞當今獻孫承聖祖岳神望幸河
宗舞青門大道屬車塵共待歲粧翠華舉

城西行

城西簇簇三叛族叛者爲誰蔡吳蜀中使提刀出禁來九衢車

馬轟成雷臨刑與酒杯未覆仇家白官先請肉守吏能焚董卓
臍飢烏來覘桓玄目城西人散秦階平雨洗血痕春草生

武昌老人說笛歌

武昌老將七十餘手把庾令相問書自言小小學吹笛早事曹
王曾賞激往年鎮戍到蘄州楚山蕭蕭笛竹秋當時買材恣搜
索典邵身上烏貂裘古苔蒼蒼封老節石上孤生飽風雪商聲
五音隨指發水中龍應行雲絕曾將黃鶴樓上吹一聲占盡秋
江月如今老去語猶遲音韻高低耳不知氣力已微心尚在時
時一曲夢中吹

西山蘭若試茶歌

山僧後檐茶數叢春來映竹抽新茸宛然爲客振衣起自傍芳
叢摘鷹觜斯須炒成滿室香便酌砌下金沙水驟雨松聲入鼎
來白雲滿盞花徘徊悠揚噴鼻宿醒散清峭徹骨頰襟開陽崖

陰嶺各殊氣未若竹下莓苔地炎帝雖嘗未解煎桐君有錄那
知味新芽連拳半未舒自摘至煎俄頃餘木蘭墜露香微似瑤
草臨波色不如僧言靈味宜幽寂采采翹英爲嘉客不辭緘封
寄郡齋孰并銅鑪損標格何況蒙山顧渚春白泥赤印走風塵
欲知花乳清冷味須是眠雲跋石人

廟庭偃松詩

并引

侍中後閣前有小松不待年而偃丞相晉公爲賦詩美其猶龍
蛇然植于高檐喬木間上峩旁軋盤蹙傾亞似不得天和者公
以遂物性爲意乃加憐焉命畚土以壯其趾使無歌索絢以牽
其幹使不仆盪激之飲以潤之顧盼之輝以照之發于人心感
召和氣無復天闕坐能敷舒曩之跼感化爲竒古故雖衰文而
有偃號焉予嘗詣閣白事公爲道所以且示以詩竊感嘉木之
逢時斐然成咏

勢軋枝偏根已危高情一見與扶持忽從顛顛賴有生意卻爲離
披無俗姿影入巖廊行樂處韻含天籟宿齋時謝公莫道東山
去待取成陰滿鳳池

答東陽于令涵碧圖詩

并引

東陽令于興宗丞相燕國公之猶子生綺襦紈袴間所見皆貴
盛而孳然有心如山東書生前年白有司願爲親民官以自效
遂補東陽及蒞官以簡易爲治故多暇日一旦于縣五里偶得
竒境埋沒於翳薈中于生自以有特操而生于公侯家由覆廡
入仕常忽忽歎息因移是心開扶泉石芟去蘿葛斧凡材畚息
壤而清溪翠巖森立坐來因構亭其端題曰涵碧碧流貫于庭
中如青龍蜿蜒冰去聲澈射人樹石雲霞列于前昏旦萬狀惜其
居地不得有闡于時故圖之來乞詞既無負尤物予亦久翳蘿
蒿者睹之慨然遂賦七言以貽後之文士

東陽本是佳山水何況曾經沈隱侯
化得邦人解吟詠如今聯
令亦風流新開潭洞疑仙境
遠寫丹青到雒州落在尋常畫
師手猶能三伏凜生秋

贈致仕滕度子先輩

時及第人
人中最長

朝服歸來畫錦榮登科記上更無名
壽觴每使曾孫獻勝境長
携眾妓行矍鑠據鞍時聘一作健
殷勤把酒尚多情陵寒卻向

山陰去衣繡郎君雪裏迎

時令子為御史
主務在越中

咏红柿子

曉連星彩出晚帶日光懸本因遺採
掇翻自保天年

庭竹

露滌鉛粉節風搖青玉枝依依似
君子無地不相宜

臺城懷古

清江悠悠王氣沈六朝遺事何處
尋宮牆隱嶙圍野澤鶴鳴夜

鳴秋色深

題壽安苜蓿館二首

公館似仙家池清竹徑斜
山禽忽驚起衝落半巖花
門前洛陽道門裏桃源路
塵土與烟霞其間十餘步

與歌者米嘉榮

唱得涼州意外聲舊人唯教米嘉榮
近來時世輕先輩好染髭
鬚事後生

聽舊宮中樂人穆氏唱歌

曾隨織女渡天河記得雲間第一歌
休唱貞元供奉曲當時朝
士已無多

渾侍中宅牡丹

徑尺千餘朵人間有此花今朝見
顏色更不向諸家

唐郎中宅與諸公同飲酒看牡丹

今日花前飲甘心醉教杯但愁花有語不爲老人開

與歌者何戡

二十餘年別帝京重聞天樂不勝情舊人唯有何戡在更與殷
懃唱渭城

與歌童田順郎

天下能歌御史娘花前月底奉君王九重深處無人見分付新
聲與順郎

燕爾館破屏風所畫至精人多歎賞題之

畫時應遇空亡日賣處難逢識別人雖有多情往來客強將衫
袖掃埃塵

賞牡丹

庭前芍藥妖無格池上芙蓉淨少情惟有牡丹真國色花開時
鄴動京城

寄陝州姚中丞

時分司東都

八月天地肅二陵風雨收旌旗闕下來雲日關東秋禹跡想前
事漢臺餘故立裴回襟帶地左右帝王州留滯悲昔老思光榮
徹侯相思望棠樹一寄商聲謳

奉酬湖州崔郎中見寄五韻

山陽昔相遇灼灼晨葩鮮同遊翰墨場和樂瑱荒然一落名宦
途浩如乘風船行當衰暮日卧埋淮海邊猶期謝病後共樂桑
榆年

劉賓客文集卷第二十六

樂府上

團扇歌

團扇復團扇奉君清暑殿
秋風入庭樹從此不相見
上有乘鸞女蒼蒼網蟲遍
明年入懷袖別是機中練

荊州歌二首

渚宮楊柳暗麥城朝雉飛
可憐躡青伴乘煥著輕衣
今日好南風商旅相催發
沙頭檣竿上始見春江濶

紀南歌

風烟紀南城塵土荆門路
天寒多獵騎走上樊姬墓

宜城歌

野水遶空城行塵起孤驛
荒臺側生樹石碣陽鐫額
靡靡渡行人溫風吹宿麥

順陽歌

朝辭官軍驛。前望順陽路。野水齧荒墳。秋蟲鏤官樹。曾聞天寶末。胡馬西南驚。城守魯將軍。拔城從此去。

馬嵬行

綠野扶風道。黃塵馬嵬驛。路邊揚貴人。墳高三四尺。乃問里中兒。皆言幸蜀時。軍家誅佞倖。天子捨妖姬。羣吏伏門屏。貴人牽帝衣。低回轉美目。風日爲無暉。貴人飲金屑。倏忽薨英姿。平生服杏丹。顏色其如故。屬車塵已遠。里巷未窺覷。共愛宿妝妍。君王畫眉處。履綦無復有。文組光未滅。不見巖畔人。空見凌波襪。郵童愛蹤跡。私手解鞶結。傳看千萬眼。縷絕香不歇。指環照骨明。首飾敵連城。將入咸陽市。猶得賈胡驚。

視刀環歌

常恨言語淺。不如人意深。今朝兩相視。脉脉萬種心。

三閣辭四首

吳聲

貴人三閣上。日晏未梳頭。不應有恨事。嬌甚卻成愁。珠箔曲鉤瓊。子細見揚州。北兵那得渡。浪語判悠悠。沈香帖閣柱。金縷畫門楣。回首降幡下。已見黍離離。三人出晉井。一身登檻車。朱門漫臨水。不可見鱸魚。

更衣曲

博山烟烟吐香霧。紅燭引至更衣處。夜如何其夜漫漫。鄰雞未鳴寒雁度。庭前雪壓松桂叢。廊下點點懸紗籠。滿堂醉客爭笑語。嘈噴琵琶青幕中。

淮陰行五首

并引

古有長干行。言三江之事悉矣。余嘗阻風淮陰。作淮陰行以裨樂府。

簇簇淮陰市。竹樓綠岸上。好日起樯竿。鳥飛驚五兩。

今日轉船頭。金烏指西北。烟波與春草。千里同一色。
船頭大銅鑲。摩挲光陳陳。蚤晚使風來。沙頭一眼認。
何物令懷羨。羨郎船尾燕。銜瓊趁檣竿。宿食長相見。
隔浦望行船。頭昂尾幪幪。無柰晚萊時。清淮春浪軟。
競渡曲競渡始于武陵。至今舉楫而相和之。其音咸呼云何在。斯招屈之義。事見圖經。
沅江五月平隄流。邑人相將浮綵舟。靈均何年歌已矣。哀謠振
檝從此起。揚枹擊節雷闐闐。亂流齊進聲轟然。蛟龍得雨鬣鬣
動。蟬螻飲河形影聯。刺史臨流舉翠幃。揭竿命爵分雄雌。先鳴
餘勇爭鼓舞。未至銜枚顏色沮。百勝本自有前期。一飛由來無
定所。風俗如狂重此時。縱觀云委江之湄。綵旗夾岸照鮫室。羅
襪凌波呈水嬉。曲終人散空愁莫。招屈亭前水東注。

隄上行三首

酒旗相望大隄頭。隄下連牆隄上樓。日暮行人爭渡急。槳聲幽

軋滿東流。

江南江北望煙波。入夜行人相應歌。挑葉傳情竹枝怨。水流無
限月明多。

長隄繚繞水徘徊。酒舍旗亭次第開。日晚上簾招估客。舸舫大
編落颿來。

采菱行武陵俗嗜艾菱。歲秋矣。有女郎盛遊于馬湖。薄之以俟。采詩者言采之。歸以御客。古有采菱曲。罕傳其詞。故賦

白馬湖平秋日光。紫菱如錦采鴛鴦。翔盪舟遊女滿中央。采菱不
顧馬上郎。爭多逐勝紛相向。時轉蘭橈破輕浪。長鬟弱袂動參
差。釵影剗文浮蕩漾。笑語哇咬顧晚暉。蓼花綠岸扣船歸。歸來
共到市橋步。野蔓繫船葦滿衣。家家竹樓臨廣陌。下有連橋多
估客。携觴薦芰夜經過。醉蹋大隄相應歌。屈平祠下沅江水。月
照寒波白煙起。一曲南音此地聞。長安北望三千里。

秋風引

何處秋風至。蕭蕭送雁羣。朝來入庭樹。孤客最先聞。

莫徭歌

莫徭自生長。名字無符籍。市易雜數人。婚姻通木客。星居占泉眼。火種開山脊。夜渡千仞谿。含沙不能射。

蠻子歌

蠻語鉤輶音。蠻衣斑斕布。熏狸掘沙鼠。時節祠盤飧。忽逢乘馬客。恍若驚鷹顧。腰斧上高山。竟行無舊路。

洞庭秋月

洞庭秋月生湖心。曾波萬頃如鎔金。孤輪徐轉光不定。遊氣濛濛隔寒鏡。是時白露三秋中。湖平月上天地空。岳陽城頭暮角絕。蕩漾已過君山東。山城蒼蒼夜寂寂。水月逶迤繞城白。盪漿巴童歌竹枝。連檣估客吹羌笛。勢高夜久陰力全。金氣肅肅開

星躔。浮雲野馬歸回裔。遙望星斗當中天。天雞相呼曙霞出。劍影含光讓朝日。日出喧喧人不聞。夜來清景非人間。

躡歌詞四首

春江日出大隄平。隄上女郎連袂行。唱盡新詞歡不見。紅霞映樹鷓鴣鳴。

桃溪柳陌好經過。鑿下妝成月下歌。爲是襄王故宮地。至今猶自細膏多。

新詞宛轉遙相傳。振袖傾鬟風露前。月落烏啼雲雨散。遊童陌上拾花鈿。

日莫江南聞竹枝。南人行樂北人悲。自從雪裏唱新曲。直到三春花盡時。

華清詞

日出驪山東。裴回照溫泉。樓臺影玲瓏。稍稍開白烟。言昔太上

皇常居此祈年風中聞清樂往往來列仙翠華入五雲紫氣歸
上玄哀哀生人淚泣盡弓劍前聖道本自我凡情徒顛然小臣
感玄化一望青冥天

步虛詞二首

阿母種桃雲海際花落子成三千歲海風吹折最繁枝跪捧瓊
漿獻天帝

華表千年一鶴歸凝丹爲頂雪爲衣星星仙語人聽盡卻向五
雲鬪翅飛

桃源行

漁舟何招招浮在武陵水垂綸擲餌信流去誤入桃源行教里
清涼尋盡花綿綿蹋花覓徑至洞前洞門蒼黑烟霧生暗行教
步逢虛明俗人毛骨驚仙子爭來教詞何至此須臾皆破冰雪
顏笑言委曲問人間因嗟隱身來種玉不知人世如風燭蓬羞

石髓勸客餐銜藝松枝留客宿雞聲犬聲遙相聞曉光蔥籠開
五雲漁人振衣起出戶滿庭無路花紛紛翻然恐迷鄉縣處一
息不肯桃源住桃花滿溪水似鏡塵心如垢洗不去仙家一出
尋無蹤至今水流山重重

魏宮詞二首

日晚長秋簾外報望陵歌舞在明朝添鑪火欲熏衣麝憶得分
明不忍燒

日映西陵松栢枝下臺相顧一相悲朝來樂府長歌曲唱著君
王自作詞

阿嬌怨

望見歲隄舉翠華試開金屋瑞庭花須臾宮女傳來信言幸平
陽公主家

九華山并引

九華山在池州青陽縣西南。九峯競秀，神采奇異。昔予仰太華，以爲此外無奇。愛女凡荆山，以爲此外無秀。及今見九華，始悼前言之容易也。惜其地偏且遠，不爲世所稱，故歌以大之。奇峯一見，驚魂魄。意想洪鑪始開闢，疑是九龍夭矯欲攀天。忽逢霹靂一聲化爲石，不然何至今。悠悠億萬年，氣勢不死如騰音騫。企音騫舉音騫。雲含幽，兮月添冷。日月凝輝兮江漾影，結根不得要路津。迥秀長在無人境，軒皇封禪登雲亭。大禹會計臨東溟，乘力最反。探山行貌。不來廣樂絕，獨與猿鳥愁青熒。君不見敬亭之山黃索漠，兀如斷岸無稜角。宣城謝守一首詩，遂使名聲齊丘岳。九華山九華山，自是造化一尤物。焉能籍甚乎人間。

送春曲

春向晚，春晚思悠哉。風雲日已改，花葉自相催。漠漠空中去，何時天際來。

春已暮，冉冉如人老。映葉見殘花，連天是青草。可憐桃與李，從此同桑棗。

春景去，此去何時回。遊人千萬恨，落日高臺。寂寞繁花盡，流鶯歸不來。

初夏曲三首

銅壺方促夜，斗柄暫南回。稍嫌單衣重，初憐北戶開。西園花已盡，新月爲誰來。

時節過繁華，陰陰千萬家。巢禽命子戲，園果墜枝斜。寂寞孤飛蝶，窺叢覓晚花。

綠水風初暖，青林露草晞。麥田雉朝雊，桑野人莫歸。百舌悲花盡，平蕪去飛。

柳花詞三首

開從綠條上，散逐香風遠。故取花落時，悠揚占春晚。

輕飛不假風。輕落不委地。撩亂舞晴空。發人無限思。
晴天黯黯雪。來送青春莫。無意似多情。千家萬家去。

送春詞

昨來樓上迎春處。今日登樓又送歸。蘭蓋殘妝含露泣。柳條長
袖向春揮。佳人對鏡容色改。楚客臨江心事違。萬古至今同此
恨。無如一醉盡忘機。

秋詞二首

自古逢秋悲寂寥。我言秋日勝春朝。晴空一鶴排雲上。便引詩
情到碧霄。

山明水淨夜來霜。數樹深紅出淺黃。試上高樓清入骨。豈如春
色嗾人狂。

劉賓客文集卷第二十六

劉賓客文集卷第二十七

樂府下

秦娘歌 并引

秦娘本韋尚書家主謳者。初尚書爲吳郡得之。命樂工誨之。琵琶使之歌且舞。無幾何。盡得其術。居一二歲。携之以歸京師。京師多新聲善工。于是又捐去故技。以新聲度曲。而秦娘名字往往見稱于貴遊之間。元和初。尚書薨于東京。秦娘出居民間。久之。爲蘄州刺史張慜所得。其後慜坐事謫居武陵郡。慜卒。秦娘無所歸。地荒且遠。無有能知其容與藝者。故日抱樂器而哭。其音憔悴。殺以悲。雜客聞之。爲歌其事。以足乎樂府云。

秦娘家本閭門西。門前綠水環金隄。有時妝成好天氣。走上下
臯橋。折花戲風流。太守韋尚書。路傍忽見停隼旗。斗量明珠烏
傳意。紺幘迎入專城居。長鬟如雲衣似霧。錦茵羅薦承輕步。舞

學驚鴻水榭春歌撩上客蘭堂莫從郎西入帝城中貴遊簪組
香簾擁低鬟緩視抱明月纖指破撥生胡風繁華一旦有消歇
題劍無光履聲絕洛陽舊宅生草萊杜陵蕭蕭松柏哀妝奩蟲
網厚如繭博山爐側傾寒灰蘄州刺史張公子白馬新到銅駝
里自言買笑擲黃金月墮雲中從此始安知鵬鳥坐隅飛寂寞
旅魂招不歸秦嘉鏡有前時結韓壽香銷故篋衣山城少人江
水碧斷雁哀猿風雨夕朱絃已絕爲知音雲鬢未秋私自惜舉
目風烟非舊時夢尋歸路多參差如何將此千行淚更灑湘江
班竹枝

秋扇詞

莫道恩情無重來人間榮謝遞相催當時初入君懷袖豈念寒
壚有死灰

搗衣曲

爽砧應秋律繁杵含淒風一一遠相續家家音不同戶庭凝露
清伴侶明月中長裾委襞積輕珮垂璁瓏汗餘衫更馥鈿移麝
半空報寒驚邊雁促思聞候蟲天狼正芒角虎落定相攻盈筐
寄何處征人如轉蓬

七夕二首

河鼓靈旗動姮娥破鏡斜滿空天是幕徐轉斗爲車機罷猶安
石橋成不得槎寧知觀津女竟夕望雲涯
天衢啓雲帳神馭上星橋初喜渡河漢頻驚轉斗杓餘霞張錦
障輕電閃紅綃非是人間世還悲後會遙

龍陽縣歌

縣門白日無塵土百姓縣前挽魚罟主人引客登大隄小兒縱
觀黃犬怒鷓鴣驚鳴遠籬落橘柚垂芳照窓戶沙平草綠見吏
稀寂歷斜陽照懸鼓

度桂嶺歌

桂陽嶺下下復高高。人稀鳥獸駭。地遠草木豪。寄言千金子。知
余歌者勞。

插田歌 并引

連州城下俯接村墟。偶登郡樓。適有所感。遂書其事。為俚歌。以
俟采詩者。

岡頭花草齊。燕子東西飛。田塍望如線。白水光參差。農婦白紵
裙。農夫綠蓑衣。齊唱田中歌。嚶嚶如竹枝。但聞怨响音。不辨俚
語詞。時時一大笑。此必相嘲嗤。水平苗漠漠。烟火生墟落。黄犬
往復還。赤雞鳴且啄。路傍誰家郎。烏帽衫袖長。自言上計吏。年
幼離帝鄉。田夫語計吏。君家儂定諳。一來長安罷。眼大不相參。
計吏笑致辭。長安真大處。省門高軒峨。儂入無度數。昨來補衛
士。唯用筒竹布。君看二三年。我作官人去。

畬田作

何處好畬田。團團縵山腹。鑽龜得雨卦。上山燒卧木。驚麕走且
顧。羣雉聲呼嗥。紅焰遠成霞。輕煤飛入郭。風引上高岑。獵獵度
青林。青林望靡靡。赤光低復起。照潭出老蛟。爆竹驚山鬼。夜色
不見山。孤明星漢間。如星復如月。俱逐曉風滅。本從敲石光。遂
致烘天熟。下種暖灰中。乘陽坼茅蘗。蒼蒼一雨後。苕穎如雲發。
巴人拱手吟。耕耨不關心。由來得地勢。徑寸有餘金。

葡萄歌

野田生葡萄。纏繞一枝蒿。移來碧地下。墀張玉日高。分歧浩繁
縹。脩蔓蟠結曲。揚翹向庭柯。意思如有屬。鳥之立長檠。布護當
軒綠。米液澆其根。理疎看滲漉。繁葩組綬結。懸實珠璣感。馬乳
帶輕霜。龍鱗躍初旭。有客汾陰至。臨堂瞪雙目。自言我晉人。種
此如種玉。釀之成美酒。令人飲不足。為君持一斗。往取涼州牧。

題鳩吟

朝陽有鳴鳳不聞千萬祀。題鳩催衆芳。晨間先入耳。秋風白露晞。從是尔啼時。如何上春日。唧唧滿庭飛。

牆陰歌

白日左右浮天潢。朝晡影入東西牆。昔爲兒童在陰戲。當時意小覺日長。東隣侯家吹笙簧。隨陰促促移象牀。西鄰田舍乏糟糠。就影汲汲舂黃粱。因思九州四海外。家家只占牆陰內。莫言牆陰咫尺間。老却主人如等閒。君看眼前光景促。中心莫學太行山。

觀雲篇

興雲感陰氣。疾走如見機。晴來意態行。有若功成歸。蔥龍含晚景。凝白潔秋暉。夜深度銀漢。漢仙人衣。

沓潮歌

并引

元和十年夏五月。終風駕濤。南海羨潮溢。南人曰沓潮也。率三更歲一有之。余爲連州客。或爲予言其狀。因歌之。附于南越志。屯門積日無回颿。滄波不歸成沓潮。轟如鞭石斫。且搖巨空欲。駕鼉鼉橋。驚湍颯縮悍而驕。大陵高岸尖岩堯。四邊無阻音響調。背負元氣掀重霄。介鯨得性方逍遙。仰鼻嗑吸揚朱翹。海人狂顧迭相招。蜀衣整首聲曉曉。征南將軍登麗譙。赤旗指下麾不敢翼。翌日風回冷氣消。歸濤細細景昭昭。烏泥白沙復滿海。海色不動如青瑤。

百花行

長安百花時。風景宜輕薄。無人不沾酒。何處不聞樂。長風連夜動。微雨凌曉濯。紅焰出牆頭。雪花暎樓角。繁紫間松竹。遠黃遠籬落。臨落不勝愁。輕飛去何託。滿庭蕩魂魄。照廡成丹渥。爛熳喉顛狂。飄寒勸行樂。時節易晚晚。清陰覆池閣。唯有安石榴。當

軒懣寂寞

春有情篇

爲問遊春侶春情何處尋
花含欲語意草有闌生
心雨頻催發色雲輕不作陰
縱令無月夜芳興暗中深

路傍曲

南山宿雨晴春入鳳凰城
處處聞絃管無非送酒聲

白鷺兒

白鷺兒最高格毛衣新成雪
不敵衆禽喧呼獨凝寂
孤眼芊芊草久立
潺潺石前山正無雲飛去入遙碧

壯士行

陰風振寒郊猛虎正咆哮
徐行出燒地連吼入黃茅
壯士走馬去鏖前
擊玉弮叱之使人立
一發如鉞交悍睛忽星墮
飛血濺林梢
彪炳爲我席羶腥
充我庖里中欣害除
賀酒紛號呶明日

長橋上傾城看斬蛟

邊風行

邊馬蕭蕭鳴邊風滿磧生
暗添弓箭力斗上鼓聲聲
襲月寒風起吹雲陰
陳成將軍占氣候出號夜翻營

一作寒號
畏翻城

竹枝詞

四方之歌異音而同樂
歲正月余來建平里中見
聯歌竹枝吹短笛擊鼓以赴節
歌者揚袂睢舞以曲多爲賢
聆其音中黃鍾之羽卒章激
許如吳聲雖儉俸不可分而
含思宛轉有淇濮之豔昔屈
原居沅湘間其民迎神詞多
鄙陋乃爲作九歌到于今荆
楚鼓舞之故余亦作竹枝詞
九篇俾善歌者颺之附于末
後之聆巴歛知變風之自焉

白帝城頭春草生
白蓋山下蜀江清
南人上來歌一曲
北人陌上動鄉情

山桃紅花滿上頭。蜀江春水拍山流。花紅易衰似郎意。水流無限似儂愁。

江上朱樓新雨晴。瀼西春水澗文生。橋東橋西好楊柳。人未人去唱歌行。

日出三竿春霧消。江頭蜀客駐蘭橈。憑寄狂夫書一紙。住在成都萬里橋。

兩岸山花似雪開。家家春酒滿銀杯。昭君坊中多女伴。永安宮外蹋青來。

城西門前灩澦堆。年年波浪不能摧。懊恨人心不如石。少時東去復西來。

瞿塘嘈嘈十二灘。此中道路古來難。長恨人心不如水。等閒平地起波瀾。

巫峽蒼蒼烟雨時。清猿啼在最高枝。箇裏愁人腸自斷。由來不

是此聲悲。

山上層層桃李花。雲間烟火是人家。銀釵金釵來負水。長刀短笠去燒畬。

楊柳枝詞九首

塞北梅花羌笛吹。淮南桂樹小山詞。請君莫奏前朝曲。聽唱新翻楊柳枝。

南陌東城春蚤時。相逢何處不依依。桃紅李白皆誇好。須得垂楊相發揮。

鳳闌輕遮翡翠幃。龍池遙望麴塵絲。御溝春水相暉映。狂殺長安年少兒。

金谷園中鶯亂飛。銅駝陌上好風吹。城中桃李須臾盡。爭似垂楊無限時。

花萼樓前初種時。美人樓上鬪香支。如今拋擲長街裏。露葉如花

啼欲恨誰
賜帝行宮汴水濱。數株殘柳不勝春。晚來風起花如雪。飛入宮
牆不見人。
御陌青門拂地垂。千條金縷萬條絲。如今縮作同心結。將贈行
人知不知。
城外春風吹酒旗。行人揮袂日西時。長安陌上無窮樹。唯有垂
楊縮別離。
輕盈嫋娜占年華。舞榭妝樓處處遮。春盡絮飛留不得。隨風好
去落誰家。

浪淘沙詞九首

九曲黃河萬里沙。浪淘風簸自天涯。如今直上銀河去。同到牽
牛織女家。
洛水橋邊春日斜。碧流輕淺見瓊砂。無端陌上狂風急。驚起鴛

鴛出浪沙

汴水東流虎眼文。清淮曉色鴨頭春。君看渡口淘沙處。渡卻人
間多少人。

鸚鵡洲頭浪颭沙。青樓春望日將斜。銜泥燕子爭歸舍。獨有狂
夫不憶家。

濯錦江邊兩岸花。春風吹浪正淘沙。女郎剪下鴛鴦錦。將向中
流定晚霞。

日照澄洲江霧開。淘金女伴滿江隈。美人首飾侯王印。盡是沙
中浪底來。

八月濤聲吼地來。頭高數丈觸山回。須臾卻入海門去。卷起沙
堆似雪堆。

莫道謾言如浪深。莫言遷客似沙沈。千濤萬灑雖辛苦。吹盡狂
沙始到金。

流水淘沙不暫停。前波未滅後波生。令人忽憶瀟湘渚。唱迎神三兩聲。

瀟湘神二首

湘水流。湘水流。九疑雲物至今愁。君問二妃何處所。零陵香草露中秋。
斑竹枝。斑竹枝。淚痕點點寄相思。楚客欲聽瑤瑟怨。瀟湘深夜月明時。

拋毬樂詞二首

五綵綉團圓。登君璫瑁筵。最宜紅燭下。偏稱落花前。上客如先應須贈一船。
春早見花枝。朝朝恨發遲。及看花落後。卻憶未開時。幸有拋毬樂。一杯君莫辭。

楊柳枝詞二首

迎得春光先到來。淺黃輕綠映樓臺。只緣裊娜多情思。便被春風長暗猜。

巫峽巫山楊柳多。朝雲暮雨遠相和。因想陽臺無限事。憑君回唱竹枝詞。

竹枝詞二首

楊柳青青江水平。聞郎江上唱歌聲。東邊日出西邊雨。道是無晴還有晴。
楚水巴山江雨多。巴人能唱本鄉歌。今朝北客思歸去。回入訖那披綠蘿。

訖那曲詞二首

楊柳鬱青青。竹枝無限情。周郎一回顧。聽唱訖那聲。
蹋曲興無窮。調同詞不同。願郎千萬壽。長作主人翁。
右已上詞先不入集。伏錄播在樂章。今附于卷末。

劉賓客文集卷第二十七

劉賓客文集卷第二十八

送別四十六首

送工部張侍郎入蕃弔祭 時張兼脩史

月窟賓諸夏云官降九天飾終隣好重錫命禮容全水咽猶登
隴沙鳴稍極邊路因乘驛近志爲飲永堅毳帳羗池見烏旗搖
曳前歸來賜金石榮耀自編年

早秋送臺院楊侍御歸朝 兄弟四人遍歷諸
科二人同在省

仙署隸華春當時已絕倫今朝丹闕下更入白著人重振高陽
族分居要路津一門科第足五府碑書頻驚鳥得秋氣法星懸
火旻聖朝寰海靜所至不埋輪

送工部蕭郎中刑部李郎中並以本官兼中丞分命克
京西京北覆糧使

霜簡映金章相輝同舍郎天威巡虎落星使出鷺行尊祖成全

策京抵閱見糧歸來虜塵滅畫地奏明光

送李尚書鎮滑州自浙西觀察徵拜兵部侍郎月餘有此拜

南徐報政入文昌東郡頌才別建章視草名高同蜀客擁旄年

少勝荀郎黃河一曲當城下緹騎千重照路傍自古相門還出

相如今人望在巖廊其後果繼韋平之族

送渾大夫赴豐州自大鴻臚拜家承舊勳

鳳銜新詔降恩華又見旌旗出漢家故吏來辭辛屬國精兵願

逐李輕車纜裘君長迎風馭錦領首蒙蹋雪衛其柰明年好春

日無人喚看牡丹花

送源中丞克新羅冊立使侍中之孫

相門才子稱華簪持節東行捧德音身帶霜威辭鳳闕口傳天

語到雞林煙開鼈背千尋碧日浴鯨波萬頃金想見扶桑受恩

後一時西拜盡傾心

送陸侍御歸淮南使府五韻用年字

江右重詩篇陸生名久傳鳳城來已熟羊酪不嫌羶歸路芙蓉

府離堂瑇瑁筵泰山呈臘雪隋柳布新年曾泰揚州薦因君達

短牋時段丞相鎮揚州嘗辱表薦

送太常蕭博士棄官歸養赴東都時元兄罷相為少師仲兄為郎官並分司

洛邑

兄弟盡鴛鴦歸心切問安貪榮五采服遂挂兩梁冠侍膳曾調

鼎循陔更握蘭從今別君後長向德星看

送王司馬之陝州自太常丞授工為詩

暫輟清齋出太常空携詩卷赴甘棠府公既有朝中舊司馬應

容酒後狂案牘來時唯署字風煙入興便成章兩京大道多遊

客每遇詞人戰一場

洛中送楊處厚入關便遊蜀謁常令公

洛陽秋日正淒淒。君去西秦更向西。舊學三冬今轉富。曾傷六
駟養初齊。王城曉入窺丹鳳。蜀路晴來見碧雞。蚤識卧龍應有
分。不妨從此躡丹梯。

洛中送韓七中丞之吳興。口號五首。

昔年意氣絡羣英。幾度朝回一字行。海北天南零落盡。兩人相
見洛陽城。

自從雲散各東西。每日歡娛却慘悽。離別苦多相見少。一生心
事在書題。

今朝無意訴離愁。何況清絃急管催。本欲醉中輕遠別。不知翻
引酒悲來。

駱駝橋上蘋風起。鸚鵡杯中若下春。水碧山青知好處。開顏一
笑向何人。

溪中士女出芭籬。溪上鴛鴦避畫旗。何處人間似仙境。春山携

妓採茶時。

送周使君罷渝州歸郢州別墅。

君思郢上吟歸去。故自渝南擲郡童。野戍岸邊留畫舫。綠蘿陰
下到山莊。池荷雨後衣香起。庭草春深綬帶長。只恐鳴騶催上
道。不容待得晚菘嘗。

發華州留別張侍御。

賈

束簡下延閣。買符驅短轅。同人惜分袂。結念辭芳尊。切切別絃
急。蕭蕭征騎煩。臨歧無限意。相視却忘言。

張詩云。夫子生知者。相期妙理中。遠有忘

言之

奉送冢兄歸王屋山隱居二首。

據道書王屋山一名陽洛山。

陽洛天壇上。依稀似玉京。夜分先見日。月淨遠聞笙。雲路將雞
犬。丹臺有姓名。古來成道者。兄弟亦同行。

春來山好事。歸去憶逍遙。水淨苔莎色。露香芝朮苗。登臺吸瑞

景飛步翼神飆。願薦墳麓曲。相將學玉簫。

送王師魯協律赴湖南使幕

即文穆公之孫

翩翩馬上郎。驅傳渡三湘。橘樹沙洲暗。松醪酒肆香。素風傳竹帛。高價騁琳琅。楚水多蘭若。何人事塞芳。

別友人後答書因以詩贈

前時送君去。揮手青門橋。路轉不相見。猶聞馬蕭蕭。今得出關書。行塵日已遙。春還遲君至。共結芳蘭若。

奉送浙江李僕射相公赴鎮

奉送至臨泉驛書札見微拙詩時在汝州

建節東行是舊遊。歡聲喜氣滿吳州。郡人重得黃丞相。童子爭迎郭細侯。詔下初辭温室樹。夢中先到景陽樓。自憐不識平津閣。遙望旌旗汝水頭。

重送浙西李相公頃簾問江南已經七載後歷滑臺劍

南兩鎮遂入相今復領舊地新加旌旄

江北萬人看玉節。江南千騎引金鏡。鳳從池上遊滄海。鶴到遼東識舊巢。城下清波含百谷。窻中遠岫列三茅。碧雞白馬回翔久。却憶朱方是樂郊。

送華陰尉張茗赴邕府使幕

張即燕公之孫頃坐事除名

昔忝南宮郎。往來東觀頻。嘗披燕公傳。聳若窺三辰。翊聖崇國本。保賢正朝倫。高視緬今古。清風曼無鄰。蘭錡照通衢。一家十朱輪。鄴國嗣侯絕。韋鄉世業貧。夫子承大名。少年振芳塵。青袍仙掌下。矯首凌烟旻。公治本非罪。潘郎一為民。風霜苦搖落。堅白無緇磷。一旦逢良時。天光燭幽淪。重為長裾客。佐彼觀風臣。分野窮禹畫。人烟過虞巡。不言北行遠。所樂相知新。雨起巫山陽。鳥鳴湘水濱。離筵出蒼莽。別曲多愁辛。今朝一杯酒。明日千里人。從此孤舟去。悠悠天海春。

送湘陽熊判官孺登府罷歸鍾陵因寄呈江西裴中丞

射策志未就。從事歲云除。篋留馬卿賦。袖有劉弘書。忽見夏木
 深。張然憶吾廬。復持州民刺。歸謁專城居。君家誠易知。勝絕傾
 里閭。人言北郭生。門有卿相輿。鍾陵萬千里。帶郭西江水。朱檻
 照河宮。旗亭綠雲裏。前年初缺守。慎簡由宸衷。臨軒弄郡章。得
 人方付此。是時左馮翊。天下第一理。貴臣持牙璋。優詔發青紙。
 迎風污吏免。先令疲人喜。何武劾腐儒。陳蕃禮高士。昔升君子
 堂。腰下綬猶黃。中丞時為萬年尉汾陰有寶氣。赤堇多奇鉞。束簡下曲
 臺。佩鞶來歷陽。綺筵陪一笑。蘭室襲餘芳。風水忽異勢。江湖遂
 相忘。因君倘借問。為話老滄浪。中丞為博士製相國柳宜誠謚
 議者題之項授子以其本厥
 後收和州鄴度使杜司徒以中丞封譽俱高欲令軍裝以重我
 府故授以本州團練使瀟坐觀腰鞶禮成離甚相視而笑後房
 燕樂十夜縱誤司從之宿特獲未坐初中丞自尚書屯田負外
 郎禹守踵其武者今給事中穆公我給事中右丞段公子不佞
 繼右丞之後故日襲餘芳焉

送韋秀才道冲赴制舉

驚禽一辭巢。棲息無少安。秋扇一離手。流塵蔽霜紈。故侶不可
 追。涼風日已寒。遠逢杜陵士。別盡平生歡。逐客無印綬。楚江多
 芷蘭。因君時暇遊。長缺不復殫。閱書南軒霽。絙瑟清夜闌。萬境
 身外寂。一杯腹中寬。伊昔玄宗朝。冬卿冠鴛鴦。肅穆升內殿。從
 容領儒冠。游夏無措詞。陽秋垂不刊。至今羣玉府。學者空縱觀。
 世人希德門。揭若攀峯巒。之子向明訓。鏘如振琅玕。一旦西上
 書。斑衣拂征鞍。荆臺宿暮雨。漢水浮春瀾。君門起天中。多士如
 星攢。烟霞雙闕。拊舞羅千官。清漏滴銅壺。仙厨下離槃。熒煌仰
 金榜。錯落濡飛翰。古來長策人。所歎遭時難。一鳴從此始。相望
 青雲端。

送李策秀才還湖南因寄幕中親故兼簡衡州呂八

郎中

深春風日淨。晝長幽鳥鳴。僕夫前致辭。門有白面生。攝衣相問訊。解帶坐南榮。端志見耆叟。芳言發精誠。因出懷中文。調孤詞亦清。悄如促柱絃。掩抑多不平。乃言本蜀士。世降岷山靈。前人秉甄文。高視未上京。曳綬司徒府。所從信國禎。析薪委室林。善響難繼聲。何處翳附郭。幾人思邛城。雲天望喬木。風水悲流羊。前與計吏西。始列貢士名。森然就筆札。從試春官鄉。帝城岐路多。万足伺晨星。茫茫風塵中。工拙同有營。寒女勞夜織。山苗榮寸莖。侯門方擊鐘。衣褐誰將迎。弱羽果摧頹。壯心鬱怏怏。諒無蟠本客。聊復蓬累行。昨日訊靈龜。謠言利艱貞。當求捨拔中。必在審己明。誓將息薄遊。焦思窮筆精。蔣蘭在幽渚。安得揚芬馨。曰余摧落者。散質負華纓。一聆苦辛詞。再動伊鬱情。身棄言不重。愛才心尚驚。恨無羊角風。使爾化北溟。論罷情益親。涉旬忘歸程。日携邑中客。閑眺江上城。晝渴命金壘。宵談轉璿衡。薰風

香塵尾。月露濡桃笙。忽被戎羸驟。薄言事南征。火雲蔚千里。旅思浩已盈。湘江含碧虛。衡嶺浮翠晶。豈伊山水異。適與人事并。油幕似昆丘。粲然疊瑤瓊。庾樓見清月。孔坐多綠醴。復有衡山守。本自雲龍庭。抗志在靈府。發越倅咸英。一麾出營陽。惠彼蚩蚩氓。隼旟辭灞水。居者皆涕零。惟昔與伊人。交歡在夙齡。一從雲雨散。滋我鄙怯萌。北渚不堪愁。南音誰復聽。離憂若去水。浩漾無時停。嘗聞祝融峯。上有神禹銘。古石琅玕姿。祕文螭虎形。聖功莫遠服。神物擁休禎。賢人在其下。彷彿疑蓬瀛。君行歷郡齋。大袂拂雙旌。飾容遇朗鑒。肝萬可以呈。昔日馬相如。臨邛坐畫傾。勉君刷羽翰。蚤取凌青冥。

送張盥赴舉

并引

古人以偕受學爲同門友。今人以偕升名爲同年友。其語熟見縉紳者。皆道焉。余與張盥爲友。文人由是道也。曩吾見爾之始

生以老成爲祝。今吾見爾之成人，以未立爲憂。吾不幸嚮所謂同年友，當其盛時，聯袂齊鑣，亘絕九衢。若屏風然，今來落落如曙星之相望，借曰會合不煩異席，可長太息哉。然而尚書右丞衛大受、兵部侍郎武廷碩二君者，當時偉人，咸萬夫之望，足以計十朋之多也。第如京師無騷騷爾，亦無忻忻爾。時秋也，吾爲若叩商之謳，幸有感夫二君子。

爾生始懸孤，我作座上賓。引箸舉湯餅，祝詞天麒麟。今成一丈夫，坎坷愁風塵。長裾來謁我，自號廬山人。道舊與撫孤，惻然傷我神。依依見耆聰，嘿嘿含悲辛。永懷同年友，追想出谷隴。三十二君子，齊飛陵烟旻。曲江一會時，後會已彫淪。况今三十載，閱世難重陳。盛時一已過，來者日日新。不如搖落樹，重有明年春。火後見琮璜，霜餘識松筠。肅風乃獨秀，武部亦絕倫。爾今持我詩，西見二重臣。成賢必舊念，保責在安貧。清時爲清郎，氣力侔

陶鈞乞取斗升水，因之雲漢津。

送裴處士應制舉

晉人裴昌禹讀書數千卷，於周官小戴禮尤邃。性是古，敢言。雖侯王不能卑下，故與世相參差。凡抵有位，以索合行天下。幾依戶及及通常歎諸侯莫可遊，欲一見天子而未有路。會今年詔書徵賢良，昌禹大喜，以爲盡可以豁平生。搏髀爵躍曰：一觀云龍庭足矣。繇是裹三月糧而西，祖咨余以七言爲遊之資藉耳。

裴生久在風塵裏，氣勁言高少知己。註書曾學鄭司農，歷國多於孔夫子。往年訪我到連州，無窮絕境終日遊。登山雨中試蠟屐，入洞夏裏被貂裘。白帝城邊又相遇，歛翼三年不飛去。忽然結束如秋蓬，自稱對策明光宮。人言策中說何事，掉頭不答看飛鴻。彤庭翠松迎曉日，鳳銜金榜雲間出。中貴腰鞭立傾酒，宰臣委佩觀搖筆。古稱射策如鬯，一發偶中何時無。由來草澤

無忌諱努力滿挽當雲衢憶得童年識君處嘉禾日後聯牆任
垂鈞釣得王餘魚翫芳共登蘇小墓此事今同夢想間相看一
笑且開顏老大希逢舊鄰里為君扶病到方山

和州送錢侍御自宣州幕拜官便於華州覲省

五絲繡衣裳當年正相稱春風函關路歸去甫多興蘭陵行可
採蓮府猶回瞪楊家緝憶迎侍御即王相公貴婿謝守瑤華贈宣州崔相公有詩贈
行御街草泛灑臺栢煙含凝曾是王者遊無因理歸乘

將赴汝州途出浚下留辭李相公

長安舊遊四十載鄂渚一別十四年後來富貴已零落歲寒松
栢猶依然初逢貞元尚文主雲闕天池共翔舞相看却教六朝
臣屈指如今無四五夷門天下之咽喉昔時往往生瘡疣聯翩
舊相來鎮壓四海吐納皆通流久別凡經幾多事何由說得平
生愁千思萬慮盡如空一笑一言真可休世間何事最殷勤白

頭將相逢故人功成名遂會歸老請向東山為近鄰

送令狐相公自僕射出鎮南梁

夏木正陰成戎裝出帝京沾襟辭闕淚回首別鄉情雲樹褒中
路風煙漠上城前旌轉谷去後騎蹋橋聲文領鴛行重無嫌虎
綬輕終提一麾去再入副蒼生

送趙中丞自司金外郎轉官參山南令狐僕射幕府趙氏

兄弟皆僕射門客

綠樹滿褒斜西南蜀路賒驛門臨白草縣道過黃花相府開油
幕門生逐絳紗行看布政後還從入京華

奉送裴司徒令公自東都留守再命太原本封晉國公兩任相去十

六年

星使出關東兵符賜上公山河歸舊國管籥換離宮行色旌旗
動軍聲鼓角雄愛棠餘故吏騎竹見新童漢壘三秋靜胡沙萬

里空其餘天下望旦夕詠清風

奉送李戶部侍郎自河南尹再除本官歸闕

昔年內署振雄詞今日東都結去思宮女猶傳洞簫賦國人先
詠袞衣詩華星却復文昌位別歸重太乙池想到金門待通籍
一時驚喜見風儀鶴

送蘄州李郎中赴任

楚關蘄水路非賒東望雲山日夕佳薤葉照人呈夏簟松花滿
盃試新茶樓中飲興因明月江上詩情為晚霞北地交親長
領蚤將玄鬢到京華

洛中春末送杜錄事赴蘄州

尊前花下長相見明日忽為千里人君過午橋回首望洛城猶
自有殘春

夜宴福建盧侍御宅因送之鎮

暫駐旌旗洛水隄綺筵紅燭醉蘭閨美人美酒長相逐莫怕猿
聲發建溪

洛中送崔司業使君扶持赴唐州

綠野方城路殘春柳絮飛風鳴驪驪馬日照老萊衣洛苑魚書
至江村雁戶歸相思望淮水雙鯉不應稀

送河南皇甫少尹赴絳州

祖帳臨周道前旌指晉城午橋羣吏散亥字老人迎詩酒同行
樂別離方見情從茲洛陽社吟詠欠書生

送前進士蔡京赴學究科時舊相揚尚書掌選

耳聞戰鼓帶經鋤振發名聲自里閭已世間能賦客更攻憲
下絕編書朱門達者誰能識絳帳書生盡不如幸遇天官舊丞
相知君無翼上空虛

送唐舍人出鎮閩中

暫辭鴛鴦鷺出蓬瀛忽擁貔貅鎮粵城閩嶺夏雲迎皂蓋建溪秋
樹映紅旌山川遠地由來好富貴當年別有情了却人間婚嫁
事復歸朝右作公卿

送盧處士歸嵩山別業

世業嵩山隱雲深無四隣藥爐燒姹女酒甕貯賢人曉日華陰
霧秋風函谷塵送君從此去鈴閣少談賓

送李友路秀才赴舉

誰憐相門子不語望秋山生長紉綺內辛勤筆硯間榮親在名
字好學棄官班俟明年桂高堂開笑顏

送國子令狐博士赴興元覲省

相門才子高陽族學省清資五品官諫院過時榮棣萼謝庭歸
去蹋芝蘭山頭花帶烟嵐晚棧底江涵雪水寒伯仲到家人盡
賀柳營蓮府遙相歡

送李二十九兄員外赴邠寧使幕

家襲韋平身業文素風清白至今貧南宮通籍新郎吏西候從
戎舊主人城外草黃秋有雪烽頭煙靜虜無塵昂門爲別霜天
晚賸把離觴三五巡

送分司陳郎中祇召直史館重脩三聖實錄

蟬鳴官樹引行車言自成周赴玉除遠取南朝貴公子重脩東
觀帝王書常時載筆窺金匱暇日登樓到石渠若問舊人劉子
政如今頭白在南徐

送李中丞之楚州

緹騎朱旗入楚城士林皆賀振家聲兒童但喜迎賢守故吏猶
應記小石萬頃水田連郭秀四時煙月映淮清憶君初得崑山
玉同向揚州携手行

送李庚先輩赴選

一家何啻十朱輪諸父雙飛秉大鈞曾脫素衣參幕客却爲精
舍讀書人離筵洛水侵杯色征路函關向晚塵今日山公舊賓
主知君不負帝城春

送廖謀東遊二首

九陌逢君又別離行雲別鶴本無期望嵩樓上忽相見看過花
開花落時

繁花落盡君辭去綠草垂楊引征路東道諸侯皆故人留連必
是多情處

送從弟郎中赴浙西

并引

從弟三復十餘年間凡三爲浙右從事往年王公入相薦敬登
朝中復從事鎮南未幾而罷昨以尚書外郎奉使至洛旋承新
命改轅而東三從公皆在舊地徵諸故事曩無其倫故賦詩贈
之亦志異也

銜命出尚書新恩換使車漢庭無右者梁苑重歸歟又食建業
水曾依京口居

劉前軍傳云本
營人世家京口

共經何恨事賓主兩如初

劉賓客文集卷第二十八

劉賓客文集卷第二十九

送贈二十四首

贈別君素上人

并引

曩予習禮之中庸至不勉而中不思而得悛然知聖人之德學
以至于無學然而斯言也猶示行者以室廬之奧耳求其經術
而布武未易得也晚讀佛書見大推念物之普級寶山而梯之
高揭慧火巧鎔惡見廣疎便門旁束邪徑其所證入如舟濟川
未始念于前而日遠矣夫何勉而思之邪是余知突音奧于中
庸啓鍵關于內典會而歸之猶初心也知予者請予因儒而
援佛謂道有二焉夫悟不因人在心而已其証也猶啗人之享
大牢信知其味而不能形于言以聞于耳也口耳之間兼寸耳
尚不可使聞他人之不吾知宜矣聞士君素偶得予于所親一
麻棲草千里來訪素以道眼視予予以所視視之不由陞級攜

予智地居數日若有得而行乃爲詩以見志焉云
窮巷唯秋草高僧獨扣門相歡如舊識問法到無言水爲風生
浪珠非塵可昏去來皆是道此別不銷魂

送深法師遊南嶽

上人本在資聖寺

師在白雲鄉名登善法堂十方傳句偈八部會壇場飛錫無定
所寶書留舊房唯應銜菓雁相送至衡陽

廣宣上人寄在蜀與韋令公唱和詩卷因以令公手札

答詩示之

碧雲佳句久傳芳曾向成都住草堂振錫常過長者宅披文猶
滯令公香一時風景添詩思八部入天入道場若許相期同結
社吾家本自有柴桑

送僧仲剎東遊兼寄呈靈澈上人

釋子道成神氣閑住持曾上清涼山晴空禮拜見真像金毛五

髻鄉雲間西遊長安隸僧籍本寺門前曲江碧松間白月照寶
書竹下香泉灑瑤席前時學得經論成奔馳象馬開禪窟高筵
談柄一麾拂講下聽徒如醉醒舊聞南方多長老次第未入荆
門道荊州本自重彌天南朝塔廟猶依然宴坐東陽枯樹下經
行居止故臺邊忽憶遺民社中客爲我衡陽駐飛錫講罷同尋
相鶴經閑來共蠟登山屐一旦揚著望沃州自言王謝許同遊
憑將雜擬三十首寄與江南湯惠休

送僧元暲南遊

并引

予策名二十年百慮而無一得然後知世所謂道無非畏途唯
出世間法可盡心耳由是在席硯者多旁行四句之書備將迎
者皆赤頰白足之侶深入智地靜通還源客塵觀盡妙氣來宅
內視胷中猶煎鍊然開士元暲姓陶氏本丹陽居家世有爵人
不藉其資於毗尼禪那極細密之義於中後日習總持之門妙

音奮迅願力昭荅雅聞予事佛而佞亟來相從或問師藎形之
自對曰小失怙恃推棘心以求上乘積四十年有羸老將至而
不懈始悲後泉之有冽今痛防墓之未遷塗芻莫脩薪火恐滅
諸相皆離此心長懸雖萬性歸佛盡爲釋種如河入海無復水
名然具一切智者豈惟遺百行求無量義者寧容斷思今聞南
諸侯雅多大士思扣以苦調而希其末光無容至前有足悲者
予聞是說已力不足而悲有餘因爲詩以送之庶乎踐霜露者
聆之有惻

寶書翻譯學初成振錫如飛白足輕彭澤因家凡幾世靈山預
會是前生傳鑑已悟無爲理濡露猶懷罔極情從此多逢大居
士何人不願解珠璣

送如智法師遊辰州兼寄許評事

前日過蕭寺者師上講筵都人禮白足施者散金錢方便無非

教經行不廢禪還知習居士發論待彌天

贈長沙讚頭陀

外道邪山千萬重真言一發盡摧鋒有時明月無人夜獨向昭
潭制惡龍

送惠則法師上都因呈廣宣上人

三引師精
淨名經

佛示滅後大弟子演聖言而成經傳心印曰法承法而能專曰
宗由宗而分教曰友坐而攝化者勝義皆空之宗也行而宣教
者摧破邪山之友也釋子惠則生于豫李思濟劫濁乃學于一
友開彼群迷以爲盡妙理者莫如法門變凡夫者莫如佛土悟
無染者莫如散花故業于淨名深達實相自京師涉漢沔歷鄔
郢登熊相聽徒百千耳感心化法無住道行而歸顧予有社內
之因故言別之日爰緣瞥起時也秋盡詠江淹雜擬以送之前
見宣上人爲我多謝

睹日東林者講時。都人象馬。兩琉璃。雪山童子。應前世。金粟如來。是本師。一錫言歸九城路。三衣曾拂萬年枝。休公久別如相問。楚客逢秋心更悲。

秋日過鴻舉法師寺院使送歸江陵 并引

梵言沙門。猶華言去欲也。能離欲。則方寸地。虛虛而萬景入。入必有所泄。乃形乎詞。詞妙而深者。必依于聲律。故自近古而降。釋子以詩聞于世者。相踵焉。因定而得境。故儵然以清。由惠而遣詞。故粹然以麗。信禪林之蘊夢。而誠河之珠璣耳。初鴻舉學詩于荆郢。皆私試竊詠。發于餘習。蓋榛楛之翠羽。戈者未之。焉。今年至武陵。二千石始竒之。有起予之歎。以方袍親絳紗者。十有餘旬。由是名稍聞。而藝愈變。閏八月。余步出城中門。謁仁祠。而鴻舉在焉。與之言移時。因告以將去。且曰。貧道雅聞東諸侯之工爲詩者。莫若武陵。今章承其語言。如得法印。寶山之下。

宜有所持。豈徒衣襪之中。泉花而已。余聞是說。乃叩商而吟成。一章。章八句。郡守以坐嘯餘詠。激清徵而應之。師其行乎。足以資一時中之學矣。

看盡長廊遍。尋僧一逗幽。小池兼鶴淨。古木帶蟬秋。客至茶煙起。禽歸講席收。浮杯明日去。相望水悠悠。

重送鴻舉赴江陵謁馬逢侍御

西北秋風彫蕙蘭。洞庭波上碧雲寒。茂陵才子江陵住。乞取新詩合掌看。

送僧及南謁柳員外 并引

九江僧方及。既出家。依匡山。一時中頗屬詩。以憶思。古詩人暨及。號爲能賦詩。有輒求其詞。吟呻之拳拳。然多多益嗜。影不出山者十年。嘗登最高峰。四望于海。冲然有遠游之志。頓錫而言曰。神馳而形閤者。方內之徒。以吾無方。閤於何者。繇是耳。得必

目探之意必身隨之。文雲遊四句虛言無迹而遠。予爲連州居
無何而方及至。出祓中詩一笈。以贖予。其詞甚富。留一歲。觀其
行結矩如。教益多之。一旦以行日來告。且曰。雅云鳥味之下有
賢諸侯。願濟其門。如蹈下地。敢乞詞以抵之。予唯而賦。顧其有
重請之色。起於顏間耳。

昔事廬山遠。精舍虎溪東。朝陽照瀑水。樓閣虹霓中。騁望羨游
雲。振衣若秋蓬。舊房閉松月。遠思吟江風。古寺歷頭陀。竒峯攀
祝融。南登小桂嶺。卻望歸塞鴻。衣祴貯文章。自言學雕蟲。捨榆
念陵厲。覆篋圖穹崇。遠郡多暇日。有時訪禪宮。石門崇峭絕。竹
院含空濛。幽響滴巖溜。晴芳飄野叢。海雲懸颯母。山果屬祖公。
忽憶吳興郡。白蘋正菼龍。願言挹風采。邈若窺華嵩。桂水多夏
瀾。火山宿焰紅。三衣濡菌露。一錫飛煙空。勿謂翻譯徒。不爲文
雅雄。古來賞音者。樵爨得孤桐。按祖公宜斥賦華者而越絕書有猿公張衡賦南都有猿父長

肅之句古文士又云猿父
語是而言謂猿爲父明矣

贈日本僧智藏

浮杯萬里過滄溟。遍禮名山適性靈。深夜降龍潭水黑。新秋放
鶴野田青。身無彼我那懷土。心會真如不讀經。爲問中華學道
者。幾人雄猛得寧馨。

贈眼醫婆羅門僧

三秋傷望遠。終日泣途窮。兩目今先暗。中年似老翁。眉朱漸成
碧。羞日不禁風。師有金篦術。如何爲發蒙。

海陽湖別浩初師并引

瀟湘間。無土山。無濁水。民乘是氣。往往清惠而文。長沙人浩初。
生既因地而清矣。故去葷洗慮。剔顛毛而壞其衣。居一都之殷。
易與士會。得執本教。盡捐苛禮。自公侯守相。必賜其清問。耳目
灌注。習浮于性。而里中兒質。與浩初比者。嬰冠帶。秦要子吏。

得以乘陵之汨沒天惠不得以奮莫可望浩初之清光于侯門
上坐第自吟羨而已浩初益白多其術尤勇于近遠者而歸之
往年之臨賀唁侍郎楊公留歲餘云遺以七言詩于筆于素前
年省柳儀曹于龍城又為賦三篇皆章書今復來連山以前所
得雙南金出于祓亟請予賡之按師為詩頗清而奕棊至第三
品二道皆足以取幸于士大夫宜薰餘習以深入也會吳郡以
山水冠世海陽又以奇甲一州師慕道于泉石宜篤故攜之以
嬉及言旋復引與共載于湖上奕于樹石間以植沃州之因緣
且賦詩以道其事

近郭有殊境獨造常鮮懽逢君駐緇錫觀白梅林巒湖滿景方
霽野香春未闌愛泉移席近聞石輟棊者風止松猶韻花繁霞
晚乾橋形出樹曲巖影落池寒湘東架險凡四橋山下出泉逗
岩為池泓澄可愛者不可遮舉
故狀其境別路千嶂裏詩情莫雲端它年買山處似此則隳官
以貽好事

觀棊歌送懷師西遊

長沙男子東林師閑讀菴經工奕棋有時凝思如入定暗覆一
局誰能知今年訪予來小桂方袍袖中貯新勢山城無事愁刁
長白晝懵懵眠匡牀因君臨局看鬪智不覺遲景沈西牆自從
山人遇樵子直到開元王長史前身後身付餘習百變千化無
窮已初疑磊落曙天星次見搏擊三秋兵雁行布陳衆未曉虎
穴得子人皆驚行盡三湘不逢敵終日饒人損機格自言臺閣
有知音悠然遠起西遊心高山夏木陰寂寂好處徘徊駐飛錫
忽思爭道畫平沙獨笑無言心有適藹藹京城在九天貴遊豪
士足華筵此時一行出人意賭取聲名不要錢

贈別約師

并引

邢州人丈約而并生而雲鶴以故去葦為浮圖生寤而證入與
南抵六祖始生之廬得道教世恙今年訪余于連州且曰貧道

昔浮湘川會柳儀曹謫零陵宅于佛寺幸聯棟而居者有年
是時入大士得落耳界夫聞為見因今日之來曩時之因耳時
儀曹牧柳州與八句贈別

師逢吳興守相伴任禪高春雨同栽樹秋鐙對講經廬山曾結
社桂水遠揚舲話舊還惆悵天南望柳星

送鴻舉師江南

并引

始余適朗州爾時是師振麻衣斐然而前持文篇以為僧贊唧
唧而清如蟲吟秋自然之響無有假合有足佳者故為賦二章
以聲之距今過于建平赤頰益蕃文思益深而內外學益富
既訊已探穢中出前所與詩閱之紙勞墨瘁與我同來因思夫
苒苒之光渾渾之輪時而言有初中後之分日而言有今昨明
之稱身而言有幼壯艾之期乃至一警效一彈指中際皆具何
必未三生以異身邪然而視予之文昔與今有莛楹之別視余

之書昔與今有鈞石之懸視余之任昔與今乃唯阿之差耳豈
有工拙之教之存乎其間哉蓋可勉而進者與日月而至矣彼
儻末來物雖日月無能至焉是歲師告余遊江西復為賦七言
以為遊地爾

禪客學禪兼學文出山初似無心雲從風卷舒來何處繚繞巴
山不得去山州古寺好閑居讀盡龍王宮裏書使君灘頭揀石
硯白帝城邊尋野蔬忽然登高心暫起又欲浮杯信流水煙波
浩淼魚鳥情東去三百里荆門缺斷無盤渦湘平漢澗清
光多廬山霧開見瀑布江西月淨聞漁歌鍾陵八部多名守半
是西方社中友與師相見便談空想得高齋師子吼

送曾韻上人遊天台

曲江僧向松江見又道天台白石橋鶴戀故巢雲戀岫比君猶
自不逍遙

送義舟師卻還黔南

并引

黔之鄉在秦楚為爭地近世人多過言其幽荒以談笑聞者又從而張皇之猶夫東溘逐原燎或近乎語妖適有沙門義舟道黔江而來能畫地為山川及條其風俗纖悉可信且曰貧道以一錫遊他方衆矣至黔而不知其遠始遇前節使而聞今節使益賢而文故其佐多才士麾圍之下曳裾秉筆彬彬與兔園同風蕃僧以外學嗜篇章時或攝衣為末客其來也約主人乘秋風而還今乞詞以颺之如捧意珠行住坐卧知相好耳余曰唯命筆為七言以應之

黔江秋水浸雲霓獨泛慈航路不迷猿狖窺齋林葉動蛟龍聞咒浪花低如蓮半偈心常悟問菊新詩手自攜常說麾鷲卻將山屐上丹梯似靈

送景玄師東歸

并引

廬山僧景玄袖詩一軸來謁往往有句輕而通如鶴雛襪襪未
有六翮而步舒視遠戛然一嘆乃非泥滓間物獻詩已歛衽而
辭且曰其來也與故山秋為期夫丐者僧事也今無他請唯文
是求故賦一篇以代瓔珞耳

東林寺裏一沙彌心愛當時才子詩山下偶隨流水出秋來卻
赴白雲期灘頭躡屐挑沙菜路上停舟讀古碑想到舊房拋錫
杖小松應有過擔枝

送元曉上人歸稽亭

重疊稽亭路山僧歸獨行遠峯斜日影本寺舊鐘聲徒侶問新
事煙雲含別情應誇乞食處蹋遍鳳凰城

送惟良上人

并引

以貌窺天者曰乾然從單于以而高以教迎天者曰其用四十
有九夫果以有形而不脫乎教立象以推筴既成而遺之古所

謂神交造物者非空言耳軒王受天命其佐皆聖人故得之惟
唐繼天德如皇帝有外臣一介亦聖之徒與刊曆考元書成化
去今丹徒人惟良生而能知非自外求以乾坤之筮當十期之
教凝神運指上感躔次視玄黃漠 滓無倪有常絕機泯知獨
以神會教起于復之初九音生于黃鍾之宮積微本穠言與化
合乎天人之教極而含變變而靡不通神趨鬼懾不足駭也惟
良得一行之道故亦慕其為外臣謬謂余為世間聰明子子來
訪初以說合至于不言言息而理冥復中之以嗟歎曰師其庶
幾乎信神與之而不能測神之所以付信術通之而不能知術
之所以淺哉余聞乎曾并蛙醯雞之不若也長慶四年冬十一
月甲子語至夜艾遂為詩以志焉

高齋映寒水是夕山僧至玄牝無闢鎖瓊書拾文字燈明香滿
室月午霜凝地語到不言時世間人盡睡

送元簡上人適越

孤雲出岫本無依勝境名山即是歸久向吳門遊好寺還思越
水洗塵機浙江濤驚師子吼稽嶺峯疑靈鷲飛更入天台石橋
路垂珠璀璨拂三衣

送宗密上人歸南山草堂寺因詣河南尹白侍鄉

宿習脩來得慧根多聞第一卻忘言自從七祖傳心印不要三
乘入便門東泛滄江尋古跡西歸紫閣出塵喧河南白尹大檀
越好把真經相對翻

劉賓客文集卷第三十

哀悼悲傷三十八首

德宗神武孝文皇帝挽歌二首

出震清多難乘時播大鈞操弦調六氣揮翰動三辰運偶升天
日哀深率土人瑤池無撒跡誰見屬車塵

鳳翼擁銘旌威遲異吉行漢儀陳秘器楚挽咽繁聲駐騎解清
凝笳背直城唯應留內傳知是向蓬瀛

敬宗睿武昭愍孝皇帝挽歌三首

寶曆方無限仙期忽有涯事親崇漢禮傳聖法殷家晚出芙蓉
歸棠棣華玉輪今日動不是畫雲車

任賢勞夢寐登位富春秋敬遂東人幸寧虞祀國憂長楊收羽
騎大液泊龍舟唯有衣冠在年、陰月遊

講學金華殿親耕鋤盾田侍、容諫獵方士信求仙虹影俄侵

日龍騎不上天空餘水銀海上照夜燈前

文宗元聖昭獻孝皇帝祝歌三首

繼體三才理承顏九族親禹功留海內殷曆付天倫調露曲長
在秋風詞尚新本支方百代先讓棣華

月落宮車動風淒仗閑路唯瞻鳳翼人尚想龍顏御宇方無
事乘雲遂不還聖情登望處沈日下西山

享國十五載升天千萬年龍鑣仙路遠騎吹禮容全日下初陵
外人登旧劍前周南有遺老掩淚望秦川

故相國燕國公_子司空挽歌二首

彤弓封旧國黑綃繼前功十年鎮南雍九命作司空池臺樂事
盡蓄鼓葬儀雄一代英豪氣曉散白楊風

陰山貴來葬五陵西前馬登無主猶帶朔風嘶漢水清山郭哀
陽白銅鞮玉今有遺愛日暮人懷之

重至衡陽傷柳儀曹并引

元和乙未歲與故人柳子厚臨湘水為別柳浮舟適郴州余登
陸赴連州後五年余從故道出桂嶺至前別處而君沒於南中
曰賦詩以投吊

憶昨與故人湘江岸頭別戎馬映林嘶君驅轉山滅馬嘶循故
道颿滅如沫電千里江離春故人今不見

謫居悼往二首

悵：何悵：長沙地卑濕樓上見春多花前恨風急猿愁腸斷
叫鶴病翹趾立牛衣獨自眠誰哀仲卿泣

鬱：何鬱：長安遠於日終日念鄉關燕來鴻復還潘岳歲寒
思屈平顛顛顏殷勤望歸路無雨即登山

哭呂衡州時余方謫居

一夜霜風凋玉芝蒼生望絕一林悲空懷濟世安人略不見男

婚女嫁時遺子一函歸
太史哀墳三尺近
要離朔方徙
歲行當滿款為君刊第二碑

遙傷段右丞 江湖舊遊 南宮交代

江海多豪氣
朝廷有直聲
何言馬蹄下
一旦足佳城

傷桃源薛道士

壇邊松在鶴巢空
白鹿閑行旧徑中
手植紅堯千樹茂
滿山無主任春風

王冕道碑堂下作

蒼々宰樹起寒烟
尚有威名海内傳
四府旧聞多故吏
幾人垂淚泫碑前

遙傷丘中丞 并引

河南丘絳有詞藻
與余同升進士科
從仕鄴下遇害故為傷詞

鄴下殺才子
蒼茫冤氣凝
枯楊映漳水
野火上西陵
馬鬣今無所
龍門昔共登
何人為吊客
唯是有青蝇

傷獨孤舍人 并引

貞元中余以御史監祠事
河南獨孤生始仕為奉禮郎
有事宗廟郊疇必與之俱
繇是甚熟及余謫武陵
九年間獨孤生仕至中書舍人
視草禁中上方許以宰相
元和十年春余祇呂抵京師
次都亭日舍人疾不起
余聞因作傷詞以為吊昔別憶年少
今悲喪國華
遠來同社燕
不見早梅花

余次敷水驛伏覩華州舅氏
昔日行縣題詩處
潜然有感

昔日股肱守
朱輪茲地遊
繁華日已謝
章句此空留
蔓草佳城閑
故林棠樹秋
今來重垂淚
不忍過西州

河南觀察使故相國袁公挽歌三首

五驅龍虎節
一入鳳皇池
令尹自無喜
羊公人不疑
天歸京兆

日葉下洞庭時。湘水秋風至。淒涼吹素旗。
丹旒蒞江臯。人鸞鴈亦號。湘南罷亥市。漢上改詞曹。表墓雙碑
立。尊名一字褒。常開平楚獄。爲報里門高。
返葬三千里。荆衡遠帝畿。逢人即故吏。舁奠盡沾衣。地得青烏
相。賓驚白鶴飛。五公碑尚在今日。亦同歸。

代靖安佳人怨二首并引

靖安丞相武公居里名也。元和十一年六月。公將朝。夜漏未盡
三刻。騎出里門。遇盜。斃于墻下。初公爲郎。余爲御史。繇是有旧
故。今守于遠服。賤不可以諫。又不得爲歌詩。声于楚。挽故代作
佳人怨。以禪于樂府云。
寶馬鳴珂躡曉塵。魚文匕首紀車茵。適來行哭里門外。昨夜華
堂歌舞人。

秉燭朝天遂不回。路人彈指望高基。墻東便是傷心地。夜：秋

螢飛去來

傷愚溪三首并引

故人柳子厚之謫永州。得勝地。結茅樹蔬。爲治。址爲基。榭。目曰
愚溪。柳子沒三年。有僧遊零陵。告余曰。愚溪無復曩時矣。一
聞僧言。悲不能自勝。遂以所聞。爲七言。以寄恨。

溪水悠悠春自來。學堂無主燕飛回。隔簾惟見中庭草。一樹山
榴依旧開。

學聖數行留壞壁。木奴千樹屬隣家。唯見里門通德榜。殘陽窸
窣出樵車。

柳門竹巷依。在野華青苔日。多。繼有隣人解吹笛。山陽旧
侶更誰過。

碧澗寺見元九侍御和長上人詩有三生之句。因以和
廊下題詩滿壁塵。塔前松樹已鱗皴。古來唯有王文度。重見平

生竺道人

傷秦姝行并引

河南房開士前為虞部中郎為余話曰我得善箏人于長安懷遠里其後開士為赤縣牧容州求圖主而誨之藝工而天今年開士遺余新詩有悼佳人之目頌余知所自也惜其有良仗獲所從而不可久乃為傷詞以貽開士

長安二月花滿城
揮花女兒弄銀箏
南宮仙郎下朝晚
曲頭駐馬聞新聲
馬蹄遙遲心蕩漾
高樓已遠猶頻望
此時意重千金輕
身傳消息紺輪迎
芳筵銀燭一相見
淺笑低鬟初目成
蜀弦錚挺指如玉
皇帝弟子常家曲
青牛文梓赤金簧
玫瑰寶柱秋鵲行
欽賊收袂凝清光
抽弦緩調怨且長
八鸞餅：渡銀漢
九雛威鳳鳴朝陽
曲終韻盡意不足
餘思悄絕愁空堂
送郎鎮南別城關
樓船理曲瀟湘月
馮夷躩：舞綠波
鮫人出聽停綃校

北池含烟瑤草短
萬松亭下清風滿

北池萬松亭皆容州勝槩

秦声一曲此

時閉嶺泉鳴咽容南斷
來自長陵小市東
薜華零落瘴江風
侍兒掩泣收銀甲
鸚鵡不言愁玉籠
博山炉中香自滅
鏡奩塵暗同心結
從此東山非昔遊
長嗟人與弦俱絕

夔州竇負外使君見示悼妓詩
願余嘗識之因命同作
前年曾見兩鬟時
今日驚吟悼妓詩
鳳管學成知有籍
龍媒改換嘆無期
空廊月照常行地
後院花開旧折枝
寂寞魚山青草裏
何人更立智瓊詞

竇夔州見寄寒食日憶故姬小紅吹笙因和之

鶯声窈眇管參差
清韻初調衆樂隨
幽院粧成花下弄
高樓月好夜吹時
忽驚暮槿飄零盡
唯有朝雲夢想期
聞道今年寒食日
東山旧路獨行遲

傷循州渾尚書